

SABOR

PAGANAY A BAGI

Sabor

1-41

SABOR 1

So Manga oontol ago so Manga rarata

Rarakmatan so taw a kena a ba pelalakaw ko mosawir o manga rarata

o di na tomitindog ko lalan o manga baradosa

aya pen o ba moontod ko ontoda o dii mamagongatongat.

2 Ka aya ikapipiya a ginawa niyan na so Kitab o Allah,

na perasamen iyan so Kitab iyan sa gagawii daondaw.

3 Lagid sekaniyan o kayo a miyapamola ko kilid a lawasaig a dii teribonga sii ko mosim iyan,

ago di den kelayon so manga raon iyan.

Mapiya i bobolos so langon taman a di niyan dii nggolaolaan.

4 Kena a ba niyan datar so manga rarata a taw

a lagid siran baden o okap a ipembayog a ndo.

5 Sabap roo na di makapemayandeg so manga rarata ko kapengokom,

aya pen o ba maped so manga baradosa ko kalilimod o manga oontol.

6 Ka pagiipaten o Allah so lalan o manga oontol,

ogaid na kedadas so lalan o manga rarata.

SABOR 2

So Dato a Miyapili o Tohan

Ino dii nggagani so manga nasiyon

ago pepagantangan so manga taw sa ilang baden?

2 Pegato so manga dato sa doniya

ago pepegopakat so manga olowan on sa sopak ko Allah,

ago sopak ko miyapili iyan a dato, a tig iran a

3 "Potolen tano so manga rantay iran,

ago ilebad tano so ipepematong iran rektano."

4 So kokorsi roo sa kasorgaan na dii kela;

so Kadnan na di niyan siran dii masodi.

5 Na giyoto a pembongetan iyan siran sii ko kakerarangiti ron,

ago pekalekan iyan siran ko kapenggani niyan a peteroon iyan a

6 "Piyakandato aken den so miyapili aken a Dato

sii sa Siyon a so soti a palaw aken."

7 "Peyagen ko," a tig o dato, "so inisogo o Allah:

Pitero iyan raken a 'Seka i Wata aken;
imanto a gawii na saken den i ama a ka.

8 Pangni ka raken, ka pakipekewali aken reka so manga nasiyon,
na taman den ko pirowarowangan o doniya na pekitangan aken reka.

9 Sesaan ka siran a bentol a potaw;
peroropeten ka siran a lagid o koden a bote.' "

10 Kagiya ka maoto, hey manga dato, na pagongangen kano baden imanto;
pakiinsarat kano, hey manga olowan sa doniya.

11 Pangongonotani niyo so Allah a rakes o kalek,
ago pakapiyaa niyo a ginawa niyo a kitatabaden.

12 Areki niyo so Wata, ka o ba sekaniyan baden kararangiti
na mabinasa kano ko lalan iyo,
ka pekasokeyaw so gani niyan ko sakotika.
Rarakmatan so langon a pepegapas rekaniyan.

SABOR 3

Pangni sa Tabang igira a Kapipita

Ya Allah, sayana a madakel a soranga aken.
Tanto a madakel a perido raken.

2 Madakel a dii tero makapantag raken a
"Da den a tabang on o Tohan."

3 Ogaid na seka, ya Allah, i kelong a makalilibet raken,
ago so bantogan aken, ago so pembangon ko olo aken.

4 Penggoraok ako sa matanog ko Allah,
na pegamponen ako niyan roo ko soti a palaw niyan.

5 Pepekaiga ako ago petorogen,
na pepekanaw ako peman ka pelindingen ako o Allah.

6 Di aken ikelek so bariboribo a manga taw
a pesondol raken ko mbalabala.

7 Mbowat ka, ya Allah!

Sabeta ko ngka, hey Tohan ko!

Ka miyasontok ka sa bies so langon a manga ridoay aken;
miyaropet ka so manga ngipen o manga rarata a taw.

8 So kakesabet na poon ko Allah.

Pengnin ko a karakmatan ka so manga pagtaw ngka.

SABOR 4

Pangni sa Tabang ko Kakegawii

Ampona ko ngka igira a pepenanalo ako reka, hey Tohan ko a aya ko kaontol.

Isako kailotan ako na liyoagan ako ngka;

na, kalimoon ako ngka imanto ago ampona ngka so pangangarapan aken.

2 Hey sekano a manga taw, ay katey pen a kapepagitowitua niyo ko bantogan aken?
Ay katey pen a kapekebabayai niyo ko da a bali niyan ago so kapananamari niyo ko di benar?

3 Sabota niyo a inisenggay o Allah a rek iyan so taw a magiiklas on;
pepamachinegen ako o Allah igira a pepenanalo ako ron.

4 Tebeker kano baden sa kalek, na di kano pendosa;
pamimikirana niyo so madadalem ko poso iyo
igira a romerenek kano a sisii ko igaan iyo.

5 Palada niyo ko Allah so patot a ipesoasoat on
na go sarigi niyo sekaniyan.

6 Madakel a pepekaise sa "Antawaa pen i mapekailay kami niyan sa mapiya?
Pakaliwanaga ngka rekami so paras ka, ya Allah."

7 Miyapadalem ka ko poso aken so mala a kapekebabaya
a di sii ko masa a kitataralo o pereperan ago bago a arak iran.

8 Magiga ako ago torogen a lomilintad,
ka kagiya seka bo, ya Allah, i pepekapaginetaw raken sa da a ba raken pekabinasa.

SABOR 5

Pangni sa Kalilinding

Lekai ngka so tangila ngka ko manga katero aken, ya Allah;
tagoa ngka sa ginawa so kapeperego aken.

2 Pamakinega ngka so kapenggoraok aken sa tabang, hey Tohan ko a Dato aken,
ka sii ako reka pepangangarapan.

3 Oman mapita, ya Allah, na pekeneg ka so sowara ko.
Oman mapita na ipegadap aken reka so manga pangni aken
ago nomanayaw ako a miinam.

4 Kena a ba ka Tohan a masosoat ko kamarataan;
da den a marata a ba reka makapenyampo.

5 Di den pekatindog so manga takabor ko kamamasan ka;
ipekegowad ka so langon a dii mbabaradosa.

6 Pembinaan ka so siran oto a dii mamararo sa di benar;
so manga talibono ago dii mamanaliba na ipekesisingay o Allah.

7 Ogaid na so saken on peman,
na sabap ko kala a ka i gagaw na soled ako ko walay ngka;
sodiyod ako sii ko soti a Timplo ngka ko kapagaadati aken reka.

8 Nggonanaowa ko ngka, ya Allah, sii ko kaontol ka
sabap ko manga ridoay aken;
pantara ngka so lalan ka a pekedegen aken.

9 Ka da den a katero a pepekapoon ko ngari iran a ba kesarigi;
aya mipepeno ko poso iran na kapaminasa.

So bakereng iran na lagid o kobor a kalelekaan,
na aya pekipekas ko dila iran na kapamagakal.

10 Tanaan ka kiran, hey Tohan ko, so kasalaan iran.

Pengnin ko a ikaroseng iran so manga kadiyat iran a marata.

Bowangen ka siran sabap ko kadakel o dosa iran,
ka miyasopak ka iran.

11 Ogaid na makapiya a ginawa o langon a pepagapas reka;
makapagidaida siran lalayon sa kasosonor.

Lindinga ngka siran

kaan mabebebaya sii reka so siran oto a pekebabaya ko Ingaran ka.

12 Ka matamataan, ya Allah, a rarakmatan ka so manga oontol;
ililikop ka kiran so limo o ka a mikekelong iran.

SABOR 6

Pangni sa Tabang ko Kasasamok

Ya Allah, di ako ngka pembongeti a ba ka pekerarangiti.

Di ako ngka ndanega a ba ka dii nggani.

2 Kalimoon ako ngka, ya Allah, ka ikokopay ako.

Ya Allah, bolongi ako ngka, ka pepekagedam so pito lapis a bago aken,

3 Na sayana a masososa a ginawa ko.

Ay katey ai, ya Allah, ay katey niyan?

4 Kasowi ako ngka na panabangi ngka so niyawa ko;

sabeta ko ngka, ya Allah, sabap ko da a pitetamanan iyan a gagaw ngka,

5 Ka da den a ba reka petedem sii ko kaden o miyamatay.

Antawaa i pekapodi reka roo?

6 Inapos ako den merego;

mababasa gawii na pelapayan so olona aken sa kapesegad aken,
na pekerames aken a lo so igaan aken.

7 Pepekalobay a manga mata ko ko kapakamboboko aken,

na pekedaan ai sa kanono sabap ko langon o manga ridoay aken.

8 Awai ako niyo langon a dii nggolaola sa marata,

ka miyaneg o Allah so di aken dii kasenganseng.

9 Piyakineg o Allah so kapenggoraok aken sa tabang,

na pagamponen o Allah so kapepangangarapan aken.

10 Pengaayaan ago tanto a kelek so langon a ridoay aken;

magaan so magaan na makapepato siran a penga didiyamanan.

SABOR 7

Pangni ko Kapangokom

Ya Allah a Tohan ko, sii ako reka pepagapas;

pakalidasa ko ngka ko langon a peseloba raken na go sabeta ko ngka,

2 Ka o ba ako iran baden masekisi a datar o arimaw,
ago mapamekang ako iran a da a ba raken pekasabet.

3 Ya Allah a Tohan ko, o miyanggolaola aken ai
ago miyakasela so manga lima ko,

4 O kiyapemarataan aken so bolayoka aken
o di na kiyapamabaan aken so ridoay aken

5 Na pakisalobaan ago pakiraoten ako ngka ko ridoay aken
na go ngka on pakilomegen ko lopa so kaoyagoyag aken
a mibegak iyan ko bayanek so badan aken.

6 Mbowat ka, ya Allah, a kekarangit.

Mbowat ka sa kapagerena ngka ko dii kanggani o manga ridoay aken;
pagnaw ka na tabangi ako ngka.

Inisogo o ka so kapengokom;

7 Limoda ngka sa ginawa ngka so langon a taw,
na ndatoi ngka siran san sa poro.

8 So Allah i pengokom ko langon a manosiya;
kokomen ka raken so kaontrol aken, ya Allah a Lebi a Maporo,
ago so kapagiinontolan o poso aken.

9 Tapeleken ka so dii kandosa o manga rarata a taw,
ago pakambekena ngka so manga oontrol,
ka maontrol ka a Tohan
a pepariksa ko manga pamikiran ago manga poso.

10 Aya kelong aken na so Lebi a Maporo a Tohan
a pesebet ko manga titito i poso.

11 Maontrol so Tohan i kapangokom,
na pekerarangan o Tohan so manga rarata a taw oman gawii.

12 O di iran telikodi so manga dosa iran
na nggarangen o Tohan so pedang iyan.

Maiirat iyan a kagagasaan so pana iyan;

13 Matitiyagar iyan so manga gomaan iyan a pekapatay
ago iaarang iyan so pekedeg a manga gasa iyan.

14 Ilaya ngka so marata a taw

a inikaogat on so samok ago aya ipembalilit on na kadostaan,
a aya di niyan dii mbawata na manga kabokegan.

15 Komiyalot sekaniyan sa madalem,
na sekaniyan bo i miyaolog ko galebo a kiyalot iyan.

16 Keonay sekaniyan ko di niyan dii kasemok,
na itena ko olo niyan so kapepanganiyaya niyan.

17 Penalamatan ko so Allah sabap ko kaontrol iyan,
na ndidaon ko a podi so Ingaran o Allah a Lebi a Maporo.

SABOR 8

So Bantogan o Tohan ago so Pangkatan o Manosiya

Ya Allah a Kadnan ami,
sayana a kababantogan so Ingaran ka ko dalem a doniya.

Inipangkat ka so menang ka ko poro o manga langit.
2 So manga modol o manga wata ago manga ikaririga
na piyakipodi ngka on a ginawa ngka sabap ko manga ridoay ngka,
kaan ka mapakarenek so ridoay ago so peseop.

3 Igira a pelangagen ko so manga langit ka a pasad o manga kemer ka,
so olan ago so manga bitoon a miyanga tatago o ka ko manga darpa iran

4 Na antawaa so matag baden manosiya a ba ngka pipikira,
ago so wata o manosiya a ba ngka pagiipata?

5 Inonta na biyaloy ngka sekaniyan a malo mababa i pangkatan a di so Tohan,
na siyangkadan ka sa bantogan ago menang.

6 Piyakindatoan ka rekaniyan so manga pasad o lima ngka,
na langon ai na dinidalem ka ko kapaar iyan:

7 So manga bilibili ago manga sapi taman ko manga iila a binatang;

8 So manga papanok sa kawang ago so manga seda ko ragat,
ago so langon a kaaden a pepelalangoy ko manga okita sii ko manga ragat.

9 Ya Allah a Kadnan ami,
sayana a kababantogan so Ingaran ka ko dalem o doniya.

SABOR 9

Kapanalamat ko Tohan sabap ko Kokoman iyan

Podin ko seka, ya Allah, sa iklas ko poso aken;
pemanotolen aken so langon a piyakamemesa a pinggolaola ngka.

2 Ikebabaya aken seka ago ipekapiya a ginawa ko;
ndidaon ko a podi so Ingaran ka, hey Lebi a Maporo.

3 Pepekatalikod so manga ridoay aken;
pekirepang siran ago pepanga dadadas sii ko kamamasaan ka.

4 Ka inipamayandeg ka so kabenar aken ago tindeg;
moontod ka ko korsi i ka a pepengokom sa ontol.

5 Pimbongetan ka so manga nasiyon
ago bininasa ngka so manga rarata a taw;
piyonas ka so ngaran iran sa taman sa pakataman.

6 Miyaiapos so manga ridoay,
na da a kaposan iyan a kapekebinasa iran;
pinggegeba a ka so manga siti iran,
na piya so katatademi kiran na miyada.

7 Ogaid na ndadato so Allah sa dayon sa dayon;
pitiyagar iyan so korsi iyan ko kapangokom.

8 Ipengokom iyan ko doniya so kaontol;
na ipendato iyan ko manga taw so matito.

9 So Allah na pekeapasan o siran oto a pepelopiten,
ago aya maporo a lindonga sii ko masa a kasasamok.

10 Siran oto a matao ko Ingaran ka, ya Allah, na serig reka,
ka da ngka den katalikodi so apiya antawaa a di reka dii mbabanog.

11 Pagidaidai niyo sa podi so Allah a kokorsi sa Siyon.

Pakalangka niyo sii ko manga nasiyon so pinggolaola niyan.

12 Igira a peseop sekaniyan sa bono na tatagoon iyan sa ginawa so pepanga rarasay;
di niyan indadarainon so kapenggoraok iran.

13 Kalimoon ako ngka, ya Allah.

Ilaya ngka so kapekerasay aken a pekisabap ko siran oto a pekegowad raken.

Panabangi ako ngka ko manga gimowa o kapatay

14 Kaan aken mandagiday so langon a podi ngka
sii ko manga gimowa o siti a Yarosalim
ago kebebaya roo sabap ko kiyasabeta ngka raken.

15 Miyaolog so manga nasiyon ko galebo a kiyalot iran;
miyasikem so manga ai ran o litag a tiyaan iran.

16 Pepakikilala o Allah a ginawa niyan sii ko kapegokasa niyan ko kokoman;
pekelitagan so manga rarata a taw ko galebek o manga lima iran.

17 Sii pekaantapa so manga rarata ko kanarakaan,
so den so langon a nasiyon a pepakalipatan iran so Tohan.

18 Ogaid na so kikadodowaanan na kena a ba lalayon pakalilipati,
aya pen o ba taman sa pakataman a kaada o inam o pepanga rarasay.

19 Mbowat ka, ya Allah. Di ka pekiato ko manga manosiya.

Pakapangadapa ngka ko ginawa ngka so manga nasiyon
na go ngka siran kokoma.

20 Tanai ngka siran a kalek, ya Allah.

Pakitokawi ngka ko manga nasiyon a matag siran baden manosiya.

SABOR 10

Pangni ko Kandanega ko Manga rarata

Ino ka titindog sa mawatan, ya Allah?

Ino ngka pageenaa a ginawa ngka igira a masa a kasasamok?

2 So marata a taw sii ko kapepangimporoan iyan na pesetroon iyan so manga lolobay
a pepanga lilitagan o manga rarata a kadiyat a pegembaalan iyan.

3 Ipetekabor o marata a taw so manga baya a ginawa niyan;
pepodin iyan so mala i napso, na di niyan dii sodiin so Allah.

4 Sabap ko kipoporoon o marata a taw sa ginawa niyan
na di niyan pembanogen so Allah;
sii ko langon a kapepagantangan iyan na da den a ba niyan pamikiran ko Tohan.

5 Lalayon bibid so manga okitokit iyan;
lebi a maporo so manga kokoman ka, ya Allah, a di so pekesabotan iyan;
ba niyan den pepagompata so langon a somosorang on.

6 Tig iyan ko ginawa niyan a "Di ako den keoteng;
da den a kamaregenan a ba ko keokiti."

7 Mapepeno so ngari iyan a kandadaora, kapamokeg ago kapamagita;
sisii ko didalem o dila iyan so kasasamok ago kadostaan.

8 Pepemagayan sekaniyan ko marani ko manga iito a inged;
sii ko manga orooro na pembonoon iyan on so da a manga sala iyan.
Di niyan dii simaan so kekaidan iyan;

9 Pepenayaw sekaniyan ko tapoka iyan a datar o arimaw;
Pepagayan sekaniyan sa kasikema niyan ko da a ba on pekatabang;
pesikemen iyan siran ago petoyoken iyan pen sii ko poket iyan.

10 So pepanga kakaidan iyan na pepanga sasasa ago pepamangilampes,
ka pekepeges siran o bager iyan.

11 Di niyan dii teroon ko ginawa niyan a "Di ini katawan o Tohan.
Sasapengan iyan a paras iyan na di ako niyan pekeilay."

12 Mbowat ka, ya Allah! Kolaten ka a lima ngka, hey Tohan ko!
Di ngka pekalipati so da a ba on pekatabang.

13 Ino dii masodi o marata a taw so Tohan a di niyan dii teroon ko ginawa niyan a
"Di ako niyan den ndanegen"?

14 Ogaid na benar a pekeilay ngka, hey Tohan ko, so samok ago so karomasayan;
tatagoon ka sa ginawa, ka aden a ikidia ngka san.

So pekekaidan na iseserakan iyan reka a ginawa niyan;
seka i pepekatabang ko manga ilo.

15 Potola ngka so barokan o marata ago baradosa a taw;
danegen ka on so kamarataan iyan taman sa di ini mada.

16 So Allah na Dato sa taman sa pakataman.
So manga kapid na penga ada ko inged iyan.

17 Miyanege ka, ya Allah, so ikakadali o pepanga rarasay;
pepakabageren ka so manga poso iran ago tatagoon ka sa ginawa so kapenggoraok iran.

18 Pegabangen ka so manga ilo ago so kilolopiten
kaan so manga taw a matag dii doniya na di den peman makapengangalek.

SABOR 11

So Kapagapas ko Allah

Sii ako pepagapas ko Allah.

Ino niyo raken pen peteroa a

"Palagoy ka a lagid o papanok roo ko manga palaw,

2 Ka miyairat o manga rarata so pana iran ago kiyagasaan iran den,

ka ipena iran a poon ko maliboteng ko manga titito i poso.

3 Igira a pekegeba so manga onayan
na antonaa pen i mapenggolaola o maontol a taw"?

4 Ndodoo so Allah ko soti a Timplo niyan;

kokorsi so Allah roo sa kasorgaan.

Mbabantayan iyan so manga manosiya;

pepariksaan siran o manga mata niyan.

5 Palaya den pepariksaan o Allah so manga oontol ago so manga rarata,

na ipekegowad iyan so taw a mabebaya manganiyaya.

6 Pekioranan iyan so manga rarata sa pekedeg a manga waga ago sandawa a peketotong;
so pekalowis a ndo na aya iran bagian.

7 Ka maontol so Allah, na pekebabayaan iyan so kapaginontolan;

so manga titito a taw na keilay iran so paras iyan.

SABOR 12

Pangni sa Tabang

Tabang ka, ya Allah, ka da den a ba miyalamba a magiiklas reka;

ka miyanga ada so mapaparatiyaya a manga manosiya.

2 Oman i isa na pepemokegan iyan so siringan iyan;

matilak a dii kateroa o modol iran ko kapanaliba.

3 Mapakarenek o Allah so langon a modol a dii tero sa matilak a garengkang sa didalem,
ago so oman i dila a di niyan dii tekabor a

4 "Kidaag ami so dila ami;

rek ami so manga modol ami; antawaa i pekapaar rekami?".

5 "Sabap ko dii katebani ko manga miskin,

ago so dii kapakaperego o manga kadodowaanan

na pembowat ako imanto," a tig o Allah,

"ka pelindengen aken siran, a so den so masingayo iran."

6 Na so manga katero o Allah na da a daway niyan a katero

a datar o pirak a miyakapito malombos ko kiyaoria on sii ko tonaga.

7 Pagipata kami ngka, ya Allah,

na go kami ngka lilindinga sangkanan a manga taw sa taman sa pakataman.

8 Ka pepegenebenedeb so manga rarata a da a ba kiran pekibalang

igira so maresik na aya ipeporo o manga manosiya.

SABOR 13

Pangni sa Tabang o Allah

Ay katey ai, ya Allah? Ba ako ngka pakalilipati sa taman sa pakataman?

Ay katey a kapageenaa ngka raken ko paras ka?

2 Ay katey a kapakaaawid a akal aken ago so kararata a ginawa ko sa gawii gawii den?

Ay katey pen a kadadaaga raken o ridoay aken?

3 Ilaya ko ngka, ya Allah a Tohan ko, na go ako ngka ampona.
Pakalimegasa ngka so manga mata ko, ka o ba ako baden toroga ko kapatay,

4 Ago matero o ridoay aken a "Miyapeges aken sekaniyan,"
na amayamay na mabebaya so manga soranga aken ko kakeoteng aken.

5 Ogaid na sasarigan ko so kapepangalinggagaw ngka;
ipekebabaya o poso aken so kapepenabet ka.

6 Pegidaidaan ko so Allah, ka pinggolaolaan ako niyan sa mapiya.

SABOR 14

So Kalalalongan ago Kamarataan o manga Taw

Aya pekigedi ko pamikiran o lalong na "Da a Tohan."
Miyamakaratarata siran ago piyakasingay so manga galebek iran;
da den a isa bo a ba dii nggolaola sa mapiya.

2 Sii sa kasorgaan na totolongan o Allah so manga manosiya
sa kapegilaya niyan o ba aden a somasabot kiran a dii mbabanog ko Tohan.

3 Miyamakasilay siran langon; palaya siran melagilagid a kikatitinoan i poso.
Da den a isa bo a ba dii nggolaola sa mapiya,
apiya sakataw bo.

4 "Ba di den pekakenal angkai langon a dii mbabaradosa," a tig o Allah,
"a pepelalamed ko manga pagtaw aken a datar o kapekan iran sa paan
ago di ako iran pen telowan?"

5 Roo siran tanto a pepanga aalek
ka kagiya tomatampil so Tohan ko manga oontol.

6 Kabaya o manga baradosa a kapembangena iran ko manga antap o manga miskin,
ogaid na so Allah i pelinding kiran.

7 O ba bo pekapoon sa Siyon so kakesabet o Israil.
Amay ka pekaasalen o Allah so kamapiyaan o manga pagtaw niyan
na tanto a kebebaya so Yakob, ago pekapiya a ginawa o Israil.

SABOR 15

So Ipapaliyogat o Allah

Ya Allah, antawaa i pekabolos ko Timplo ngka?
Antawaa i pekabaling ko soti a palaw ngka?

2 So taw a pepaginetaw sa da a daway niyan
ago dii nggolaola sa ontol,
ago dii tero sa tito a benar sa iklas ko poso iyan,

3 Ago di pemaganta so dila iyan.
Di niyan pamarataan so layok iyan

aya pen o ba niyan pagitowitua so siringan iyan.

4 Di niyan dii sodiin so taw a maresik i poso,
ogaid na pagaadatan iyan so siran oto a maaleken ko Allah.
Di niyan den mbarobaan so minisepa iyan apiya pen o ikelaga niyan.

5 Pepagotangen iyan so pirak iyan a da a iseg iyan,
ago di sekaniyan terima sa tendan a ikebinasa o da a sala iyan.

So taw a di sii dii nggolaola na di den kiiseg.

SABOR 16

Pangni o Somasarig

Lilindinga ko ngka, hey Tohan ko,
ka sii ako reka pepegapas.

2 Pitero aken ko Allah a "Seka i Kadnan aken;
da den a kamapiyaan aken o di bo seka."

3 "Makapantag ko manga kaom aken a sisii sa doniya," a tig o Allah,
"na siran i tindos a manga taw a tanto aken a ipekebabaya."

4 Petaketakepen so manga rata a ginawa o siran oto
a pepananangoran ko salakaw a manga tohan.
Di ako pemangeped ko kapesepaati sa rogo a pangingonomen sangkoto a manga tohan
aya pen o ba mabeto o modol aken so manga ngaran iran.

5 Seka, ya Allah, i sominggay ko kawali aken ago so bagian aken;
piyakatikna a ka so kebolosan aken.

6 So manga temanaan a minisenggay raken na sisii ko manga darpa a ikasosoat aken;
matamataan den a mapiya so posaka aken.

7 Podin ko so Allah a peparinta raken;
apiya sii ko kagagawii na pepanginsaratan ako o poso aken.

8 Tatap a kipageepedaan aken ko Allah;
kagiya sisii sekaniyan ko kawanan aken na di ako den kidolas.

9 Sabap roo na mapipiya a ginawa ko ago mabebebaya so niyawa ko.
Makasasarig mambo so badan aken,

10 Ka di ngka ipendarainon so niyawa ko sii ko darpa o miyamatay
aya pen o ba ngka pakiredaken so Soti a Siyogo o ka.

11 Pekiilay ngka raken so lalan ko kaoyagoyag;
madidiyangka so kapekebabaya aken sii ko kamamasan ka,
na sisii ko kawanan ka so matatatap a manga ikasosoat aken.

SABOR 17

Pangni o Da a Sala iyan

Pamakinega ngka, ya Allah, so kapepamangni aken sa kokoman;
tagoa ngka sa ginawa so kapenggoraok aken.

Lekai ngka so tangila ngka ko kapepangangarapan aken,
ka kena a ba ini pepekapoon ko manga modul a dii mamagakal.

2 Katao ngka den so kapekabemar aken,
ka pekeilay o manga mata ngka so ontol.

3 Miyapariksa ka den so poso aken; miyakaip ako ngka ko kagagawii;
kiyatepengan ako ngka na da den a miyatoon ka raken a kamarataan.

Piyasad aken sa ginawa ko a di den makapendosa so ngari aken

4 A datar o dii nggolaolaan o ped a taw.

Nggolalan ko katero o manga modul ka
na linidasan aken so manga lalan o manga tanganiyaya.

5 Miyakakedeg ko manga lalan ka so manga lakad aken,
na da on silay so manga ai aken.

6 Sii ako reka pepananalo, hey Tohan ko, ka kagiya pagamponen ako ngka;
lekai ngka raken so tangila ngka na go ngka pamakinega so manga katero aken.

7 Pakiilain ka so piyakamemesa a gagaw ngka, hey Tohan ko,
a aya pepekasabet ko siran oto a pepagapas ko kawananan ka sabap ko manga ridoay iran.

8 Lindinga ko ngka a datar o od a mata ngka;

Tapoken ako ngka sii ko didalem a manga papak ka

9 Sabap ko manga rarata a pesondol raken.

Lilikopan ako o pemakapatay a manga ridoay aken;

10 Tiyotopan iran so manga poso iran na petekabor so manga ngari iran.

11 Mbabalabalaan ako iran imanto apiya anda ako sengor;
pepengilayan iran sa okit a kipapesen iran raken ko lopa.

12 Lagid siran o arimaw a pepanganop sa masikem iyan,
ago lagid o mabager a arimaw a magaayan sii ko di keinengka a darpa.

13 Mbowat ka, ya Allah. Atowi ngka siran ago pepada ngka siran.

Sabeten ka so pedang ka ko niyawa ko ko manga rarata a taw.

14 Nggolalan ko lima ngka, ya Allah, na panabangi ako ngka sangkai a manga taw
a aya bo a mapembagian iran na giyangkai a kapepaginetaw iran ko doniya.

Penoon ka ko tiyan iran so ititiyagar ka a kandanega kiran
a manga sesemo ron so manga wata iran

ago aden pen a malamba on ko manga roroni a wata iran.

15 Ogaid na so saken on peman

na sabap ko kaontol aken na pagilain ko so paras ka;

amay ka makanaw ako na kesoat ako ko kakepayag raken o ginawa ngka.

SABOR 18

So Inidikir o Daod ko Kapakataban

Pekebabayaan ko seka, ya Allah, a aya ko bager.

2 So Allah i lakongan aken, kota aken ago pepekalidas raken.
So Tohan ko na aya ko lakongan a ron ako pepadapas,
so kelong aken ago so bager o kapekesabet aken,
ago aya pen maporo a lindonga aken.

3 Igira a petelowan ko so Allah a patot a kapepodiya on
na pekesabet ako ko manga ridoay aken.

4 Minilibed raken so manga tali o kapatay;
minitekaw raken mikolob so pekabinasa a manga degan.

5 Minilikos raken so manga patong o kobor;
kiyalitagan ako o manga sampirot o kapatay.

6 Na sii ko kaiiloti raken na miyananalo ako ko Allah;
miyakagoraok ako sa tabang ko Tohan ko.
Sii ko timplo niyan na miyaneg iyan so lagam aken;
minisampay ko tangila niyan so kiyagoraok aken.

7 Mandiyadi na tiyabeker ago milinog so doniya;
so pen so manga kaonayan ko manga palaw na piyamanabad ago miyanga kokokog,
ka kiyarangitan sekaniyan.

8 Somiyalepot so bel ko ngirong iyan;
miyakapoon ko ngari iyan so pepekalengan a apoy,
na somiyokeyaw ron pen so pekedeg a waga.

9 Inikayang iyan so manga langit na miyanog sekaniyan
a matatago so makapal a maliboteng ko didalem o manga ai niyan.

10 Miyagda sekaniyan ko pepapak a kaaden na lomiyayog;
kilakilat den a kapelayog iyan sii ko manga papak o ndo.

11 Inibongkos iyan sa ginawa niyan so maliboteng;
mililibet on so domedatem a manga gabon sa langit a mapepeno a oran.

12 Miniteras so sindaw ko hadapan iyan na lomiyambas ko manga gabon on,
na miyoran sa giyaw ago pekedeg a manga waga.

13 Mandiyadi na mindadalendeg so Allah roo sa langit,
na minigorong so sowara o Lebi a Maporo.

14 Inipana iyan so manga gasa iyan na miyamangiparak iyan so manga ridoay;
pikas iyan so manga kilakilat na piyakigorigaw niyan siran on.

15 Na kiyasawaan so didalem a ragat,
ago miyapayag so manga onayan o doniya
sabap ko kiyambonget ka, ya Allah,
ago sabap ko kiyapamisenga ngka sa mabager.

16 Kiyawa ako niyan a poon sa poro na kiyapetan ako niyan;
biyaton ako niyan ko madalem a ig.

17 Siyabet ako niyan ko marangit a ridoay aken
ago sii ko siran oto a pekegowad raken a tanto a manga babager a di saken.

18 Giyobat ako iran sii ko gawii a kamomoralai raken,
ogaid na so Allah i tomiyokod raken.

19 Inowit ako niyan ko madaya a darpa;
piyanabangan ako niyan ka kagiya miyasoat sekaniyan raken.

20 Pipiyapiyaan ako o Allah sabap ko kaontol aken;
sabap ko kalolompiyo o sowasowai aken na biyalasan ako niyan.

21 Ka miyakedeg aken so manga lalan o Allah;
da ako nggolaola sa marata a mitalikod aken ko Tohan ko.

22 Ka so langon a kokoman iyan na palaya aken tatagoon sa ginawa;
da aken den silin so manga taritib iyan.

23 Miyaginetaw ako a di kedawayan sii ko hadapan iyan,
na inilidas aken a ginawa ko ko kadostaan.

24 Biyalasan ako o Allah sabap ko kaontol aken,
ago so kalolompiyo o manga lima ko sii ko hadapan iyan.

25 Sii ko siran oto a makalimoon na pepakiilay ngka kiran a makalimoon ka,
na sii ko di penga dadawayan na pepakiilay ngka kiran a di ka kedawayan;

26 Sii ko kikasosoti na pepakiilay ngka kiran a masosoti ka,
ogaid na sii ko manga bibid na pepakiilay ngka kiran a baraakal ka.

27 Pesebeten ka so dii mangangalimbabaan,
ogaid na ipembaba a ka so siran oto a mipoporo so manga mata iran.

28 Seka, ya Allah, i ipesindaw o solo aken;
pepekaliwanagen o Tohan ko so kalilibotengi raken.

29 Nggolalan reka na pekaato ako ko madakel a manga sondaro,
na nggolalan ko Tohan ko na pekalikin ako ko kota.

30 Makapantag ko Tohan na sayana a madidiyangka so okitokit iyan.
So manga initopa o Allah na katetepengan a benar;

kelong sekaniyan o langon a pepagapas rekaniyan.

31 Ka antawaa i Tohan a makaliyoliyo ko Allah?

Na antawaa i Lakongan o di bo so Tohan tano?

32 So Tohan na aya raken dii sembitan sa bager
na pepakadayaan iyan so lalan aken.

33 Pembalowin iyan so manga ai aken a lagid o ai a saladeng,
na pepakatindengen ako niyan ko manga poporo a darpa.

34 Pelayamen iyan so manga lima aken ko katidawa;
keirat o manga barokan aken so pana a tombaga.

35 Ya Allah, ililinding ka raken so kelong ka a ipepanabet ka;
so kawanana a lima ngka i itotokod ka raken,
so limo o ka i ipepekala aken.

36 Pepakaoladen ka so lalan a pelalakawan aken
kaan di kekelid so manga palo aken.

37 Piyanaloba aken so manga ridoay aken na riyaot aken siran;
da ako den peto taman sa da siran mapolang.
38 Giyomek aken siran, na da siran den makambowat;
miyanga ooteng siran ko danga aken.
39 Pisambitanan ako ngka sa bager ko katidawa;
na piyakidaag ka raken so siran oto a miyato raken.
40 Piyakipalagoyan ako ngka ko manga ridoay aken,
na miyabinasa ko so pepanga gogowad raken.
41 Gomiyoraok siran sa tabang, ogaid na da a ba kiran somiyabet;
apiya so Allah i tiyalowan iran, ogaid na da niyan siran ampona.
42 Piyakapagombiyombi aken siran a lagid o bayanek a ipembayog a ndo;
tiyowal aken siran a datar o tonai sii ko manga lalan.

43 Piyanabangan ako ngka ko kagogobata raken o manga taw,
na biyaloy ako ngka a olowan o manga nasiyon;
so manga taw a da a katawi ko ron gowani na pepamanalagad raken.
44 Anda den i kanega iran raken na peratiyayaan ako iran;
so manga rait na pepamanodiyod raken;
45 Pepanga adaan siran langon sa kawaraw,
na pepeliliyo siran pen ko manga kota iran a kitatabaden.

46 Oyagoyag so Allah! Mapodi so Lakongan aken!
Mabantog so Tohan a pepekasabet raken.
47 Sekaniyan so Tohan a ipeseop ako niyan
a pepakidaag iyan raken so manga nasiyon,
48 Ago pepekalidas raken ko manga ridoay aken.
Piyakidaag ka raken so siran oto a miyato raken;
piyanabangan ako ngka ko manga tanganiyaya.
49 Kagiya ka maoto, ya Allah, na podin ko seka sii ko manga nasiyon,
na ndidaon ko a manga podi so Ingaran ka.
50 Pembegan o Tohan sa mangaala a kapakataban so dato iyan;
pepakiilay niyan so da a pitetamanan a gagaw niyan ko mama a kiyaidinan iyan,
a so Daod ago so pekebabadan on sa taman sa pakataman.

SABOR 19

So Bantogan o Allah sii ko Miyanga aaden iyan

Pepayagen o manga langit so bantogan o Tohan,
na pepakalangkapen o kawang so galebek o manga lima niyan.
2 Gawii gawii den na pepamanotol siran,
na oman gagawii na pepakiilay iran so katao.
3 Da a katero o di na basa a ba on di keneg so sowara iran;
4 So sowara iran na pelangkap ko dalem a doniya,
na so manga katero iran na taman den ko pirowarowangan o doniya.

Tiyago iyan ko manga langit so kekadenan o alongan;
5 Peliyo ini a lagid o kewingen a poon ko rowang iyan,

ago lagid o pakokoya a mabebebaya malalagoy ko pasoay niyan.

6 Di ini dii pesod ko sabala o langit na pelibet roo ko isa a poro iyan; da den a mapegna ko karanti iyan.

So Kitab o Allah

7 Madidiyangka so Kitab o Allah a pepekaoyag ko niyawa.

Kasasarigan so manga insarat o Allah a pepemakabegay sa ongangen ko da a peleng iyan.

8 Matito so manga taritib o Allah a ipekebabaya o poso.

Masagogod so manga sogoan o Allah a pepekaliwanag ko pamikiran.

9 Soti so kipekeleken ko Allah a tatap sa taman sa pakataman.

Benar so manga kokoman o Allah ago palaya den manga oontol.

10 Lebi ini a kebabayaan a di so bolawan,
a lawan pen ko madakel a lombos a bolawan;
mamis pen a di so gola a teneb,
apiya pen so gola a teneb sii ko taro niyan.

11 Liyo ron pen na pepekalalang ai ko oripen ka,
na mala i balas so kapetomana on.

12 Antawaa i pepekatendo ko rek iyan a manga ribat?

Rilai ako ngka ko mapageema a manga sala aken.

13 Lidasen ako ngka pen a oripen ka ko dii matibaba a manga dosa,
na di ako ngka kiran pekipaaren.

Amay ka magiyoto na makadidiyangka ako,
ago di ako ketaksil ko mala a kasalaan.

14 Pengnin ko a so manga katero o ngari aken

ago so mapepamikir o poso aken

na ikasoat ka, ya Allah, a Lakongan aken ago Pegaon raken.

SABOR 20

Pangni sa Kapakataban

Maampon ka o Allah ko gawii a kamaregenan.

Makalinding reka so Ingaran o Tohan o Yakob.

2 Kawitan ka niyan sa tabang a poon ko soti a darpa iyan,
na poon sa Siyon na matokod ka niyan.

3 Katademan iyan so langon a soasoat ka,
ago matarima iyan so manga ipeseapat ka on a petotongen.

4 Mibegay niyan reka so masisingayo o poso o ka
ago mapakabolos iyan sa mapiya so langon a manga kadiyat ka.

5 Pelalalis kami sa kapekebabaya igira a miyakataban ka,
na go imbayaw ami so manga pandi ami sii ko Ingaran o Tohan tano.
Maampon o Allah so langon a pepengnin ka on.

6 Imanto na katawan aken a pepakatabanen o Allah so miyapili iyan a dato;
poon ko soti a kasorgaan iyan na pegamponen iyan sekaniyan

a nggolalan ko pepekasabet a bager o kawanan a lima niyan.

7 So ped na sasanaan iran so manga karo sa katidawa,
ago so pen so ped na sii ko manga koda,
ogaid na aya sarigan tano na so Ingaran o Allah a Tohan tano.

8 Pemangirepang ago penga ooteng angkoto a manga taw,
ogaid na pembangon tano ago pemayandeg.

9 Ya Allah, pakatabana ngka so dato.
Ampona kami ngka igira a pepananalo kami reka.

SABOR 21

Podi ko Kiyapakataban

Ipekebabaya o dato so bager ka, ya Allah;
sayana a ikapiiya a ginawa niyan so kiyapakatabana ngka on.

2 Inibegay ngka on so masisingayo o poso iyan,
ka so piyangni o manga modol iyan na da ngka on sangkaa megay.

3 Inowitan ka sekaniyan sa manga pipiya a rakmat,
ago siyangkadan ka sa lombos a bolawan so olo niyan.

4 Piyangni niyan reka so kaoyagoyag na inibegay ngka on,
apiya so kapakalendo o omor iyan sa dayon sa dayon.

5 Miyakala so bantogan iyan sabap ko kiyatabangi ngka on;
inidinan ka sekaniyan sa menang ago pangkatan.

6 Bigan ka sa da a ikeda iyan a manga rakmat,
na tanto ngka a piyakapiya a ginawa niyan sabap ko kasisii ngka on.

7 Ka somasarig so dato ko Allah,
na sabap ko da a ikeda iyan a gagaw o Lebi a Maporo
na di sekaniyan den kiiseg.

8 Tena so lima ngka, ya Allah, ko langon o manga ridoay ngka;
tena so kawanan a lima ngka ko siran oto a pekegowad reka.

9 Amay ka makagemaw ka na pekakaraben ka siran a lagid o rapog.
Sii ko kakerarangiti ko Allah na sekaben iyan siran,
na kelengan siran o apoy.

10 Mbinasaan ka so kebabadan kiran sii sa doniya,
ago so manga moriyataw iran ko manosiya.

11 Apiya pen kedyatan ka iran sa marata
ago pegantangan siran sa samok na di iran den ai kitoman;

12 Ka pekalekan ka siran a pemalagoy
amay ka iarang ka kiran so pana a ka.

13 Poroon ka, ya Allah, a ginawa ngka a nggolalan ko bager ka;
ipagidaida ago podin ami so gees ka..

SABOR 22

So Kagoraok ko Kararasay ago so Kapodipodi

Hey Tohan ko, Tohan ko, ino ako ngka telikodi?

Ino ka tanto a pekawatan a di ako ngka den tebangan,
ago di ngka den keneg so kapeperego aken?

2 Hey Tohan ko, sii ko kadadaondaw na penggoraok ako reka,
ogaid na di ka den sembag,
ago sii pen ko kagagawii, ogaid na di ako den keparinan.

3 Ogaid na masosoti ka a kokorsi sii ko manga podi reka o Israil.

4 Seka i siyarigan o manga apo ami;
somyarig siran na piyanabangan ka siran.

5 Gomiyoraok siran reka na miyasabet siran;
siyarigan ka iran na da siran kaolai.

6 Ogaid na matag ako baden oled a kena den a ba mama,
a pepegitowitooon o manosiya ago dii sodiin o manga taw.

7 So langon a pepekailay raken na di ako iran dii pekaradiyaanan;
pepanonongkaan ako iran a pepengelengkeleng siran:

8 "Somasarig sekaniyan kon ko Allah," a tig iran,
"na so den so Allah i makapenabang rekaniyan.
Sekaniyan den i makasabet on o masosoat on."

9 Ogaid na seka i miyakaliyo raken ko tiyan o ina aken,
na piyakasarig ako ngka apiya isako ikaririga ako pen.

10 Sii ako reka inisana ipoon ko kinimbawataan raken;
ipoon den ko kinikarimbiten raken o ina aken na seka den i Tohan aken.

11 Di ka raken pekawatan ka miyakadaseg raken so samok,
na da den a ba raken pekatabang.

12 Lilibeten ako o madakel a ridoay
a lagid o manga wawaraw a mama a sapi;
so manga babager a sapi a poon sa Basan na kalilikopan ako iran.

13 Pepakangangaan iran raken a ngari iran
a lagid o manga arimaw a pepemangengger a dii sekisi ko miyasikem iran.

14 Datar o ig a miyaodod so bager aken,
na miyanga lelepo so langon a tolan aken;
lomiyanag so poso aken a lagid o taro sii ko rareb aken.

15 Kiyamaraan so bakereng aken a lagid o pirapogan a koden a bote,
na minideket so dila aken ko pelak aken;
inibaba ako ngka ko bayanek a ron ako petay.

16 Lilikopan ako o madakel a manga rarata a mama;
diyaseg ako iran a datar o sagorompong a manga aso;
pilalambasan iran a manga palad aken ago manga ai.

17 Pekealong so langon a tolan aken;
mbabantayan ago papandangan ako iran.

18 Mbabagibagiin iran so manga nditaren aken
ago peripaan iran so kimon aken.

19 Ya Allah, di ka raken pekawatan.
Hey Bager aken, tabangi ako ngka nggagaan.

20 Lidasen ako ngka ko pedang;
pokasa ngka so da a rowar on a niyawa ko ko kapaar angkai a manga aso.

21 Sabeta ko ngka ko ngari angkai a manga arimaw
ago lidasen ako ngka ko manga panga angkai a manga iila a sapi.

22 Peyagen ko so Ingaran ka ko manga pagari aken,
na go podin ko seka sii ko kalilimod iran:

23 "Sekano a maaleken ko Allah na podiya niyo sekaniyan.
Langon iyo a kiyababadan ko Yakob na bantoga niyo.
Simbaa niyo pen, hey langon a mbawataan o Israil.

24 Ka da niyan ndarainonen so mararasay
aya pen o ba niyan sodia so kapekerasay niyan;
da niyan on pagnaa so paras iyan
ka piyamakineg iyan den so kiyagoraok iyan sa tabang."

25 Pepekagoon reka so kapepakapodi aken sii ko mala a kalilimod;
itoman aken so manga samaya aken sii ko kamamasaan o siran oto a maaleken reka.

26 So manga miskin na kan siran ago penga oosog;
siran oto a dii mbabanog ko Allah na podin iran sekaniyan,
maoyag so manga poso iyo sa taman sa pakataman!

27 Pekatadem so langon a taw ko pirowarowangan o doniya
ago sengor siran ko Allah,
na pemanodiyod ko hadapan iyan so langon a bangsa ko manga nasiyon,

28 Ka rek o Allah so kadadato, na ndadatoan iyan so manga nasiyon.

29 So langon a kawasa sa doniya na kan siran ago pemanimba;
so langon a pepekasonod ko bayanek na pemanodiyod ko hadapan iyan,
a so siran oto a di iran mapekamboway so kaoyagoyag iran.

30 So pemakatalingoma a manga apid na pengongonotan siran ko Allah;
mapenotol ko pekasalono a manga taw so makapantang ko Allah,

31 Na pekalangkapen iran so kiyapanabet iyan sii ko manga taw a da pen mbawataan
a peteroon iran a "Miyanggolaola niyan den ai."

SABOR 23

So Allah a Tomatagikor Rektano

So Allah i tomatagikor raken;
di ako den kekorangan sa apiya antonaa.

2 Pepakadekeen ako niyan ko manga pananateba a manga lolombay a otan on;
pegagaken ako niyan ko kilid o lomilintad a manga ig,

3 Na pegoyagen iyan so niyawa ko.

Di ako niyan dii nggonanaon ko ontol a manga lalan sabap ko Ingaran iyan.

4 Apiya pen o sii ako pelalakaw ko balintad a kasisirongan o kapatay na da den a ikelek aken a marata ka mipageepeda aken seka; so badas ka ago teken na pekerinawan ako iran.

5 Pegenatan ako ngka sii ko kamamasaan o manga ridoay aken. Pegododan ka sa lana a olo aken; pesolapay so tagayan aken.

6 Matamataan den a ketatap raken so kamapiyaan ago gagaw ko langon a manga gawii o kaoyagoyag aken, na sii ako pekakaden ko Walay o Allah sa taman sa pakataman.

SABOR 24

So Kababantogan a Dato

Rek o Allah so alam ago so langon taman a matatago on, giya doniya ago so langon a taw a komakaden on;

2 Ka sekaniyan i miyangon ko doniya ko liyawaw o manga kalodan, ago miyakambeken on sii ko manga ig.

3 Antawaa i mapapatot a tekedeg ko palaw o Allah? Anta i pekatindag ko soti a darpa iyan?

4 So taw a lompiyo i lima ago mapoti i poso a di penakoto aya pen o ba niyan sepaan so di benar.

5 Terima sekaniyan sa rakmat a poon ko Allah ago kaontrol a poon ko Tohan a pesebet on.

6 Giyanan den so manga taw a pepamanimba rekaniyan, a so siran oto a dii mbabanog ko paras ka, hey Tohan o Yakob.

7 Bangona niyo a manga olo niyo, hey manga gimowa; pakileka kano, hey andangandang a manga pintoan kaan makasoled so kababantogan a Dato.

8 Antawaa angkai a kababantogan a Dato?

So Allah a pekagaga ago mabager; so Allah a mabager ko katidawa.

9 Bangona niyo a manga olo niyo, hey manga gimowa; pakileka kano, hey andangandang a manga pintoan kaan makasoled so kababantogan a Dato.

10 Antawaa so kababantogan a Dato?

So Allah a Lebi a Mamaapaar, sekaniyan i kababantogan a Dato.

SABOR 25

Pangni sa Kanggonanao ago Kalilinding

Sii aken reka ipepangadap so niyawa ko, ya Allah;

2 Sasarigan ko seka, hey Tohan ko.

Di ako ngka pakapekeyaa aya pen o ba ako ngka pakidaagen ko manga ridoay aken.

3 Da den a mbabayorantang reka a ba keyai,
ka aya makakeya na so siran oto a pepenipo sa da a sabap iyan.

4 Toroon ka raken, ya Allah, so manga lalan ka;
pangendaon ka raken so manga okitokit ka.

5 Nggonanaowa ko ngka ko tito a benar ka na go ako ngka pangendaowa,
ka seka i Tohan a pesebet raken,
na seka i peserigan aken ko mababasa alongan.

6 Tatanodi ngka, ya Allah, so kala a ka i kapedi ago gagaw,
ka inipoon den ai ko miyanga oona a gawii.

7 Di ngka tedemi so manga dosa ko ko kangodai raken pen
aya pen o ba so manga sala a minisopak aken reka,
ka tademi ako ngka baden a makaaayon ko gagaw ngka
sabap ko kapiya ngka, ya Allah.

8 Mapiya ago magiinontolan so Allah;
sabap roo na ipetoro iyan ko manga baradosa so lalan a kedegen iran.

9 Di niyan dii nggonanaon so pepangangalimbabaan ko kaontrol,
na ipepangendaon niyan kiran so lalan iyan.

10 Sii ko langon a okitokit o Allah na masalinggagaw sekaniyan ago kasasarigan
ko siran oto a petoman ko kapasadan iyan ago so manga insarat iyan.

11 Sabap ko Ingaran ka, ya Allah,
na rilai ngka so kadostaan aken apiya pen ai mala.

12 Antawaa so taw a maaleken ko Allah?
Ito on o Allah so lalan a piliin iyan rekaniyan.

13 Lalayon sekaniyan pekekowa a mapiya,
na ketangan o manga wata iyan so lopa.

14 So dii kingginawain ko Allah na rek o siran oto a maaleken on,
na penggogoden iyan kiran so kapasadan iyan.

15 Di aken pelikatan sa mata so Allah,
ka sekaniyan bo i pekapokas ko manga ai aken ko litag.

16 Sangori ako ngka na go ako ngka kalimoon,
ka matatawantawan ako ago mararasay.

17 Miyakadakel so manga awid a akal aken;
pokasa ko ngka ko manga kamaregenan aken.

18 Tagoa ngka sa ginawa so kararasay aken ago so kararata a ginawa ko,
na rilai ngka so langon a dosa ko.

19 Ilaya ngka so kiyapakadakel o manga ridoay aken
ago so masarangit a kipekegowaden iran raken.

20 Ipata ngka so niyawa ko na go ako ngka panabangi;
di ako ngka pakapekeyaa, ka sii ako reka pepegapas.

21 Malinding ako o kada a sala aken ago katito,
ka kagiya mbabayorantang ako reka.

22 Sabeta ngka a Israil, hey Tohan ko, ko langon a karomasayan iran.

SABOR 26

Pangni o Mapiya a Taw

Pakikilalaan ka, ya Allah, a da a sala aken,
ka miyaginetaw ako a di kedawayan,
na siyarigan aken so Allah sa da a kandowadowa.

2 Pariksa ko ngka, ya Allah, na go ako ngka tepengi;
tokawi ngka so poso aken ago pamikiran.

3 Ka so gagaw ngka na lalayon aken pagiimanen,,
na aya ipepaginetaw aken na so tito a benar ka.

4 Di ako pengeped ko pepamagakal a manga taw
aya pen o ba ako pakikoyapeta ko dii mamagomanta.

5 Ipekegowad aken so kalilimod o manga rarata i olaola,
na di ako tepi ko manga baradosa.

6 Pagonaban ko a manga lima ko a mipemataan a da a sala aken
na go aken bo pelibeta so aparang ka, ya Allah,

7 A pepagidaida ako sa matanog a kapanalamat
ago pepanotolen aken so langon a piyakamemesa a manga galebek ka.

8 Pekebabayaan ko so Walay a babalingan ka, ya Allah,
a so darpa a kakadenan o bantogan ka.

9 Di ngka perakesen mayopas so niyawa ko sii ko manga baradosa,
aya pen o ba ngka rakesen so kaoyagoyag aken ko manga talibono,

10 A so manga taw a sisii ko manga lima iran so manga rarata a kadiyat,
ago so kawananan a lima iran na mapepeno a manga tendan.

11 Ogaid na so saken on peman na pepaginetaw ako a di kedawayan;
kalimoon ako ngka ago sabeta ko ngka.

12 Tomitindog ako ko pantar a lopa;
sii ko kalilimod o manga pagtaw niyan na podin ko ron so Allah.

SABOR 27

So da a Kalek iyan a Sarig ko Allah

So Allah i solo aken ago pepekasabet raken; antawaa den i ikelek aken?

So Allah i pelinding ko niyawa ko; antawaa den i ikewan aken?

2 Amay ka pesondol raken so manga rarata a taw sa kasekaba iran ko sapo aken,
a so den so manga soranga aken ago manga ridoay,
na kirepang siran baden ago penga ooteng.

3 Apiya pen o kalikopi ako o madakel a manga sondaro na di den kelek so poso aken;
na apiya pen o mitidawa ako o manga ridoay aken na makasasarig ako pen.

4 Sabetad a miyapangni aken ko Allah na giyai i pananagontamanan aken:
so kapakakaden aken ko walay o Allah
ko langon a manga gawii ko kaooyagoyag aken
kaan aken kabantayi so kakasi o Allah
ago kaisean aken sekaniyan sii ko Timplo niyan.

5 Ka sii ko masa a kamoralaan na pekadalongen ako niyan ko kadena iyan;
itepok ako niyan ko lindonga sii ko barombarong iyan,
na imbatog ako niyan ko lakongan.

6 Mandiyadi na pekaombaw so olo aken ko manga ridoay a lomilibet raken,
na sii ko Timplo niyan na pekorban ako ron
a di ako dii melalis sa kapekebabaya;
pegidaidaan ago pemboboniboniyanan ko so Allah.

7 Pakinega ngka so lagam aken igira a pepananalo ako, ya Allah;
kalimoon ago ampona ko ngka.

8 Isako teroon ka a "Mbabanoga ngka so paras aken,"
na pitero reka o poso aken a "So paras ka, ya Allah, i pembanogen ko."

9 Di ngka raken pegnaa so paras ka.

Di ako ngka mbowangen a oripen ka a ba ka pekerarangiti.
Seka den i miyakatabang raken;

di ako ngka silin aya pen o ba ako ngka talikodi, hey Tohan ko a pesebet raken.

10 Apiya pen o talikodi ako o ama aken ago so ina aken
na so Allah i tegikor raken.

11 Toroon ka raken so lalan ka, ya Allah;
agaka ko ngka ko pantar a pagokitan sabap ko manga ridoay aken.

12 Di ako ngka pelada ko kabaya o manga soranga aken,
ka riridoon ako o manga bokeg a saksi
a aya ipesengaw iran na kapanganiyaya.

13 Matatanged sa ginawa ko a keilay aken so kapiya o Allah
sii sangkai a inged o kikaoyag.

14 Mbabayorantang ka ko Allah;
pakababager ka ago pakakewarawa ngka so poso o ka,
na mbabayorantang ka ko Allah.

SABOR 28

Pangni sa Tabang

Peapanalowan ko seka, ya Allah a Lakongan aken;
di ako ngka pengimbengeli.

Ka o renek ka baden na kebaloy ako a lagid o siran oto a miyanga oolog ko kobor.

2 Pamakinega ngka so kapenggoraok aken sa kapedi
igira a pepananalo ako reka sa tabang

a ibabayaw aken so manga lima ko a iaantap ko Lebi a Soti a Darpa a ka.

3 Di ako ngka pengarasen a ped o manga rarata a taw,

a rakes o siran oto a dii mbabaradosa,
a marinaw so di iran dii kapakimbitiyarai ko manga siringan iran
ogaid na migagaib ko poso iran so kagowad.

4 Badalen ka kiran so galebek iran
ago so kamarataan o manga siyowa iran.
Badalen ka kiran so miyanggolaola o manga lima iran,
na tanaan ka kiran so mapapatot kiran.

5 Sabap sa di iran tegoon sa ginawa so miyanga papasad o Allah
ago so pinggolaola o manga lima niyan
na nggebaan iyan siran
a di niyan siran den mbangonen peroman.

6 Mapopodi so Allah
ka miyaneg iyan so kiyapangangampedian aken.

7 So Allah i bager aken ago kelong;
somasarig on so poso aken na peketabangan ako.
Tanto a mabebebaya so poso aken,
na ipenalamat aken rekaniyan so idaida aken.

8 So Allah i bager o manga pagtaw niyan
ago lindonga a pepekasabet ko miyapili iyan a dato.

9 Sabeta ngka so manga pagtaw ngka
ago rakmati ngka siran a aya ngka manga kawali.
Tagikora ngka siran ago sakopowa ngka sa taman sa pakataman.

SABOR 29

So Sowara o Allah sii ko Barabarat

Palada niyo ko Allah, hey manga ala i gees sa sorga;
palada niyo ko Allah so bantogan ago so kabatowa.
Palada niyo ko Allah so bantogan a ron bo mapapatot ko Ingaran iyan;
simbaa niyo so Allah a nggolalan ko kakasi o kasosoti.

3 So sowara o Allah na sii ko liyawaw o manga ig;
dii ndadalendeg so kababantogan a Tohan,
a so den so Allah, ko liyawaw o manga ala a kalodan.

4 So sowara o Allah na pekagaga,
so sowara o Allah na mapepeno a gees.

5 So sowara o Allah na pekeopak iyan so manga kayo a sidro;
pekesarisa o Allah so manga sidro sa Libanon.

6 Pepakatepaken iyan a Libanon a datar o nati a sapi,
ago so Palaw a Hirmon a datar o mangoda a maila a sapi.

7 So sowara o Allah na pepekasogat a rakes o pepamangiteras a kilakilat.

8 So sowara o Allah na pekokogen iyan so disirto;
pekokogen o Allah so Disirto sa Kadis.

9 So sowara o Allah na pembibiden iyan so manga ala a kayo,
ago pepanapaken iyan so manga kalasan;
na so langon a sisii ko Timplo niyan
na palaya dii melalalis sa "Bantogen so Allah!"

10 Kokorsi so Allah ko liyawaw o bagiyaw;
kokorsi so Allah a ndadato sa taman sa pakataman.

11 Pembegan o Allah sa bager so manga pagtaw niyan;
peperakmatan o Allah so manga pagtaw niyan sa kalilintad.

SABOR 30

Kapangangarapan a Panalamat

Seselaan ko seka, ya Allah, ka inigakap ako ngka poon ko madalem,
na da ako ngka pakikowaan a diyaman ko manga ridoay aken.

2 Ya Allah a Tohan ko, gomiyoraok ako reka sa tabang
na biyolongan ako ngka.

3 Kiyawa ako ngka ko kapekealogan aken ko darpa o miyamatay;
inoyag ako ngka ko kakeolog aken ko kobor.

4 Pagidaidai niyo sa podi so Allah, hey manga kaom iyan;
pepanalamat kano ko katatademi niyo ko kasosoti niyan.

5 Ka saperek baden so rarangit iyan,
ogaid na tatap so limo iyan taman den ko omor.
So kasegad na baanda taman bo ko kagagawii,
ogaid na pekatalingoma so kakebebaya amay ka kepita.

6 Isako magedam aken a malilinding ako na pitero aken a
"Di ako den kiiseg."

7 Ka sabap ko limo o ka, ya Allah,
na piyakambeken ako ngka a datar o mabager a palaw,
ogaid na isako pagenaan ka raken so paras ka na miyasosa ako.

8 Mandiyadi na sii ako reka miyananalo, ya Allah;
sii ako miyangangampedian ko Kadnan:

9 "Antonaa i keparoli ngka ko kapetay aken,
sii ko kakeolog aken ko kobor?"

Kepodi ka o bayanek?

Ba niyan mapekalangkap so kasasarigi reka?

10 Pakinega ngka, ya Allah, na go ako ngka kapediin.

Ya Allah, ogopi ako ngka."

11 Siyambian ka so kapakamboboko aken sa dii kapakaseyaw;
likas ka raken so nditaren aken a sako

na pinditaran ako ngka sa kapiiya a ginawa

12 Kaan madidaw ka a manga podi o poso aken
a kena a ba ako baden renek.

Ya Allah a Tohan ko, penalamatan ko seka sa taman sa pakataman.

SABOR 31

Pangni sa Sarig ko Allah

Sii ako reka pepagapas, ya Allah;
di ako ngka den pakapekeyaa;
sabeta ngka sabap ko kaontol ka.

2 Lekai ngka raken so tangila ngka
na go ako ngka panabangi nggagaan.
Mabaloy ka a lakongan a lindonga aken,
a mabager a kota a ron ako kelinding.

3 Matamataan den a seka i lakongan ago kota aken;
nggonanaowa ko ngka ago agaka ngka sabap ko Ingaran ka.

4 Lidasen ako ngka ko litag a matataan raken,
ka seka i lindonga aken.

5 Ipembayorantang aken sa lima ngka so niyawa ko;
aona ko ngka, ya Allah a Tohan a kasasarigan.

6 Ipekegowad ka so siran oto a pesimba ko da a bali niyan a manga barahala;
ogaid na sarigan aken so Allah.

7 Ikebabaya aken ago ipekapiya a ginawa ko so gagaw ngka,
ka miyailay ngka so kararasay aken
na katawan ka den so manga awid a akal aken.

8 Da ako ngka palada ko lima o manga ridoay,
ka piyakatindag ako ngka baden ko madaya a darpa.

9 Kalimoon ako ngka, ya Allah, ka masisiksa ako;
pepekalobay so manga mata ko sabap ko kapakamboboko aken
taman den ko niyawa ko ago so badan aken.

10 Pekepos so kaoyagoyag aken sii ko rata a ginawa,
ago so omor aken sii ko kapakapererego.

Pekedaan ako sa bager sabap ko kapekerasay aken,
na apiya so manga tolan aken na pekelobayan.

11 Sabap ko langon o manga ridoay aken
na tanto ako a dii sodiin o manga siringan aken.
Ipekelek ako o manga ginawai aken,
na igira a pekeilay ako iran ko lalan na pepelagoyan ako iran.

12 Lagid o miyatay a di den tedeman a kiyalipatan ako iran;
miyabaloy ako a datar o miyaropet a koden.

13 Pekeneg aken so dii kapamaganta o madakel a taw,
ago so kapagiitai ran raken ko mbalabala.

Pepegopakatan ako iran sa marata,
ka di iran dii kedyaten a kambonoa iran raken.

14 Ogaid na sasarigan ko seka, ya Allah;
tig aken a "Seka i Tohan aken."

15 So okoran raken na sisii sa lima ngka;
lidasen ako ngka ko lima o manga ridoay aken
ago sii ko siran oto a peseloba raken.

16 Pakaliwanaga ngka so paras ka ko oripen ka;
sabeta ko ngka ko da a ikeda iyan a limo o ka.

17 Di ako ngka pakapekayaa, ya Allah, ka gomiyoraok ako reka.
Aya makakeya na so manga rarata a taw,
na mikobor siran a kipakagegenek.

18 Mapakakemed angkai a manga bokeg i modul,
ka di siran dii mamanakabor ago dii mamakasodi
ko di iran dii kapangimporoan tero sa sopak ko manga oontol.

19 Sayana a mala so kapiya ngka
a ititiyagar ka ko siran oto a maaleken reka
a di ngka ini dii nggolalan ko kamamasaan o manga taw
sii ko siran oto a pepagapas reka.

20 Sii ko kalilindongan a kamamasaan ka na itatapok ka siran on
a mabelag ko dii kedyaten o manga taw;
sii ko kakadenan ka na lilindingen ka siran on
ko dii kapakiperidoay o manga dila.

21 Podin so Allah,
ka piyakiilay niyan raken so piyakamemesa a gagaw niyan
isako sisii ako ko penggobaten a siti.

22 Sii ko kiyatekawi raken na pitero aken a
"Miyabelag ako den ko kamamasaan ka."
Ogaid na miyaneg ka so kiyapangangampedian aken
isako mananalo ako reka sa tabang.

23 Kababayai niyo so Allah, hey langon iyo a manga kaom iyan.
Pepagipaten o Allah so mapaparatiyaya a manga taw,
ogaid na ipetena iyan ko pepangimporoan so tarotop a mapapatot on.

24 Pakababager kano ago pakapipiyaa niyo so manga poso iyo,
hey langon iyo a miinam ko Allah.

SABOR 32

Kateobat ago Karila

Mapipiya a ginawa o taw a kiyarilaan so manga sala iyan,
ago kiyasapengan so manga dosa niyan.

2 Mapipiya a ginawa o taw a di on imbilang o Allah so kadostaan iyan,
ago da a kapamagakal ko pamikiran iyan.

3 Isako da ako teobat na pepekalobay so manga tolan aken
sabap ko di aken dii kapakaperego ko mababasa alongan.

4 Ka gagawii daondaw na pekidag raken so lima ngka,
na miyati so bager aken a datar o liyaonan.

5 Samaoto na tiyarima aken a miyakandosa ko reka
na da aken pen pagmaa so kadostaan aken.
Tig aken a "Peteobaten ko ko Allah so manga dosa ko,"
na rinilaan ka so kasalaan aken.

6 Sabap roo na makapengangarapan reka so oman i mapaparatiyaya
sii ko masa a kareregeni ron.

Na apiya pen mbagiyaw so mangaala a ig
na di iran sekaniyan den keoma.

7 Seka i di aken dii katepokan;
pekalidasen ako ngka ko samok
ago pelibeten ako ngka a manga lalis sa kakesabet.

8 Tig o Allah a "Paginsaratan ko seka
ago itoro aken reka so lalan a patot a kedegen ka,
na pagosiyatan ko seka ago siyapen.

9 Di ka seyan sa koda o di na kimar a da a sabot iyan
a aya bo a kakipaaren on na osaran sa kakang ago tali,
kaan ka kambayabayai."

10 Madakel a karomasayan o manga rarata,
ogaid na so taw a somasarig ko Allah
na lilibeten o da a ikeda iyan a gagaw niyan.

11 Pakapipiyaa niyo a ginawa niyo ko Allah ago kabebaya kano baden, hey mangaoontol.
Pelalalis kano sa kapekebabaya, hey langon a manga titito i poso.

SABOR 33

Idaida a Podi

Pelalalis kano sa kapekebabaya ko Allah, hey manga oontol;
mapapatot ko manga titito so kapepodiya iran on.

2 Podiya niyo so Allah a sasartaan a boniboniyen a alpa;
didawa niyo a podi a rakes o boniboniyen a kotiyapi a sapolo i tapes.

3 Pagidaidai niyo sa bago a dikir;
mboboniboniyen kano piyapiya a dii melalalis sa kapekebabaya.

4 Ka ontol so katero o Allah,
na kasarigan sekaniyan ko langon a di niyan dii nggolaolaan.

5 Pekebabayaan o Allah so kaontol ago matito a kokoman,
na mipepeno sa doniya so da a ikeda iyan a gagaw niyan.

6 Nggolalan ko katero o Allah na kiyambaalan so manga langit
taman ko langon a pepamanindaw ron a nggolalan ko napas a poon ko ngari iyan.

7 Tinimo iyan so manga ig sa kalodan a datar bo o sii ko manga omoy,
ago piyanaliyong iyan so manga posed a ragat.

8 Kaleken ka ko Allah, hey dalem a doniya.

Pagadati niyo, hey langon a kibabaling ko doniya.

9 Ka mitero sekaniyan na miyaaden ai;
somyogo sekaniyan na minibayan so langon taman.

10 Pegilangan o Allah so manga antangan o manga nasiyon;
di niyan pekaondasen so manga antap o manga taw.

11 Ogaid na tomitikna so manga antangan o Allah sa taman sa pakataman,
na pekitoman so manga antap o poso iyan
ko langon a kapepamagapidapid o masa.

12 Rarakmatan so nasiyon a aya Tohan iyan na so Allah,
a so manga taw a piyamili iyan a makewali niyan.

13 Roo sa kasorgaan na tomotolong so Allah
ka mbabantayan iyan so langon a manosiya.

14 Roo ko darpa a kakadenan iyan na pegilain iyan so langon a kibabaling ko doniya.

15 Na sabap sa pelimbagen iyan so poso o oman i isa kiran
na katawan iyan so langon taman a di iran dii nggolaolaan.

16 Da a dato a ba kesabet a nggolalan ko kadakel o manga sondaro niyan,
na da a sondaro a ba pekalidas sabap ko mala a bager iyan.

17 So koda na di kesanaan a ba makapenabang,
ka apiya pen ko kala iyan i bager na kena ini a ba pekasabet.

18 Ogaid na sisiyapen o Allah so manga taw a maaleken on,
a so siran oto a miinam ko da a ikeda iyan a gagaw niyan

19 Sa kapekalidasa niyan kiran ko kapatay
ago so kapegoyaga niyan kiran ko masa a taon.

20 Mbabayorantang tano ko Allah,
ka sekaniyan i pegogop rektano ago kelong.

21 Sekaniyan i ikapiiya a ginawa tano
ka sasarigan tano so soti a Ingaran iyan.

22 Matatap rekami so da a ikeda iyan a gagaw ngka, ya Allah,
sii ko kaiinama mi reka.

SABOR 34

So Ipepodi ko Kapiya o Allah

Simbaan aken so Allah ko langon a masa;
ketatap so kapepodiya on o manga modol aken.

2 Ipengandag o ginawa ko so Allah;
pamakineg kano a kikararasay ago kabebaya kano baden.

3 Pangeped kano raken mantog ko Allah;
selaselaan tano langon so Ingaran iyan.

4 Pimbabanog aken so Allah na simbag ako niyan;
piyokas ako niyan ko langon o kalek aken.

5 Siran oto a makasasangor rekaniyan
na pepekalangas so manga paras iran a di den pekarondan.
6 Miyananalo angkai a kadodowaanan a mama na miyaneg o Allah,
na siyabet iyan sekaniyan ko langon a karomasayan iyan.
7 Pepagipat so malaikat o Allah ko melilibeta ko siran oto a maaleken ko Allah
na pepakalidasen iyan siran.

8 Tepengi niyo kaan iyo katokawi so kapiya o Allah;
rarakmatan so taw a pepegapas on.

9 Kaleken iyo so Allah, hey manga kaom iyan,
ka da a ba makokorang ko siran oto a maaleken on.

10 Apiya so manga arimaw na kekorangan siran ago penga aaor,
ogaid na so siran oto a mananagontaman ko Allah
na di den kekorangan sa apiya antonaa a kamapiyaan.

11 Song kano sii, manga wata aken, na pamakinega ko niyo;
ipengendao aken rekano so kikaleken ko Allah.

12 O kabebebayai ngka so kaoyagoyag
ago masingayo o ka so kalendo a omor ago kapiya a ginawa

13 Na genggena ngka baden so dila a ka ko marata,
ago so manga modol ka ko kapakatero sa kapamagakal;

14 Talikodi ngka so marata na nggolaola ngka so mapiya;
panagontamani ngka so kalilintad ago apasa ngka pen.

15 Sisiyapen o Allah so manga oontol
na go pepamakinegen iyan so kapenggoraok iran.

16 Ogaid na pesopaken o Allah so siran oto a dii nggolaola sa marata
sa kapapasa niyan ko katatademi kiran sii sa doniya.

17 Igira a penggoraok so manga oontol na pepamakinegen siran o Allah,
na pepokasen iyan siran ko langon a awid a akal iran.

18 Marani so Allah ko langon a kikaroropet i poso,
na pesebeten iyan so siran oto a kiyadaan sa inam.

19 Apiya pen o madakel a kamaregenan o maontol a taw
na pepokasen sekaniyan kiran langon o Allah;

20 Pelindingen iyan so langon a manga tolan iyan;
da den a satiman bo a ba on kepotol.

21 So kamarataan na aya pepekatay ko manga rarata a taw,
na siran oto a pekegowad ko manga oontol na kesala.

22 Pegaonen o Allah so manga oripen iyan,
na da den a sakataw bo ko pepegapas on a ba kesala.

SABOR 35

Pangni sa Tabang

Ridoa ngka, ya Allah, so siran oto a romirido raken;

tidawaan ka so di raken dii makitidawa.

2 Kapeti ngka so kelong ka ago raben,
na mbowat ka sa kapagabanga ngka raken.

3 Kolaten ka so bangkaw ngka ago patok ko siran oto a peseloba raken.
Teroa ngka ko niyawa ko a "Saken so pesebet reka."

4 Pengnin ko a makakeya ago kadiyamanan so siran oto a mananamar ko niyawa ko.
Mamakapeto a miyamakadapanas so siran oto a kekadiyat sa kabinasa ko.

5 Malagid siran o okap a ipembayog o ndo a ipendendeg siran o malaikat o Allah.

6 Makaliboteng ago makalindog so lalan iran ko kapepanalobaa kiran o malaikat o Allah.

7 Tiyaan iran raken so litag iran sa da a sabap iyan
ago komiyalot siran pen sa galebo a keologan raken.

8 Sabap san na mitekaw den a katanai kiran o kasiksaan.

Militag kiran so litag a tiyaan iran
ago maolog siran pen ko galebo a kebinasa siran on.

9 Amay ka magiyoto na kebebaya so niyawa ko sii ko Allah
ago pekapiya a ginawa ko sabap ko kiyasabeta niyan raken.

10 So den so dalem o ginawa ko i nggiraw a

"Antawaa i lagid ka, ya Allah?"

Pesebeten ka so miskin ko mabager a di sekaniyan;
apiya so miskin ago so kadodowaanan sii ko di on dii teban."

11 Pesenditan ako o bokeg a manga saksi;
ipegise iran raken so di aken katawan.

12 Aya ipembadal iran raken na marata ko mapiya
sa kapakapekerataa iran ko ginawa ko.

13 Ogaid na isako manga sasakit siran na minditar ako sa sako
ago inipangalimbabaan aken a ginawa ko a nggolalan ko kiyapowasa ko.
Na isako mangangarapan ako a da maampon

14 Na miyakamboko ako a datar o dii mboko sa bolayoka iyan o di na pagari.
Miyagenebened ako a domodosong a mararata a ginawa ko
a datar o aya ipesegad aken na so ina aken.

15 Ogaid na isako mirepang ako na mitimo siran a miyanga bebebaya;
pitimoan ako o manga penggobat raken a di aken katawan,
na da den a ayat a kapepagitowitoo iran raken.

16 Lagid o manga kapid a lilibeten ako iran a pepamagongatongat
a di iran raken dii pakakitebaan a ngipen iran.

17 Ya Allah, ay katey pen a kambabantayi ngka sii baden?

Panabangi ngka so niyawa ko ko kapesiksaa iran on,
a so den so da a rowar on a kaoyagoyag aken sangkai a manga arimaw.

18 Amay ka magiyoto na penalamatan ko seka sii ko mala a kalilimod;
sii ko hadapan o madakel a taw na podin ko seka on.

19 Di ako ngka pakipepekaradiyaani ko pepamokey a manga ridoay aken.

So pepanga gogowad raken sa da a sabap iyan
na di ngka siran pakapengerakerata sa marata a pamikiran.

20 Kena a ba marinaw a di iran dii kapakimbitiyarai,
ka pepagantangan siran baden sa di benar a kisendit iran
ko siran oto a makalilintad ko inged.

21 Pepamoliatan ako iran a di iran dii teroon a
"Nari! Nari! Kiyabelembelengan ami so pinggolaola niyan."

22 Miyailay ngka ini, ya Allah. Di ka baden rerenek.
Di ako ngka aawata, hey Kadnan.

23 Pagnaw ka ago mbowat ka sa kakokoma ngka ko rido aken.
Panindegen ako ngka, hey Tohan ko a aya ko Kadnan.

24 Pakabenara ko ngka sabap ko kaontol ka, ya Allah a Tohan ko;
di ako ngka pakipepekaradiyaani ko manga ridoay aken.

25 Di ngka kiran pakipeteroon ko ginawa iran a
"Na, miyaipos tano sekaniyan! So den so kabaya tano."

26 Makakeya ago makadapanas so langon a mabebebaya ko kasisiksa aken;
kakokosan sa kayaan ago kapakaito so langon a pepangimporoan raken.

27 Makapelalalis sa kapekebabaya ago kapipiya a ginawa
so siran oto a kebayaan iran so kapakabenar aken;
malalayon iran matero a "Mabantog so Allah a masosoat ko kamapiyaan o oripen iyan."

28 Samaoto na pekalangkapen o dila aken so kaontol ka
ago so manga podi reka ko mababasa alongan.

SABOR 36

So Kadostaan o Manosiya ago so Kapiya o Allah

Aden a migegegi ko poso aken makapantag ko kadostaan o marata a taw:
Di niyan kepikir so kalek ko Allah;

2 Ka sabap sa ibibiling iyan a ginawa niyan a tanto a mapiya
na di niyan keinengka so kadostaan iyan aya pen o ba niyan kagowaden.

3 So manga katero o ngari iyan na pepekasamok ago pepamagakal;
gominek sekaniyan magongangen ago nggolaola sa mapiya.

4 Apiya sii ko kaiiga iyan na pepagantangan sekaniyan sa samok;
di mapiya so lalan a kekedegen iyan,
na di niyan den sengkaan so kamarataan.

5 So gagaw ngka, ya Allah, na somosoko ko manga langit,
ago so kasasarigi reka na taman den ko kawang.

6 So kaontol ka na datar o manga babager a palaw,
so katito ngka i kokoman na datar o mala a kalodan.

Ya Allah, so manosiya ago so manga binatang na palaya ngka den pepegongowan.

7 Sayana a da a lawan iyan so da a ikeda iyan a gagaw ngka, hey Tohan ko.
Pepikalindong so manga manosiya ko along o manga papak ka.

8 Pekeosog siran piyapiya ko mitataralo a manga pangenengken ko walay ngka,
na pepakainomen ka siran ko lawasaig ka a ipekesoat iran.

9 Ka sisii reka so bowalan o kaoyagoyag,
na sii ko sindaw ngka na pekeliwanagan kami.

10 Tatapa ngka so gagaw ngka ko siran oto a matao reka
ago so kapagiinontolan ka ko manga titito i poso.

11 Di ako ngka pekidapoi ko ai o takabor,
aya pen o ba ko ngka pakibogaon ko lima o manga rarata.

12 Ilaya niyo o anda miyaoteng so manga rarata i olaola;
minipapes siran a di mamakapembowat.

SABOR 37

So Kebolosan o Marata a Taw ago so Maontol

Di ka pegoteg sabap ko manga rarata a taw
aya pen o ba ngka siiga so dii mbabaradosa.

2 Ka lagid o manga otan a magaan bo a kakelayon iran
na kelas siran a lagid o gadong a manga pamomolan.

3 Sasarigi ngka baden so Allah na go ka nggolaola sa mapiya;
kaden ka ko inged, ka keoyag ka on a malilinding.

4 Tapiin ka a ikapipiya a ginawa ngka so Allah
ka imbegay niyan reka so masingayo o poso o ka.

5 Mbabayorantangen ka ko Allah so kapepaginetaw ngka;
sarigi ngka pen, ka sekaniyan i pekatoman sii:

6 Pekasigain iyan so kapagiinontolan ka a lagid o solo,
ago so katito o tindeg ka a lagid o igira maoto a alongan.

7 Rerenek ka baden ko hadapan o Allah ago sesabar ka rekaniyan
di ka pegoteg sabap ko taw a pepekapiya so bobolos iyan
ko di niyan dii kinggolalanen ko manga rarata a antangan iyan.

8 Di ngka pengonoti so rarangit, na pakalilipati ngka so gani.
Di ka dii pagoteg, ka kiarong baden ai ko marata.

9 Ka ketipod so manga rarata i olaola,
ogaid na siran oto a mbabayorantang ko Allah na ketangan iran so lopa.

10 Di bo matey na penga ada so manga rarata a taw;
apiya pen mbabanogen ka siran na da den a ketoonan kiran.

11 Ogaid na so dii mangangalimbabaan na ketangan iran so lopa
ago ikepiya a ginawa iran on so lomalangkap a kalilintad.

12 So marata a taw na kekadiyat sa sopak ko maontol
ago di niyan on dii pakakitebaan a ngipen iyan;

13 Ogaid na dii kela o Allah so marata a taw
ka kagiya katawan iyan a pekatalingoma so gawii niyan.

14 Ipekolat o manga rarata so pedang ago pegiraten iran so pana iran sa kapepada iran ko manga miskin ago so kikadodowaanan, ago so kambonoa iran pen ko manga titito i olaola.

15 Ogaid na so pedang iran na kisoker baden ko rek iran a manga poso, na penga popotol so manga pana iran.

16 Tomo so maito a rek o maontol a taw a di so kakawasaan o madakel a manga rarata;

17 Ka ketipod so kapaar o manga rarata, ogaid na totokoden o Allah so manga oontol.

18 Katawan den o Allah so manga gawii o da a manga daway niyan, na ketatap so kawali iran sa taman sa pakataman.

19 Di siran makapekeya ko masa a kasiksaan, na apiya sii ko manga gawii a taon na penga oosog siran.

20 Ogaid na kedadas so manga rarata; keda so manga ridoay o Allah a lagid o manga obarobar ko pangomaan; pesenaw siran a lagid o bel.

21 Pepamangotang so marata a taw na di den mbayad, ogaid na so maontol na maginawa i kapamegay.

22 Siran oto a rarakmatan o Allah na ketangan iran so lopa, ogaid na ketipod so siran oto a di niyan dii sinta.

23 So Allah i pepekabeken ko kapelakad o taw, na ikasosoat o Allah so lalan iyan;

24 Apiya pen o mirepang sekaniyan na di kipayodas, ka kakapetan sekaniyan sa lima o Allah.

25 Gowani na mangoda ako, na imanto na miyalokes ako den, ogaid na da ako den mailay so maontol a taw a ba ndarainonen aya pen o ba makapamangni sa pangenengken so manga wata iyan.

26 Lalayon sekaniyan maginawa ago dii sesembay, na perakmatan so manga wata iyan.

27 Talikodi ngka so marata na nggolaola ka sa mapiya, kaan ka mamboway ko doniya.

28 Ka pekebabayaan o Allah so ontol a kokoman, na di niyan ipendarainon so manga kaom iyan.

Kelinding siran sa taman sa pakataman, ogaid na ketipod so pekebabadan ko manga rarata.

29 Ketangan o manga oontol so lopa, ago pekakaden siran on sa taman sa pakataman.

30 So ngari o maontol na dii tero sa kaongangen,

na pekipekas ko dila iyan so ontol.

31 So kitab o Tohan iyan na madadalem ko poso iyan,
na di den kepangka so kapelakad iyan.

32 So marata a taw na pepanorimanen iyan so maontol,
ka pepanamaran iyan a kambonoa niyan on;

33 Ogaid na so Allah na di niyan ipendarainon so maontol sii ko lima o ridoay niyan
aya pen o ba niyan pakibenari amay ka mawit sekaniyan ko dii kokoman.

34 Mbabayorantang ka ko Allah na go ngka kedega so lalan iyan,
ka iporo ka niyan sa katangana ngka ko lopa,
na amay ka matipod so manga rarata na kemasaan ka nan.

35 Miyailay aken so marata a taw a dii mangarasi
a pepekarimpoong a lagid o lomolombay a kayo sii ko kiyatoan iyan a lopa,

36 Ogaid na somiyagad sekaniyan baden, na miyada,
na apiya pen pimbabanog aken na di sekaniyan den ketoon.

37 Pandapati ngka so madidiyangka a taw
ago paginengkaa ngka so magiinontolan,
ka aya kebolosan angkoto a taw na kalilintad.

38 Ogaid na kebinasa langon so manga baradosa;
ketipod so bobolos o manga rarata i olaola.

39 So kakesabet o manga oontol na poon ko Allah;
sekaniyan i lindonga iran sii ko masa a kasasamok.

40 Petebangan ago ipelidas siran o Allah;
pepakalidasen iyan siran ko manga rarata ago pesebeten iyan siran pen
ka ron siran dii magapas.

SABOR 38

Pangni o Taw a Mararasay

Ya Allah, di ako ngka pembongeti a ba ka pekerarangiti
aya pen o ba ako ngka danega ko kagaganiya reka.

2 Ka minibaseg raken so manga gasa a ka,
na minidag raken pen so lima ngka.

3 Da a bager o lawas aken sabap ko rarangit ka;
da den a kapiya o pito lapis a bago aken sabap ko dosa ko.

4 Kiyaombawan ako o manga kadostaan aken;
datar ini o mapened a awid a di aken kekena.

5 Miyanga ado ago miyanga reredak so manga pali aken sabap ko kalalalongan aken.

6 Mabebekong ako a tanto a minibaba;
sii ko mababasa alongan na pepegenebeneb ako a makamboboko.

7 Lalangkapen a mayaw so badan aken,
na da den a kapiya o lawas aken.

8 Minikopay ako ago tanto a miyagomek;
makapeperego ako a masososa so poso aken.

9 Katawan ka den, ya Allah, so langon a masingayo aken,
na kena a ba reka mapageema so kapakapeperego aken.

10 Pekiorogorog so poso aken, na pekekodep so bager aken;
apiya so kaliwanag o manga mata ko na miyada raken pen.

11 So manga ginawai aken ago manga siringan
na pelidasan ako iran sabap ko manga pali aken,
na pepekaawat raken so manga tonganay aken.

12 Siran mambo a mananamar ko niyawa ko na peteanan ako iran sa manga litag;
siran oto a kebaya raken makasakit na ipepamagita iran so kambinasaa iran raken,
na kekadiyat siran sa kapakatipo ko mababasa alongan.

13 Ogaid na lagid ako o bengel a di pekaneg,
ago datar o pengaw a di niyan kebengat so ngari iyan.

14 Oway, mimbaloy ako den a lagid o mama a di pekaneg a di pekasembag so ngari iyan.

15 Ogaid na seka, ya Allah, i iinamen ko.
Seka i pekasembag, hey Kadnan a Tohan ko.

16 Ka aya pitero aken na
"Di ako ngka kiran pakipepakaradiyaani
aya pen o ba ngka kiran pakipagandisanen amay ka midolas so ai aken."

17 Ka magaan ako den maoteng,
na tatap raken so kararasay aken.

18 Peteobaten ko so kadostaan aken;
miaawid a akal aken so dosa ko.

19 Ogaid na manga tetegas so manga ridoay aken ago manga babager;
madakel a pekegowad raken sa da a sabap iyan.

20 Siran mambo a pembadalan ako iran sa marata ko mapiya
na pesopaken ako iran sabap ko kapananamari aken ko mapiya.

21 Ya Allah, di ako ngka telikodi;
di ako ngka pagawata, hey Tohan ko.

22 Tabangi ako ngka nggagaan, ya Allah a pesebet raken.

SABOR 39

So Kateobat o Masososa i Pamikiran

Pitero aken a "Magiktiyar ako ko manga okitokit aken
kaan aken di mipendosa so dila aken;
pongesen ko so ngari aken taman ko kasisii raken pen o manga rarata."

2 Ogaid na isako da aken pekasa a dila aken
a apiya so kapakatero aken sa mapiya na da den ka rominek ako den
na miyakala baden so kasososa aken.

3 Mikeyaw raken so poso aken,

na sii ko kapepamimikiran aken na komiyadeg raken so apoy,
na giyoto a pikas aken a dila aken:

4 Tig aken a "Pakitokawi ngka raken, ya Allah,
o antonaa i diyandi aken ago so kakepopos o manga gawii aken;
pakitokawi ngka raken i kapakasasagad aken."

5 Biyaloy ngka so omor aken a sasarangaw bo,
na so mapegidad aken na sakotika bo ko kapekeilaya on.
Matamataan a so kaooyagoyag o oman i isa a taw na lagid bo o sengaw.

6 Aya mataan na matag baden along so manosiya sii ko kapepaginetaw niyan.
Da den a kipantag o langon a di niyan dii nggolaolaan;
pepenimo sekaniyan sa kakawasaan, ogaid na di niyan katawan i pekaosba on.

7 "Na imanto, hey Kadnan, antonaa pen i kearap aken?
Seka i iinamen ko.

8 Sabeta ko ngka ko langon a manga sala aken;
di ako ngka pakipegongatongaten ko manga lalong.

9 Romerenek ako; di aken mbengaten so ngari aken
ka seka i kilalag sangkai a kararasay aken.

10 Pokasa ngka raken angkai a ipesiksa a ka raken;
magaan ako matay sabap ko kiyasogata raken o lima ngka.

11 Igira a ipembonget ago ipendaneg ka ko taw so kadostaan iyan;
na lagid o gaab a pelenganen ka so langon a ipekesoat iyan.
Matamataan den a so oman i manosiya na matag baden sengaw.

12 "Pamakinega ngka so kapepangangarapan aken, ya Allah;
lekai ngka so tangila ngka ko kapenggoraok aken sa tabang;
di ka baden rerenek ko kapesegad aken,
ka mananangga ako a mabobolos ako reka baden a datar o langon o manga apo aken.

13 Lokei ako ngka kaan makapiya peroman a ginawa ko
sa di aken pen kangganat a keipos ako den."

SABOR 40

Idaida a Podi

Miyakasebar ako ko Allah na diningilan ako niyan
ka piyamakineg iyan so kapenggoraok aken.

2 Inigakap ako niyan ko piyakalekelek a galebo, a poon ko mariket a tonai.
Piyakadapo ako niyan ko lakongan
na piyakitikna iyan so kapelakad aken.

3 Tiyagoan iyan pen sa bago a idaida so ngari aken,
a so dikir a ipepodi ko Tohan tano.
Madakel a pekailay sii ago pememesa,
na serigan iran so Allah.

4 Rarakmatan so taw a aya niyan sasarigan na so Allah
a kena a ba peramig ko siran oto a pepangimporoan,
a pepananangoran siran ko di tito a manga tohan.

5 Madakel a piyakamemesa a miyanggolaola ngka, ya Allah a Tohan ko; da den a ba ngka tingki.

Madakel a pitekdir ka a kamapiyaan ami;

o payaga ko ini ago panotolen na madakel ai a di so kapemagitonga on.

6 Kena a ba ngka inikasoat so kakorban ago kaselasela, ka pisowan ka baden so manga tangila ko.

So totongen a sapaat o di na soasoat sabap ko dosa na da ngka paliyogaten.

7 Mandiyadi na pitero aken a "Katii ako bo, miyakaoma ko; sii ko kitab na misosorat on so makapantag raken.

8 Ipekebabaya aken so di aken dii kanggolaolaa ko kabaya a ka, hey Tohan ko. so kitab ka na madadalem ko poso aken."

9 Piyakalangkap aken so mapiya a totol makapantag ko kaontol sii ko mala a kalilimod;

da aken genggena so manga modul aken; katawan ka den ai, ya Allah.

10 Da aken pagmaa so kapagiinontolan ka sii ko poso aken; piyayag aken so kasasarigi reka ago so kapepenabet ka.

Da aken pagmaa so da a ikeda iyan a gagaw ngka ago so tito a benar ka ko mala a kalilimod.

11 Di ngka raken penganogoni so kapedi i ka, ya Allah;

pengnin ko a lalayon raken makalilinding so gagaw ngka ago so tito a benar ka.

12 Ka kalilikopan ako o di keitong a manga karomasayan;

riyaot ako o manga dosa ko, na di ako pekanono.

Madakel ai a di so manga bok ko olo aken, na kiyadaan ako den sa inam.

13 Masoat ka, ya Allah, sa kasabeta ngka raken.

Ya Allah, tabangi ako ngka nggagaan.

14 Makakeya ago makadapanas

so langon a sesabenar raken mono.

Makapeto a kadidiyamanan

so siran oto a kabaya iran a kamoralai raken.

15 Mabengang ko kiyayai kiran

so siran oto a di iran raken dii teroon a "Nari! Nari!"

16 Makapiya bo a ginawa o langon a mananagontaman reka, ago ikabebaya ka iran.

Siran oto a pekebabaya ko kapepenabet ka

na malalayon iran matero a "Mbantogen so Allah."

17 Ogaid na makapantag raken na malobay ako ago kadodowaanan; mapikir ako o Kadnan.

Seka i pepekatabang raken ago ago pepekasabet;
di ngka sendoden, hey Tohan ko.

SABOR 41

Pangni o Pekesakit

Rarakmatan so taw a tatagoon iyan sa ginawa so manga miskin;
penabangan sekaniyan o Allah ko masa a morala.

2 Pelindungan sekaniyan o Allah ago pegongowan iyan so kaoyagoyag iyan;
pekapiyaan iyan pen so bobolos iyan sii ko doniya
ago di niyan peladen ko kabaya o manga ridoay niyan.

3 Petebalen sekaniyan o Allah ko igaan iyan igira a pekesakit
na pekabageren iyan ko langon a gedamen iyan.

4 Pitero aken a "Ya Allah, kalimoon ako ngka;
bolongi ako ngka, ka miyakandosa ko reka."

5 Aya dii teroon o manga ridoay aken makapantag raken ko kagogowad iran na:
"Ino pen di petay an mitaman so Ingaran iyan?"

6 Igira a ipembentel ako o isa kiran
na kena a ba iklas so di niyan dii kapakimbitiyarai,
ka petimoon iyan baden ko pamikiran iyan so mipemaganta iyan raken,
na makaliyo na pekalangkapan iyan ko mbalabala.

7 Langon a pekegowad raken na ipepamagetonga ako iran;
aya arangan iran raken na tanto ako a kapapasangan, a tig iran a:

8 "Kiyapetan sekaniyan o piyakalekelek a paniyakit;
di sekaniyan den makapembowat ko kaiigaan iyan."

9 Apiya so tanto aken a ginawai a sasarigan aken
a minipagatoang aken ko paan aken,
na inibayaw niyan a palo niyan sa kiyaridoa niyan raken.

10 Ogaid na seka, ya Allah, na kalimoon ako ngka;
pakabagera ko ngka kaan aken siran kabadali.

11 Aya pekitokaw aken sa masosoat ka raken
na kena a ba raken pepekadaag so ridoay aken.

12 Pegogopan ako ngka sii ko kapagiinontolan aken,
na petegoon ako ngka ko kamamasaan ka sa taman sa pakataman.

13 Mapopodi so Allah a so Tohan o Israil
ipoon sa poonan iyan na taman sa pakataman.
Amin. Amin.

IKADOWA BAGI

Sabor

42-72

SABOR 42

So Pangangarapan o Mama a Minitaog

Lagid o saladeng a pekedali minom ko ig ko manga lawasaig a pekedali reka so niyawa ko, hey Tohan ko.

2 Ikaawaw o niyawa ko so Tohan, a so oyagoyag a Tohan. Anda i kapekasong aken san sa kapakaadap aken ko Tohan?

3 So manga lo aken na aya ko pangenengken sa gagawii daondaw sii ko kapepegiseisei raken o manga taw ko mababasa alongan a "Anda so Tohan ka?"

4 Pesolapayan so niyawa ko o kapakamboboko igira a peketademan aken angkai a miyasowasowa: so kapepekaonot aken gowani ko madakel a taw a pagoolowanan ko siran a dii perada ko Walay o Tohan a dii melalalis sa kapekebaya ago kapanalamat, so den so madakel a taw a dii selasela ko kapista.

5 Ino ka kaadai sa inam, hey niyawa ko?

Ino ka raken masososa?

Inama ngka baden so Tohan

ka podin ko sekaniyan pen,

a so pepekasabet raken ago Tohan ko.

6 Kiyadaan den sa inam a ginawa ko; kagiya ka maoto na petedentademan ko seka sii sa inged a Yordan ago sii ko kapalawan sa Hirmon, roo sa palaw a Misar.

7 Dii mamagolalenga so manga landeng sii ko kapendaleg o manga abaga ngka; minikolob raken so langon a manga ala a begel ka ago manga degan.

8 Sii ko kadadaondaw na ipesogo o Allah so gagaw niyan, na sii ko kagagawii na sisii raken so ipegidaida aken on a aya ko kapepangangarapan ko Tohan o kaoyagoyag aken.

9 Peteroon ko ko Tohan a Lakongan aken a

"Ino ako ngka pekalipati?

Ino ako makapepegenebened a makamboboko a perasain o manga ridoay aken?"

10 Lagid o pesesaan so manga tolan aken ko kapepegompata raken o manga soranga aken a ipepegiseisei iran raken ko mababasa alongan a "Anda so Tohan ka?"

11 Ino ka kaadai sa inam, hey ginawa ko?

Ino ka raken masososa?

Inama ngka baden so Tohan

ka podin ko sekaniyan pen

a pepekasabet raken ago Tohan ko.

SABOR 43

Pakikilalaan ka a da a sala aken, hey Tohan ko,
na panindegen ka so kabenar aken ko da a katohanan iyan a nasiyon;
panabangi ako ngka ko pepamagakal ago manga rarata a mama.

2 Ka seka i Tohan a lindonga aken.

Ino ako ngka mbowangen?

Ino ako makapepegenebeneb a makamboboko
a perasain o manga ridoay aken?

3 Toronen ka so sindaw ngka ago so tito a benar ka
a makanggonanao siran raken
ago makawit siran raken ko soti a palaw ngka,
sii ko kakadenan ka.

4 Mandiyadi na song ako ko aparang o Tohan,
sii ko Tohan a tanto a ikapipiya a ginawa ko ago ikabebebaya.
Podin aken seka a boniboniyang a kotiyapi,
hey Tohan a aya ko Tohan.

5 Ino ka kaadai sa inam, hey ginawa ko?

Ino ka raken masososa?

Inama ngka baden ko Tohan,
ka podin aken sekaniyan pen
a pepekasabet raken ago Tohan ko.

SABOR 44

Pangni sa Kalinding

Miyang o tangila mi, hey Tohan ami,
ka miyapanotol rekami o manga lokes ami
so manga ala a galebek a miyanggolaola ngka ko masa o manga apo ami,
gowani ko miyanga oona a gawii.

2 Piyamogaw ngka a lima so manga nasiyon
na piyakambeken ka so manga apo ami ko inged iran;
giyomek ka angkoto a salakaw a manga taw
ogaid na piyakarimpoong ka so manga apo ami.

3 Kena a ba miyakanggolalan ko pedang iran so kiyaagawa iran ko inged,
ago kena pen o ba so barokan iran i minitaban iran on,
ka miyakanggolalan ai ko kawanang a lima ngka ago so barokan ka
ago so pen so sindaw o paras ka, ka kagiya kiyababayaang ka siran.

4 Seka i Dato aken ago Tohan ko
a aya dii kodarat sa kapepakataban
o manga mbawataan o Yakob.

5 Nggolalan reka na ipendendeg ami so manga sorangang ami;
na nggolalan ko Ingaran ka na pelomegen ami so kirirido rekami.

6 Kena a ba so pana aken i sasarigan ko,
aya pen o ba so pedang aken i pepekasabet raken,
7 Ka miyasabet kami ngka ko manga ridoay ami,
ago piyakakeya a ka so kikagogowad rekami.
8 So Tohan i ipepangandag ami ko mababasa alongan,
na podin ami so Ingaran ka sa taman sa pakataman.

9 Ogaid na imanto na inibowang ago piyakidiyamanan kami ngka;
gominek ka den monot ko manga sondaro ami.

10 Piyakipanaloba kami ngka ko manga ridoay ami,
na pitebanan kami o kikagogowad rekami.

11 Piyakipanombali kami ngka a datar o manga bilibili
na iniparak kami ngka ko salakaw a manga nasiyon.

12 Pipesa ngka so manga pagtaw ngka ko maito a arga,
na da a ba ngka miyalaba ko kiyapesaa ngka kiran.

13 Biyaloy kami ngka a dii mapagongatongat sii ko manga siringan ami,
na di kami dii sodiin ago dii kela o manga taw ko melilibeta rekami.

14 Biyaloy kami ngka a kasablawan o manga nasiyon;
na di kami dii ipangelengkeleng o manga taw.

15 Mababasa alongan a kabebelengi aken ko kapakadadapanas aken,
na pepekakapal a paras aken sa kaya

16 Sii ko kapekenega ko ko kapepagongatongata ago kapepamagitoitoa raken o manga
taw
ago sabap ko ridoay a mananamar sa kasaopi niyan raken.

17 Langon den rekami ai miyanggoloala
apiya pen da ami seka den pakalipati,
aya pen o ba ami miyasogok so kapasadan ka.

18 Da den makelid so manga poso ami
aya pen o ba makasilay so manga ai ami ko lalan ka.

19 Apiya pen oto na siyasa kami ngka ko darpa o manga iila a binatang,
na inikolob ka rekami so along o kapatay.

20 O piyakalipati ami so Ingaran o Tohan ami
o di na initapenay ami so manga lima mi ko salakaw a tohan

21 Na ba ini da mapariksa o Tohan
a aya matao ko migagaib ko poso o taw?

22 Ogaid na sabap reka a kapepamonoa rekami sa mababasa alongan;
ibibilang kami a datar o manga bilibili a penombaliin.

23 Pagnaw ka, hey Kadnan. Ino ka baden pakatotrog?
Oyati ngka a ginawa ngka. Di kami ngka bobowangen sa taman sa pakataman.

24 Ino ngka pageenaa a paras ka
ago pakalilipatan ka so kaperasaya rekami ago kapakamboboko ami?

25 Minisomek kami ko bayanek;
makakekelit ko lopa so manga badan ami.
26 Mbowat ka na tabangi kami ngka.
Sabeta kami ngka sabap ko da a ikeda iyan a gagaw ngka.

SABOR 45

Bayok ko Kakewing o Dato

Pesolapay so poso aken sa manga pipiya a katero
sii sangkai a kapetontola ko ko bayok aken makapantag ko dato;
so dila aken na lagid o pansom o mapasang a panonorat.

2 Seka i lebi a mataid a mama ko manga manosiya,
na pegondas so limo ko manga modul ka,
ka rarakmatan ka o Tohan sa taman sa pakataman.

3 Takipen ka so pedang ka, hey mabager a dato;
mala ka i menang ago pangkatan.

4 Sii ko kala a ka i pangkatan na koda ka a pepekadaag
sa kipenindegen ka ko tito a benar ago so kapangalimbabaan ago so kaontol;
makanggolaola so kawanan a lima ngka sa piyakalekelek a manga galebek.

5 Mibaseg so manga gagarang a gasa a ka ko poso o manga ridoay o dato.
Maoteng so manga nasiyon ko danga a ka.

6 So ndatoan ka, hey Tohan, na ketatap sa taman sa pakataman;
so katito na aya lilit a ipendato o ka;

7 Pekebabayaan ka so kaontol na ipekegowad ka so kamarataan;
sabap roo na so Tohan, a aya ngka Tohan,
na kiyasalawatan ka niyan sa lana a kapipiya a ginawa
a milalawan ka ko ped a manga dato.

8 Mamot so langon a nditaren ka sa manga ikekamotan a mira ago alos ago kasiya;
sii ko manga torogan a pipendaraan sa marpil
na pekeliang ka on o boniboniyon a ipepengotiyapi.

9 Aden a manga wata a babay o manga dato a ped ko pagaadatan a manga babay ko
torogan ka;
na tomitindog sa kawanan ka so bai a pipendaraan sa manga imbolawananan a poon sa
Opir.

10 Pamakineg ka, hey pengaromaan o dato;
tagoa ngka sa ginawa ago pakinega ngka ini:
Pakalipati ngka so manga taw ngka ago so pamiliya o ama a ka.

11 Mababarayat so dato ko kataid ka;
sodiyodi ngka, ka sekaniyan i kadnan ka.

12 So manga taw sa Tiro na pekaoma a magowit reka sa pamemegayan;
so lebi a manga kawasa ko manga taw na penamaran iran so kikalimoon ka kiran.

13 Sayana a mataid so potri a sisii ko lamin iyan;
so kimon iyan na inaol a bolawan.

14 Ndiditar sekaniyan sa piyamordaan sii ko kapegagaka on ko dato
a totondogen sekaniyan o manga raga niyan
a pegowiten siran pen ko dato.

15 Pegagaken siran on a kikabebahaya ago kikapipiya a ginawa iran
ko kasoled iran ko torogan o dato.

16 So manga wata a ka a manga mama, hey dato,
na pemakatondog ko manga apo o ka a makapendato;
mbalowin ka siran a manga olowan ko mbalabala ko doniya.

17 Pekipananademan ko so Ingaran ka ko langon a kaepamagapidapid o masa;
kagiya ka maoto na podin ka o manga nasiyon sa taman sa pakataman.

SABOR 46

Sisii Rektano so Allah

So Tohan na aya tano lindonga ago bager,
a lalayon makatitiyagar manabang ko masa a kasasamok.

2 Kagiya ka maoto na di tano malek apiya o miiseg so doniya
ago mamangidaropar so manga palaw ko posed a ragat,

3 Apiya pen o pendagedeb ago pendidi so manga ig on
a mitabeker ko manga palaw so di niyan dii kambegel.

4 Aden a lawasaig a so manga baogan iyan na ipekebabaya o siti o Tohan
a so den so soti a kakadenan o Lebi a Maporo.

5 Ndodoo so Tohan ko soled iyan; di ini kebinasa;
tebangan ai o Tohan sii ko sobo.

6 Dii nggorigaw so manga nasiyon; pepanga ooteng so manga ndatoan;
pekigorong o Tohan so sowara niyan na peketonag so doniya.

7 Sisii rektano so Allah a Lebi a Mamaapaar;
so Tohan o Yakob i maporo a lindonga tano.

8 Song kano sii na go niyo mbentayi so manga galebek o Allah;
ilaya niyo so piyakamemesa a manga pinggolaola niyan sa doniya.

9 Ipetepelek iyan so manga katidawa ko dalem o doniya;
pepamotolen iyan so manga pana ago pepenepeden iyan so manga bangkaw,
na pepenotongen iyan pen ko apoy so manga karo sa katidawa.

10 "Rerenek kano baden ago kilalaa niyo a saken so Tohan;
mapeselasela ako sii ko manga nasiyon;
mapeselasela ako ko doniya."

11 Sisii rektano so Allah a Lebi a Mamaapaar;
so Tohan o Yakob i maporo a lindonga tano.

SABOR 47

So Lebi a Maporo a Dato

Ndaopay kano langon a manga bangsa.

Pameseg kano ko Tohan a dii melalalis sa kapekebabaya.

2 Ka sayana a piyakalekelek so Allah a Lebi a Maporo,
a aya kababantogan a Dato ko dalem a doniya.

3 Piyakidaag iyan rektano so manga nasiyon,
ago piyakidapoan iyan rektano so manga taw.

4 Inipamili tano niyan sa makewali tano a inged
a dii mipangandag o manga mbawataan o Yakob a pakatatayaan iyan.

5 Miyamik so Tohan ko korsi iyan a sasartaan o kapepameseg sa kapekebabaya;
miyanik so Allah a sasartaan o oni o manga bogiyong.

6 Didawa niyo a manga podi so Tohan, didawa niyo a podi.
Didawa niyo a manga podi so Dato tano, didawa niyo a podi.

7 Ka so Tohan na aya Dato ko dalem o doniya;
didawa niyo a manga idadida.

8 Ndadato so Tohan ko manga nasiyon;
moontod so Tohan ko soti a korsi iyan.

9 Dii timotimo so manga olowan o manga nasiyon,
a so manga pagtaw o Tohan o Ibrahim.
Ka rek o Tohan so manga dato ko doniya;
tanto sekaniyan a mipapangkat.

SABOR 48

Giya Siyon a Siti o Tohan

Mala so Allah a lebi a mapapatot a pepodin
roo ko siti o Tohan tano a so soti a palaw niyan.

2 Mapiya ini i paras ko kipoporo iyan,
a so ipekebabaya o dalem a doniya.

Giyanan so Palaw a Siyon a matatampar sa pagotaraan,
a so siti o kababantogan a Dato.

3 Ndadon so Tohan ko manga torogan iyan,
na piyakiilay niyan a sekaniyan den i kota on.

4 Ka mitimotimo so manga dato
na miyamanondol ko siti a maiisaisa siran.

5 Ogaid na kagiya mailay iran na miyabengang siran den,
na miyamalagoy siran nggagaan a miyanga aalek.

6 Kiyapetan siran roo a tabeker ago masakit a datar o pembaliliten a babay.

7 Na bininasa ngka siran a lagid o manga kapal sii sa Tarsis
a piroropet o sobosobo a poon sa sebangan.

8 So miyaneg ami gowani na miyailay ami den imanto
sii ko siti o Allah a Lebi a Mamaapaar,
a so siti o Tohan tano:
pepakambekenen ai o Tohan sa taman sa pakataman.

9 Sii ko soled o Timplo ngka, hey Tohan ami,
na pepamasaken ami so da a ikeda iyan a gagaw ngka.

10 Datar o Ingaran ka, hey Tohan ami,
a lomalangkap so kapepodiya reka taman ko pirowarowangan o doniya.
mapepeno a kaontol so kawananan a lima ngka.

11 Mabebebaya so Palaw a Siyon,
na mapipiya a ginawa o kipagiinged sa Yodah
sabap ko manga kokoman ka.

12 Pagenebenebi niyo a Siyon na alibeta niyo;
bilanga niyo so manga lantawa iyan;

13 Pagamasamasa niyo so manga kota iyan
ago inengkaa niyo so manga torogan on
kaan iyo mapanotol ko pekasalono a manga taw.

14 Ka giyangkai a Tohan na aya tano Tohan sa taman sa pakataman;
sekaniyan i makapenggonanao rektano taman den sa kaposan.

SABOR 49

Kalalalongan so Kasarigi ko Kakawasaan

Pamakinega niyo ai, hey langon a manga taw.
Pamakineg kano langon a kibabaling sa doniya,

2 Ndatar so mababa ago so maporo,
ago so pen so kawasa ago so miskin.

3 Petero so ngari aken sa ongangen;
so dii pemasaken o poso aken na pepekabegay sa kapakasabot.

4 Pemimikiranen aken so isa a pananaroon,
na pemaanaan ko so pasoalan aken a sarta o boniboniyen a kotiyapi.

5 Ino ako pen kelek sii ko manga gawii a kasiksaan
igira a kalilikopan ako o manga rarata a pepamanatro raken,

6 A so siran oto a somasarig ko kakawasaan iran
ago ipepangandag iran pen so kala o tamok iran?

7 Di den keaon o taw so niyawa niyan
aya pen o ba niyan mapamasa ko Tohan,

8 Ka tanto a mala i arga so kiaon ko niyawa o taw,
na da den a kibayad iyan on a ba pekatatop

9 Kaan sekaniyan makapaginetaw sa taman sa pakataman
a di niyan den keokitan so kakeredak iyan.

10 Pekeilay o langon a taw a apiya so manga oongangen na pepematay,
ago so pen so manga lalong ago manga boda na palaya siran den pepanga dadadas,
na pekeganatan iran so kakawasaan iran ko ped a manga taw.

11 Apiya pen oto na aya mapipikir iran na ketatap so kebabadan kiran,
ago kemboway so kikakadenan iran ko langon a kapepamagapidapid o masa;
na ipesengay iran ko manga ngaran iran so manga lopa iran.

12 Ogaid na apiya i kala pen o kakawasaan o taw na di sekaniyan den kemboway ka datar o manga binatang a pepanga dadadas.

13 Giyai i bagian o siran oto a somasarig sa ginawa iran ago so pekasalono kiran a manga taw a terima ko manga katero iran.

14 Datar o manga bilibili a pepekaantap siran ko darpa o miyamatay, na aya pekatagikor kiran na so kapatay.

So manga titito na makapendato kiran ko kapipita, na keredak bo so manga badan iran sii ko kobor a maaawat ko manga torogan iran.

15 Ogaid na pagaonen o Tohan so niyawa ko ko kapaar o kobor ka terimaan ako niyan.

16 Di ngka pegawiden a akal igira a miyakatamok so ped, igira a miyakala den so kakawasaan o walay niyan,

17 Ka da den a mipetelon iyan on amay ka matay; di rekaniyan pekaonot ko kobor so kakawasaan iyan.

18 Apiya pen gowani ko oyagoyag sekaniyan na ibibilang iyan a ginawa niyan a ririskiyan ago pembantogen sekaniyan o manga taw ko kapiya niyan i bobolos

19 Na kitapi bo ko langon o manga apo iyan a di iran den keilay so kaliwanag.

20 So tao a aden a kakawasaan iyan a da a sabot iyan na datar o manga binatang a pepanga dadadas.

SABOR 50

So Tito a Kasimba

So Allah a Lebi a Mamaapaar a Tohan na dii tero, ka petewagen iyan so doniya poon ko pesebangan o alongan na taman ko pesedepan iyan.

2 Sii sa Siyon a madidiyangka i kataid na pesigay ron so Tohan.

3 Pepekatalingoma so Tohan tano, na di sekaniyan merenek; aden a apoy a komakarab sii ko onaan iyan, ago lilibeten sekaniyan o tanto a mabager a barabarat.

4 Petewagen iyan so manga langit sa poro ago giya doniya sa kaseksia iran ko kakokoma niyan ko manga pagtaw niyan:

5 Tig iyan a "Timotimo kano raken, hey manga kaom aken a miyakipesadanowa raken a nggolalan ko kakorban."

6 Na pepakalangkapien o manga langit so kaontol o Tohan, ka sekaniyan den i pangongokom.

7 "Pamakineg kano, hey manga pagtaw aken, ka petero ako; peseksi ako ko karata iyo, hey manga Israil:

saken den so Tohan a aya niyo Tohan.

8 Kena a ba sabap ko manga korban iyo a kapembongeti aken rekano aya pen o ba so pepanotongen a soasoat a lalayon iyo raken ipesepaat.

9 Ogaid na kena a ba raken mala i kipantag so mama a sapi a poon ko kodal iyo aya pen o ba so manga kambing a poon ko manga talon iyo,

10 Ka so oman i binatang sa kalasan na rek aken, ago so pen so manga pangangayamen ko nggibonggibo a manga bobongan.

11 Katawan aken so oman i papanok ko kapalawan, na go rek aken so langon a baraniyawa ko kalopaan.

12 Opama ka pekeor ako na di aken rekano peteroon, ka rek aken so doniya ago so langon taman a matatago on.

13 Ba ako ken ko sapo o manga sapi a mama o di na maginom ko rogo o manga kambing?

14 Began iyo baden ko Tohan so panalamat a aya di niyo ron den dii soasoat, na tomanen iyo so manga samaya iyo ko Lebi a Maporo.

15 Na talowi ako niyo ko gawii a kasasamok ka penabangan ko sekano, na mbentogen ako niyo."

16 Ogaid na so manga rarata na pitero on o Tohan a:

"Antonaa i kipantag reka o kapetontola ngka ko manga taritib aken, aya pen o ba so kapembandinga ngka ko kapasadan aken?"

17 Ka ipekegowad ka so kapeginsarati aken reka na go ipelebad ka sa likod so manga katero aken.

18 Di ka dii makipelayok ko oman i tekew a pekeilay ngka, na petepi ka ko manga pasisina.

19 Pegosaren ka so ngari i ka ko marata, na go so dila a ka na ipapaar o kapamokeg.

20 Lalayon ka dii tero sa misosopak ko pagari ngka; pepemagantaan ka so wata a mama o ina a ka.

21 Giyanan den i miyanggolaola ngka, na romerenek ako baden; sabap san na aya pipikiren ka na datar ako ngka.

Ogaid na imanto na pembongetan aken seka ago pakipembalogo aken reka so manga sala a ka.

22 "Tanodi niyo ai, sekano a pepakalipatan iyan so Tohan.

ka o di, na pemekangen aken sekano sa da den a ba rekano pekalidas.

23 Saden sa pembegay raken sa panalamat a aya di niyan raken den dii soasoat na pekebantog ako niyan,

na saden sa ontol so kapepaginetaw niyan na pekiilay aken on so kapepanabet o Tohan."

SABOR 51

Pangni sa Rila

Kalimoon ako ngka, hey Tohan ko sabap ko da a ikeda iyan a gagaw ngka, Sabap ko kala a ka i kapedi na papasa ngka so manga sala aken.

2 Onabi ako ngka piyapiya ko langon o kadostaan aken,

ago lompiyowa ko ngka pen ko dosa ko.

3 Ka katawan aken so manga sala aken,
na tatap a kabebelengi aken ko dosa ko.

4 Seka, a seka bo, i kiyandosaa ko,
ka miyakanggolaola ko sa marata sii ko hadapan ka.
Sabap san na benar ka ko kiyakokoma ngka raken,
ago maontol ka ko kiyasalaa ngka raken.

5 Matamataan a inimbawata ako a madodosa,
ka makapendosa ako ipoon ko kinikarimbiten raken o ina aken.

6 Ogaid na aya kabaya a ka na so tito a benar a madadalem raken;
kagiya ka maoto na pakisaboti ngka ko poso aken so ongangen.

7 Pangimoi ako ngka sa hisop, ka kelompiyo ako;
onabi ako ngka, ka pekapoti ako a lawan pen ko giyaw.

8 Pakinegen ka raken so oni o kasosonor ago kapipiya a ginawa
kaan mabebaya so manga tolan aken a siyasa a ka.

9 Di ngka pagilaya so manga dosa ko,
na ponasa ngka so langon a kadostaan aken.

10 Adeni ako ngka sa soti a poso, hey Tohan ko,
na dalemi ako ngka sa bago ago tomitikna a niyat.

11 Di ako ngka mbowangen ko kamamasaan ka
aya pen o ba ngka raken kowaa so Soti a Roh ka.

12 Pakaasala ngka raken so kapipiya a ginawa a pekisabap ko kapepanabet ka,
na begi ako ngka sa mateterang a niyat a makatokod raken.

13 Amay ka magiyoto na ipemangendao aken ko dii mamakasela so manga okitokit ka,
na penanangoran reka peroman so manga baradosa.

14 Pakalidasa ko ngka ko kapakapemono, hey Tohan ko,
a so Tohan a pesebet raken,
ka ipagidaida o dila aken so kaontol ka.

15 Hey Kadnan, bengata ngka so modul aken,
ka pekalangkapen o ngari aken so manga podi ngka.

16 Di ka kebaya ko manga korban,
ka o giyanan na witan ko seka on;
na di ka kesoat ko manga ipeseapat a pepanotongen.

17 So soasoat a terimaan o Tohan na so maroropet a niyawa;
so masosoni ago tetaobat a poso, hey Tohan ko, na di ngka pesodiin.

18 Sabap ko limo o ka na piyapiyai ngka a Siyon;
bangona ngka peroman so manga kota a Yarosalim.

19 Amay ka magiyanan na peladen reka so wadib a manga korban,
ago so tarotop a manga korban a penotongen a ikesoat ka;
samaoto na isepaat reka so manga mama a sapi sii ko aparana ka.

SABOR 52

So Daneg ago so Limo o Tohan

Ino ka dii tekabor makapantag ko kamarataan,
hey mabager a mama a piyakayaya ko Allah?

Mababasa alongan a

2 Kakekadiyat ka sa kabinasaan;

so dila a ka na lagid o magarang a gelat,

hey seka a dii manipo.

3 Pekebabayaan ka so marata a di so mapiya,

na tomoon ka so kapamokeg a di so katero sa benar.

4 Pekebabayaan ka so oman i pekabinasa a katero,

hey dila a pepanaliba!

5 Sabap sii na pepaden ka o Tohan ko da a kaposan iyan a kabinasaan;

kepetan ka niyan ka ngganderen ka niyan a poon ko babalingan ka,

na mbadoten ka niyan pen ko inged o kikaoooyag.

6 So manga oontol na keilay iran ai ago penga aalek;

ipekela iran sekaniyan a tig iran a

7 "Ilaya niyo, ka kaoto so mama

a da niyan den baloya so Tohan a aya niyan lindonga,

ka ba niyan den siyarigi so kitataralo o tamok iyan

ago piyakabager iyan a ginawa niyan ko kapembinasaa niyan ko manga ped."

8 Ogaid na so saken on peman na datar ako o kayo a olibi

a pepekarimpoong ko Walay o Tohan.

Sasarigan ko so da a ikeda iyan a gagaw o Tohan sa taman sa pakataman.

9 Penalamatan ko seka lalayon, hey Tohan, sabap ko miyanggolaola ngka;

na sii ako maginam ko Ingaran ka, ka mapiya nan

na podin ko seka sii ko kamamasaan o manga kaom ka.

SABOR 53

So Kalalalongan ago Kamarataan o Manosiya

So lalong na aya igegegi o pamikiran iyan na

"Da a ba Tohan."

Miyamakatarata so langon a taw, na minggolaola siran sa piyakasingay a kadostaan;

da den a ba dii nggolaola sa mapiya.

2 Sii sa kasorgaan na totolongan o Tohan so manga manosiya

ka pegilain iyan o ba aden a somasabot kiran a dii mbabanog ko Tohan.

3 Ogaid na miyamakasilay siran langon;

palaya siran den melagilagid a manga resesik i poso;

da den a ba kiran dii nggolaola sa mapiya, apiya sakataw bo.

4 "Ba da a katao angkai a dii mbabaradosa," a tig o Tohan,

"a pepelalamed ko manga pagtaw aken a datar siran on o pekan sa paan ago di iran pen telowan so Tohan?"

5 Roo siran den tanto a penga aalek a so kalek a da a lagid iyan gowani.
Ka ikeyamber o Tohan so manga tolan o siran oto a nggobat ko manga pagtaw niyan; makapekeya siran, ka tiyalikodan siran o Tohan.

6 O ba bo pekapoon sa Siyon so kakesabet o Israil.
Amay ka pekaasalen o Tohan so kamapiyaan o manga pagtaw niyan, na kebebaya so Yakob, ago kesonor a Israil.

SABOR 54

Pangni sa Kalilinding ko manga Ridoay

Sabeten ka raken so Ingaran ka, hey Tohan ko;
panindegen ako ngka a nggolalan ko gees ka.
2 Hey Tohan ko, tagoa ngka sa ginawa so pangni aken;
pamakinega ngka so manga katero o ngari aken.

3 Riridoon ako o manga rait;
pepanamaran o masopiit a manga taw so niyawa ko,
a di iran itatapian so Tohan.

4 Matamataan den a so Tohan i lomilinding raken;
so Kadnan na aya tomotokod ko niyawa ko;
5 Imbadal iyan so marata ko manga ridoay aken.
Sii ko kasasarigi reka na binasaa ngka siran.

6 Pegiklas ako reka somapaat sa korban;
podin ko so Ingaran ka, ya Allah, ka mapiya nan.
7 Ka piyanabangan ako ngka ko langon a awid a akal aken,
na miyailay o manga mata ko so kiyatabana ko manga ridoay aken.

SABOR 55

Pangni o Taw a Tinipo o Ginawai niyan

Pamakinega ngka so pangni aken, hey Tohan ko,
di ngka pendarainonen so kapepangampedian aken;
2 Pakinega ko ngka na go ngka ampona.
Ikekarata a ginawa ko so manga pamikiran aken,
na ikasososa aken
3 So kapelalalis o manga ridoay aken
ago so kapepamagita o manga rarata a taw;
ka ipetena iran raken so karomasayan,
na ipesetro iran raken pen so rarangit iran.

4 Tanto raken a pekikiyab so poso aken,
na tomiyana raken so manga kalek ko kapatay.

5 Riyaot ako a kawan ago tabeker,
na tanto ako den a kiyaalapan.

6 Na pitero aken "O ba bo aden a manga papak aken a lagid o marapatik.
Ka pekalayog ako roo ago pekadeke,

7 Oway, pakapelagoy ako sa mawatan
na sii ako den pekabaling ko mitataog a kaden.

8 Pekalindong ako ron nggagaan
a maawat ako ko mabager a ndo ago sobosobo."

9 Liboga ngka, hey Kadnan, so manga rarata a taw;
limpanga ngka so bitiyara iran,

ka pekeilay aken so kapanganiyaya ago kambobono sii ko siti.

10 Gagawii daondaw na pepegenebeneban iran so melilibeta ko pangeleban iyan,
na misosoled on so kasasamok ago kararata a ginawa.

11 Ndodon pen so kabinasaan,
na so kapamagita ago kapamokeg na di den keda ko manga lalan on.

12 Kena a ba ridoay a pepamagitowito raken;
o giyanan na ketiger aken den;
kena a ba so pekegowad raken a pepangimporoan raken,
ka o giyanan na kapetapokan aken sekaniyan.

13 Kena ini, ka seka den, a so mama a datar aken,
a ped aken ago tito a ginawai,

14 A mamis gowani a di ta dii kapakambitiyarai
sii ko di ta dii kandalakaw a ped o madakel a taw, sii ko Walay o Tohan.

15 Mitekaw a kakowaa o kapatay ko manga ridoay aken;
manga oolog siran a oyagoyag pen ko darpa o miyamatay,
ka sii kiran komakaden so kamarataan.

16 So saken on peman na pepananalowan ko so Tohan,
na pesebeten ako o Allah.

17 Kagabi, kapita ago kaoto a alongan
na pepangangarapan ako ago penggoraok sa matanog,
na pekeneg iyan so lagam aken.

18 Pepanabangan ako niyan a da ako kasakiti ko siran oto a penggobat raken
apiya pen madakel a somosorang raken.

19 So Tohan a ndadato sa taman sa pakataman
na keneg iyan siran ago siksaan,
a so manga mama a di iran den kealin so manga olaola iran
ago da a kalek iran ko Tohan.

20 So ped aken gowani na piyamabaan iyan so manga ginawai niyan;
biyaroba niyan so kapasadan iyan.

21 So manga bitiyara o ngari iyan na matilak a di so mimbatik a gatas,
ogaid na kapakiperidoay a madadalem ko poso iyan;
so manga katero iyan na malemek a di so lana,
ogaid na matataan ai a manga pedang.

22 Sanaan ka ko Allah so manga awid a akal ka
ka petokoden ka niyan;
di niyan den pekioteng so manga oontol.

23 Ogaid na seka, hey Tohan, na pagologen ka so manga rarata
ko galebo a kabinasaan.

So manga talibono ago so dii mamagakal
na di iran kelookan maginetaw so manga omor iran.
Ogaid na so saken on peman na sasaringan ko seka.

SABOR 56

Kapangangarapan a Sarig ko Tohan

Kalimoon ako ngka, hey Tohan ko,
ka pananamaran ako somatro o manga taw;
gawii gawii den na penggobaten ako iran sebenar.

2 Mababasa alongan na peselobaan ako o manga ridoay aken;
sayana a madakel a di raken dii makitidawa ko kapepangimporoan iran.

3 Igira a pekelek ako na sii ako reka peserig.

4 So Tohan, a pepodin ko so katero iyan,
so Tohan i sasaringan ko; di ako kelek.

Antonaa i mapenggolaola raken o matag manosiya?

5 Mababasa alongan na pembibiden iran so manga katero aken;
lalayon ako iran kekadiyatan sa marata.

6 Pepagopakat siran ago magaayan
a totoliken iran so oman i kapelakad aken
a iinamen iran a kabonoo iran raken.

7 Di ngka siran den pelepasa domaneg sa apiya antonaa sabap;
sii ko rarangit ka, hey Tohan ko, na pepada ngka angkoto a manga taw.

8 Katawan ka so kapakamboboko aken;
tiyago o ka so manga lo aken ko katiya a ka;
ba ini langon da misorat ko rikord ka?

9 Sii ko gawii a kapenanalo aken sa tabang
na makapepepato so manga ridoay aken;
katawan aken ai, ka aampilan ako o Tohan.

10 So Tohan, a pepodin ko so katero iyan,
so Allah, a pepodin ko so katero iyan,

11 So Tohan i sasaringan ko; di ako kelek.

Antonaa i mapenggolaola raken o matag manosiya?

12 Disomala a mitoman aken so manga samaya aken reka, hey Tohan ko;

ipesoasoat aken reka so manga panalamat aken.

13 Ka inilidas ka so niyawa ko ko kapatay
ago so ai aken ko kakisosong iyan
kaan ako makalalakaw ko kamamasaan o Tohan
sii ko sindaw a pepekaliwanag ko kikaoooyag.

SABOR 57

Pangni sa Tabang

Kalimoon ako ngka, hey Tohan ko, kalimoon ako ngka,
ka sii reka pepagapas so niyawa ko.

Melindong ako ko along o manga papak ka
taman sa di maipos so pekabinasa a manga barabarat.

2 Pepananalo ako ko Tohan a Lebi a Maporo,
a so Tohan a ipetoman iyan so singanin iyan raken.

3 Roo sa kasorgaan na sogo sekaniyan ka sebeten ako niyan;
pakapekeyaan iyan so siran oto a sesebenar raken somatro.
Pekiilay raken o Tohan so limo iyan ago so kasasarigi rekaniyan.

4 Makaiiga ako ko look o manga arimaw a bobosabosaon,
a so manga mama a so manga ngipen iran na manga bangkaw ago manga gasa,
na so manga dila iran na manga gagarang a pedang.

5 Pakiilay ngka, hey Tohan, so pangkatan ka a maporo a di so manga langit.
Makalangkap so bantogan ka ko dalem o doniya.

6 Tomiyaan siran sa poket a kilitag ko ai aken;
mabebekong ako sa rata a ginawa.
Komiyalot siran sa galebo ko pagokitan aken,
ogaid na siran i miyangaoolog on.

7 Tetana so poso aken, hey Tohan ko, tetana so poso aken;
pegidaida ako ago pemboboniboniyan.

8 Pagnaw ka, hey ginawa ko!
Pagnaw kano, hey kotiyapi ago alpa!
Pokaon ko so sobo.

9 Penalamatan ko seka, hey Kadnan, sii ko manga nasiyon;
ndidaon ko seka sii ko madakel a taw.

10 Ka tanto a mala so gagaw ngka a somosoko ko manga langit,
na misasampay so kasasarigi reka ko manga gabon.

11 Pakiilay ngka, hey Tohan, so pangkatan ka a maporo a di so manga langit.
Makalangkap so bantogan ka ko dalem o doniya.

SABOR 58

Pangni sa Kadanega o Tohan ko manga Baradosa

Ba mataan a ipegording iyo so maontol, hey sekano a manga olowan?

Ba matito a kapekokoma niyo ko langon a taw?

2 Kena, ka ba kano baden kekadiyat sa di ontol sii ko manga poso iyo.
na ipepangarasi niyo so manga lima niyo sii ko doniya.

3 Pepamakasilay so manga rarata a taw taman den ko kaooyagoyag iran;
ipoon ko kinimbawataan kiran na pepanga dadadag siran a dii tetaro sa manga
kabokegan.

4 So bisa iran na lagid o bisa a nipay;

lagid siran o bengel a darpo a oolenen iyan so tangila niyan

5 A di niyan den pemakinegen so sowara o pepemotar sa nipay
apiya pen i kapasang iyan lomilang.

6 Peroropeta ngka, hey Tohan, so manga ngipen ko manga ngari iran;
pamadota ngka so manga panasek angkoto a manga arimaw.

7 Manga aada siran a datar o peketirak a ig.

Igira a pegiraten iran so manga pana iran na madepong so manga gasa iran.

8 Madatar siran o mangangalap a dii senaw ko kapepananap iyan,
ago lagid o rapas a wata a di niyan den keilay so alongan.

9 Sa di pen kakegedama o manga koden iyo ko kayaw o manga soroken a itagon,
apiya anda ko mailaw pen o di na gango, na imbayog o Tohan so manga rarata a taw.

10 Kebebaya so manga oontol amay ka mailay iran so kinisaopen kiran,
amay ka pagonaban iran so manga ai ran sii ko rogo o manga rarata.

11 Samaoto na mapetero o langon a taw a

"Matamataan a pembalasan so manga oontol;

matamataan a aden a Tohan a pepengokom ko doniya.

SABOR 59

Pangni sa Kalilinding

Sabeta ko ngka ko manga ridoay aken, hey Tohan ko;
lindinga ko ngka ko siran oto a pesondol raken.

2 Sabeta ko ngka sangkoto a dii mbabaradosa,
na pakalidasa ko ngka ko manga talibono.

3 Ilaya ngka, ka pepegayanan iran so niyawa ko.

So manga rarangit a mama na pepagopakatan ako iran sa marata
a kena a ba sabap ko sala aken o di na dosa ko, ya Allah,

4 Apiya pen da a pinggolaola ko a ribat na matitiyagar siran raken gomabat.

Mbowat ka sa kapagogopi ngka raken; ilaya ngka so masosowa aken.

5 Seka, ya Allah, i Lebi a Mamaapaar a Tohan, a so Tohan o Israil.

Pagnaw ka sa kadanega ngka ko langon a nasiyon;

di ngka kepediin so sakataw bo ko manga rarata a makatipo.

6 Pkesoy siran igira a perimon a ngomengenger a lagid o manga aso,
na pepegenebeneb siran ko dalem o siti.

7 Ilaya ngka o antonaa i pekitope o manga ngari iran,
ka lagid o manga pedang so pepekapoona ko manga modol iran;
na aya pepamikiren iran na "Antawaa i pekaneg rekami?"

8 Ogaid na ba ngka siran baden dii kelaan, ya Allah;
pepegongatongaten ka angkoto langon a manga nasiyon.

9 Sasanaan ko so bager ka, ka seka, Tohan i lindonga aken,

10 A so Tohan a pekebabaya raken.

Magona raken so Tohan

ka pekiilay niyan raken so katebana ko manga ridoay aken.

11 Ogaid na di ngka siran pemonoa, hey Kadnan a kelong ami,
ka o ba baden kalipati o manga taw aken so pinggolaola iran.

Panawiringen ka siran baden a nggolalan ko kapaar ka
na go ngka siran pepada.

12 Sabap ko manga dosa o ngari iran ago so manga katero o modol iran
na militag kiran so kapepangimporoan iran.

Sabap ko manga sinta ago kabokegan a di iran dii mbasaan

13 Na polanga ngka siran sii ko rarangit ka;

lengana ngka siran taman sa da den a ba kiran malamba.

Oriyan iyan na ketokawan a ndadato so Tohan ko manga mbawataan o Yakob,
ago taman den ko pirowarowangan o doniya.

14 Pkesoy siran igira a perimon a ngomengenger a lagid o manga aso,
na pepegenebeneban iran so siti.

15 Pepagandawandaw siran a pepamanimol,
na nggoraok siran o di manga oosog.

16 Ogaid na saken peman na ipegidaida aken so bager ka;
sii ko kapipita na indidaw aken sa matanog so gagaw ngka.

Ka seka i lindonga aken

a aya ko pepegapasan ko masa a kareregeni raken.

17 Hey bager aken, ndidaon ko seka a podi;

seka, Tohan, i lindonga aken,

a so Tohan a pekebabaya raken.

SABOR 60

Pangni sa Kapakalidas

Inibowang kami ngka, hey Tohan ko,
ago siyasa kami ngka ko kiyarangiti reka;
na, asalen kami ngka bo imanto.

2 Miyakokog ka so doniya ago miyabengkag ka;
pakandemeta ngka so miyanga bebensi on, ka pekisasawiring ai.

3 Piyakaokit ka so manga pagtaw ngka ko kamaregenan;
piyakainom kami ngka sa arak a inikabereg ami.
4 Ogaid na piyakatindogan ka sa pandi so siran oto a maaleken reka
a kapegapasan iran igira a pesondolan siran o manga pamamana.
5 Sabeten ka rekami so kawananan a lima ngka;
ampona kami ngka
kaan kapanabangi so siran oto a pekebabayaan ka.

6 Mitero so Tohan sii ko Soti a Darpa iyan:
"Sii ko kakebebaya aken na pemaabaaden ko a Sikim
ago pembagibagiin aken a Balintad a Sokot.
7 Rek aken a Giliyad ago giya pen a Manasih;
giya Ipraim i linding o olo aken;
giya Yodah na aya ko lilit a ipendato.
8 Giya Mowab na aya ko pepangonaban;
ipagitog aken sa Idomiya so tinilas aken,
na sii sa Pilistiya na ipelalis aken on so kiyapakataban."

9 Antawaa i magowit raken roo ko kokotaan a siti?
Antawaa i ndolog raken taman sa Idomiya?
10 Ba kena a seka, hey Tohan, a miyowang rekami
ago di den magonot ko manga sondaro ami?
11 Ogopi kami ngka ko manga ridoay ami,
ka da a bali o tabang o manosiya.
12 Nggolalan ko Tohan na pekataban tano,
ka sekaniyan i melomeg ko manga ridoay tano.

SABOR 61

Pangni sa Kalinding

Hey Tohan ko, pamakinega ngka so kapenggoraok aken;
tagoa ngka sa ginawa so kapepangangaranan aken.
2 Poon ko titib o doniya na petelowan ko seka sii ko kapekikopay o poso aken.

Nggonanaowa ko ngka ko lakongan a maporo a di saken;
3 Ka seka i apasa aken
ago mabager a lantawa a miaawat aken ko ridoay.
4 O ba ako bo pekakaden ko barombarong ka sa taman sa pakataman
ago sii ako makapagapas ko atag o manga papak ka.
5 Ka miyaneg ka so manga samaya aken, hey Tohan ko,
inibegay ngka raken so kawali o siran oto a maaleken ko Ingaran ka.

6 Pakalendowa ngka so omor o dato;
mamboway sekaniyan ko kapepamagapidapid o manga ragon.
7 Makakorsi sekaniyan a dato sa taman sa pakataman sii ko hadapan o Tohan.
Pakipagipaten ka sekaniyan ko gagaw ngka ago so kasasarigi reka.

8 Samaoto na lalayon aken ndidaon a podi so Ingaran ka sii ko kipetomanen ko sa oman gawii ko manga samaya aken.

SABOR 62

Sarig ko Linding o Tohan

Sii bo ko Tohan so kapakalilintad o niyawa ko; sii rekaniyan pepekapoon so kapekesabet aken.

2 Sekaniyan bo i lakongan aken ago pepekasabet, a maporo a lindonga aken, na di ako tanto a kekaog.

3 Ay katey pen a kapesondoli niyo ko mama sa kitobaken iyo ron langon a lagid o miirag a pangeleban o di na peketongatonga a alad?

4 Aya bo a kekadiyaten iyo na giya kapepada niyo ron ko pangkatan iyan; ipekebabaya iyo so manga kabokegan.

Aya pekibengat ko manga ngari iyo na manga pipiya a katero, ogaid na di kano bo dii sinta sii ko manga poso iyo.

5 Hey niyawa ko, so bo so Tohan i pelobai ngka sa kapakalintad; sii rekaniyan pepekapoon so panginam aken.

6 Sekaniyan bo i lakongan aken ago pepekasabet raken, a maporo a lindonga aken, na di ako den kekaog.

7 Matitimo ko Tohan so kakesabet aken ago so pangkatan aken; so Tohan i mabager a lakongan aken ago apasa.

8 Sasarigi niyo sekaniyan, hey manga taw, ko langon a masa; sawai niyo ron so langon a mapapadalem ko poso iyo, ka so Tohan i apasa tano.

9 So da a bangsa niyan a manga manosiya na matag sepot, na so manga barabangensa a taw na matag baden kapamagomanta. Opama ka makaokit siran ko timbangan na da a kapened iran, ka palaya siran makep a di so sepot.

10 Di niyo serigi so kanggagasab aya pen o ba niyo inama a makalaba kano a nggolalan ko kapamanekekw. Apiya pen o mitaralo so kakawasaan iyo na di niyo ron pekaonota so poso iyo.

11 Satiman a miyatero o Tohan, na dow a miyakenal aken on a giyai: so kapaar na rek o Tohan,

12 Na rek ka pen, Kadnan, so gagaw; ka imbalas ka ko oman i isa so miyanggolaola niyan.

SABOR 63

Kadali ko Tohan

Hey Tohan, seka i Tohan ko;

pananamaran aken seka mbabanog;
ikaawaw ka o niyawa ko, na ikakadali ka o badan aken
a datar o sisii ako ko mamara ago komigaw a lopa a da a ig on.
2 Masingayo aken a kailaya ko reka sii ko soti a pesimbaan reka
kaan aken kabantayi so kabatowa a ka ago bantogan.
3 Kagiya tomo so gagaw ngka a di so kaoyagoyag
na podin ka o manga modul aken.
4 Penalamatan ko seka taman ko kaooyagoyag aken,
na imbayaw aken a manga lima ko ko kasimbaa ko reka.
5 Kesoat so niyawa ko a lagid o miyaosog ko manga lelembo a pangenengken,
na podin ka o ngari aken ko kapepegidaida o manga modul aken.

6 Sii ko igaan aken na pepenanademan ko seka;
rarasamen aken seka ko mababasa gawii.
7 Sabap sa seka i pepekatabang raken
na pepegidaida ako sa kapekebabaya sii ko along o manga papak ka.
8 Pananagontamanan aken seka;
totokoden ako o kawananan a lima ngka.
9 So siran oto a sesabentar ko niyawa ko na kebinasa;
pekapanog siran ko lebi a madalem ko doniya.
10 Kepalad siran ko kapemona kiran o pedang
na kapegedasan siran o manga iila a aso.

11 Ogaid na kebebaya so dato sii ko Tohan,
na so oman i isa a dii sepa sii ko Ingaran o Tohan na podin iran sekaniyan,
ogaid na pekakemedan so ngari o manga bokeg.

SABOR 64

Pangni sa Kalinding

Hey Tohan ko, pamakinega ngka so lagam aken sii ko kapepangangarapan aken.
Lindinga ngka so kaoyagoyag aken ko kapagiitai raken o manga ridoay.

2 Tapoken ako ngka ko kapepagopakati raken o manga rarata a taw
ago sii ko magogorigaw o dii mbabaradosa.
3 Penggarangen iran a lagid o manga pedang so manga dila iran,
na ipegantap iran so manga papait a katero iran a datar o manga gasa.
4 Ipepamana iran ko da a sala iyan a taw sii ko kapepanibowa iran;
kitekaw a kapenaa iran on sa da den a kalek iran.

5 Di siran dii mamagoyata sa kapakakediyat iran sa marata;
di iran dii mbibitiyaraiyan so kateana iran ko manga litag iran sa masolen
a tig iran a "Antawaa i pekainengka on?"
6 Pepamagantang siran sa di ontol, a tig iran a
"Miyakambaal tano sa tarotop a pekadorat."
Ka mataan den a baraakal so pamikiran ago so poso o taw.

7 Ogaid na penaan siran o Tohan;

sakadiyap den na penga papalian siran.

8 Keonay siran o manga dila iran,
na makapengelengkeleng so langon o pekailay kiran.

9 Samaoto na penga aalek so langon o manosiya;
mapetero iran a "Giyai na galebek o Tohan,"
na mapemikir iran so miyanggolaola niyan.

10 Kebabaya so manga oontol sii ko Allah
ago ron siran makapegapas.
Podin sekaniyan o langon a manga titito i poso.

SABOR 65

So Kapodi ago Kapanalamat

Mapapatot reka so manga podi, hey Tohan, sii sa Siyon;
itoman ami reka so manga samaya ami,

2 Hey seka a pepamagineg ko kapangangarapan.

Sii reka pengadap so langon a taw

3 Sabap ko manga dosa iran.

Dadaagen kami o manga sala ami
ogaid na pepapasen ka ini.

4 Rarakmatan so taw a piliin ka
a pekaobain ka a pekakaden ko lamalama ngka.

Penga sosoat kami ko manga pipiya a nganin ko walay ngka,
a so soti a Timplo ngka.

5 Pegamponen kami ngka a nggolalan ko manga piyakamemesa sii ko kaontol ka,
hey Tohan a pepekasabet rekami,
a aya sasanaan o manga taw ko pat a pidoro o doniya
ago roo ko manga wawatan a ragat.

6 Piyakambeken ka so manga palaw a nggolalan ko bager ka
ko kasesambitani reka sa gees.

7 Pepakalengeneng ka so kapendaleg o manga ragat
ago so kapendagedeb o manga begel iran
ago so pen so kapekegorigaw o manga nasiyon.

8 Siran oto a kibabaling sa mawatan na pepanga aalek ko piyakamemesa a manga nanao
ngka;
roo ko pesebangan ago so pesedepan o alongan
na pepakilalis ka kiran sa kapekebebaya.

9 Pekibiren ka so lopa ago pepakioranan ka;
pepakaodaren ka sa tanto a mala.
So manga baogan o Tohan na kikapepeno a ig
kaan kapagadili sa manga pereperan so lopa,
ka giyanan i miyatekdir ka.

10 Pembasaan ka piyapiya so manga dadowan
taman sa manga papantar so manga bakenal on;
pepakilemek ka ini ko oran

ago peparakmatan ka so manga pereti on.

11 Pesengkadan ka sa kamapiyaan so ragon,
na so manga lalan ka na miboborar on so mala a miyanga raragon.

12 So manga pangomaan na sisipilan a paotanotan;
so manga bobongan na ndiditar sa kasosonor.

13 So manga pananateba na mapepeno a manga talon,
na so pen so manga balintad na kasasapengan sa pereperan;
pepelalalis siran ago dii mamagidaida sa kapekebebaya iran.

SABOR 66

Dikir sa Podi ago Panalamat

Ogiyab kano sa kapekebebaya ko Tohan, hey dalem a doniya!

2 Pagidaidaan iyo so bantogan o Ingaran iyan;
bantoga niyo sekaniyan a dikir.

3 Teroa niyo ko Tohan a "Sayana a piyakamemesa so manga galebek ka.
Sabap ko kala a ka i gees

na pepekakipes so manga ridoay ngka ko hadapan ka.

4 So dalem o doniya na pepekasodiyod reka;
pepegidaida siran reka sa podi,
na pendidaon iran a podi so Ingaran ka."

5 Song kano sii na go niyo ilaya so miyanggolaola o Tohan;
sayana a piyakamemesa so manga galebek iyan sii ko manga manosiya.

6 Biyaloy niyan so ragat a mamara a lopa;
rinipag iran so lawasaig a pelalakaw siran on;
na, mabebaya tano sii rekaniyan!

7 Di niyan dii ndato so kapaar iyan sa taman sa pakataman;
pagaayanan o manga mata niyan so manga nasiyon,
da a somosopak a ba makapangimporoan rekaniyan.

8 Podiya niyo so Tohan tano, hey manga taw,
na pakinegen iyo so oni o kapepodiya niyo ron.

9 Pepegoyagen iyan so niyawa tano
ago di niyan peparon o ba midolas so manga ai tano.

10 Ka tipengan kami ngka, hey Tohan;
datar o kiyatoria ko pirak a siyoti kami ngka.

11 Piyakilitagan kami ngka ko poket;
piyakibawa ngka rekami so manga pepened a awid.

12 Piyakiliseg ka ko manga taw so manga olo ami;
miyakaokit kami ko apoy ago ig,
ogaid na piyakaliyo kami ngka on ko madaya a darpa.

13 Song ako ko Walay ngka a maawid sa isepaat aken a totongen;
itoman aken so manga samaya aken reka,

14 A so manga samaya a minibengat ko modul aken ago pitero o ngari aken

isako kareregenan ako.

15 Isepaat aken reka so kaolit a manga ayam a penotongen
a rakes o mamot a bel o manga bilibili;
pekorban ako sa manga sapi a mama ago manga kambing.

16 Song kano sii ago pamakineg, hey langon a maaleken ko Tohan,
ka penotolen ko rekano so miyanggolaola niyan raken.

17 Inipananalo aken rekaniyan so ngari aken,
na inipodi aken on so dila aken.

18 O aden a kadostaan a minigaib ko poso aken
na da ako den ai pamakinega o Kadnan.

19 Ogaid na matamataan a piyamakineg ako o Tohan
na tiyago iyan sa ginawa so kapepangangarapan aken.

20 Mapopodi so Tohan
a da niyan limbani so kapepangangarapan aken
aya pen o ba niyan raken panganogoni so gagaw niyan.

SABOR 67

Idaida sa Kapanalamat

Kalimoon kami ngka, hey Tohan, ago rakmati kami ngka,
pakaliwanaga ngka rekami so paras ka

2 Kaan katokawi so manga okitokit ka sii sa doniya
ago so kapepanabet ka sii ko langon a nasiyon.

3 Mapodi ka o madakel a taw, hey Tohan ko;
mapodi ka o langon a manga taw.

4 Mabebaya so manga nasiyon a makapagidaida siran sa kapipiya a ginawa,
ka so katito na aya ngka ipepangokom ko manga taw,
na di ngka dii nggonanaon so manga nasiyon sa doniya.

5 Mapodi ka o madakel a taw, hey Tohan ko;
mapodi ka o langon o manga taw.

6 Samaoto na pagodaren so lopa sa pereperan,
na so Tohan, a Tohan tano, na perakmatan tano niyan.

7 Perakmatan tano o Tohan,
na ikelek sekaniyan o pat a pidoro o doniya.

SABOR 68

So Dikir o Nasiyon ko Kapakataban

Makambowat so Tohan; mamangiparak so manga ridoay niyan;
makapemalagoy ko kamamasaan iyan so siran oto a pekegowad on.

2 Mabogaw ngka siran a lagid o bel a ipembayog a ndo.
Madadas so manga rarata a taw ko kamamasaan o Tohan
a datar o kapelanag o taro ko kayaw o apoy.

3 Ogaid na makapiya a ginawa o manga oontol
ago mamanga bebaya sii ko hadapan o Tohan;
makalangas siran ago mamanga sonor.

4 Pagidaidai niyo so Tohan, didawa niyo a podi so Ingaran iyan;
bantoga niyo sekaniyan a mageeda ko manga gabon,
so Allah i ngaran iyan,
na kabebaya kano baden ko hadapan iyan.

5 Ama o manga ilo ago abanga o manga balo;
giyanan so Tohan a ndodoo ko soti a kakadenan iyan.

6 Pepakabalingen o Tohan so kitatawantawan ko manga pamilya;
pepakaliyon iyan sa kapekapiya iran so kikakalaboson,
ogaid na so kisosopak na mapekabaling ko komekegaw a kalopaan.

7 Hey Tohan, isako pagolowanan ka so manga pagtaw ngka,
isako lomalakaw ka a miyokit ko disirto

8 Na lininog so doniya,
ago miyodod so manga langit sa oran
ko kamamasaan o Tohan, a Tohan sa Sinay,
ko kiyapakaoma o Tohan, a so Tohan o Israil.

9 Piyakaoran ka sa mabager, hey Tohan;
piyakalenggawan ka so minikopay a lopa a kawali ngka.

10 Miyaginged on so manga pagtaw ngka,
na sabap ko kapiya ngka, hey Tohan,
na piyageper ka so kikakokorangan kiran.

11 Inibegay o Kadnan so sogoan,
na tanto a madakel a miyakalangkap ko totol:

12 "So manga dato ago so manga sondaro iran na pepemalagoy siran nggagaan."
So manga babay a komakaden ko kampo na pimbagibagi iran so miyanga tataban

13 Apiya pen petelimbagak siran baden ko katatagoan ko manga kodal a
pangangayamen;

so manga papak a marapatik a kilalapisan sa pirak,
ago so manga tomapes iyan a pemangerap sa bolawan.

14 Isako pakambelabelagen o Tohan a Lebi a Mabager so manga dato sangkoto a inged
na liyontanaan a giyaw so Palaw a Salmon.

15 So palaw a Basan na mabager a palaw;
madakel i pontor so palaw a Basan.

16 Hey madakel i poro a manga palaw,
ino niyo tetentengi a pekesiig ko palaw a pinili o Tohan a kedenan iyan
a ron den mbaling so Allah sa taman sa pakataman?

17 Pipira den nggibo so manga karo o Tohan
ago nggibonggibo pen;

miyakapoon so Kadnan sa Sinay na somiyoled ko soti a darpa iyan.

18 Isako manik ka sa poro
na minitalon ka so madakel a miyanga bibiyag;
tomiyarima ka sa manga pamemegayan a ipapantag ko manosiya
a ped on pen so kikasosopak,
kaan seka, ya Allah a Tohan, na makakaden roo.

19 Mapopodi so Kadnan, a so Tohan a pepekasabet rektano,
a gawii gawii den a kapegawidi niyan ko manga awid a akal tano,

20 So Tohan tano i Tohan a pepekasabet,
na nggolalan ko Allah a Kadnan tano so kapekelidasi ko kapatay.

21 Matamataan a sesaan o Tohan so manga olo o manga ridoay niyan,
a so manga rarabong i bok a olo o siran oto a peteros ko di iran dii kasela.

22 Pitero o Kadnan a "Pekakasowin ko a poon sa Basan so manga ridoay niyo;
pekakasowin ko siran a poon ko didalem o ragat

23 Kaan iyo misombo so manga ai niyo ko rogo iran
ago an kapanimoli o manga aso niyo so bagian iran on."

24 Miyabinentay so parada ngka, hey Tohan,
a so dii kaperada o Tohan aken a aya ko Dato a pesoled ko soti a pesimbaan on.

25 Sii sa onaan so dii mamagidaida; sii sa oriyan so dii mboboniboniyan,
na pageeletan siran o manga raga a dii nggaringking.

26 "Podiya niyo so Tohan sii ko mala a kalilimod;
podiya niyo so Allah, hey langon iyo a kiyababadan ko Israil."

27 Ndodon so maito a mbatabataa a Baniyamin a pepangonaan kiran;
ndodon so sagorompong a manga olowan sa Yodah,
ago ndodon pen so manga olowan sa Sibolon ago Naptali.

28 Nggolalanan ka so kapaar ka, hey Tohan;
pakiilain ka so bager ka, hey Tohan,
a datar o miyanggolaola ngka rekami gowani.

29 Samaoto na pagowitan ka o manga dato sa manga pamemegayan
sabap ko Timplo ngka sii sa Yarosalim.

30 Mbongeti ngka a Misir a giyangkanaan a binatang sii ko manga otan ko kilid a
lawasaig;
ago so pen so manga nasiyon

a giyangkanaan a talon a manga todo a sapi a rakes o manga nati iran
taman sa di siran makapangalimbabaan a magowit reka sa manga pirak.

Paraken ka so manga nasiyon a mabebaya makitidawa.

31 So manga ambasadur na pekapoon sa Misir;
giya Itiyopiya na makipembayabaya nggagaan ko Tohan.

32 Pagidaidai niyo so Tohan, sekano a manga ndatoan sa doniya;
didawa niyo a manga podi so Kadnan

33 A so mageeda ko miyanga oona a manga langit.
Pamakineg kano, ka ipenggorong iyan so mala i gees a sowara niyan.

34 Papalada niyo ko Tohan so kapaar;
so bantogan iyan na sii sa poro o Israil
ago so kapaar iyan na sii ko manga langit.

35 Sayana ka a piyakalekelek, hey Tohan, sii ko soti a darpa a ka.
So Tohan o Israil i pembegay sa gees ago bager ko manga pagtaw niyan.

Podin so Tohan!

SABOR 69

Kagoraok sa Tabang

Sabeta ko ngka, hey Tohan ko,
ka miyataman den sa lig aken so manga ig.

2 Pekigaled ako den ko madalem a tonai
a da a ba on kepasigan.

Minibolog ako den ko madalem a ig,
na pesengkapen ako o manga bagiyaw.

3 Diyokawan ako den mananalo sa tabang;
kiyamaraan den a bakereng aken;
miyakalobay a manga mata ko
ko kapepagalatawi ko ko Tohan ko.

4 Siran oto a pekegowad raken sa da a sabap iyan
na lebi a madakel a di so manga bok sa olo aken;
manga babager so siran oto a mananamar raken minasa
a riridoon ako iran sa da a benar on.
Miyabaas ako iran sa kabayadi ko ko da aken panekewa.

5 Hey Tohan, seka i matao ko kalalalongan aken;
so manga sala aken na kena a ba reka mapageema.

6 Pengnin ko a so siran oto a mbabayorantang reka na di kayaan sabap raken,
ya Allah a Kadnan a Lebi a Mamaapaar.
Pengnin ko a so siran oto a mananagontaman reka na di makowa a diyaman sabap raken,
hey Tohan o Israil.

7 Ka sabap reka na di ako dii mapagongatongat,
na mipapanagop aken so kaya.

8 Lagid ako o salakaw a taw ko manga pagari aken,
ago lagid o rait ko manga wata a mama o ina aken;

9 Ka so kasigi ko Walay ngka na aya raken pepekapos,
na sii raken pepekatana so ipepenonongka o siran oto a pepenonongka reka.

10 Igira a ipepangalimbabaan aken a ginawa ko sa kapowasa
na aya raken ipepegompat o manga taw;

11 Na igira a di ako dii nditar sa sako
na di ako iran dii pekaradiyaanan.

12 Di ako dii mbabantaanan o siran oto a kioontod ko gimowa o siti
na go ipepegidaida ako o kikabebereg.

13 Ogaid na pepangangarapan ako reka baden, ya Allah.

Sii ko masa a ikesoat ka, hey Tohan,
na ampona ko ngka sabap ko kala a ka i gagaw
a nggolalan ko kasasarigan a kapepenabet ka.

14 Pokasa ko ngka ko tonai,
di ako ngka on pekagaleda;
sabeta ko ngka ko siran oto a pekegowad raken,
ago sii ko manga dadalem a ig.

15 Di ako ngka pekisangkapen ko bagiyaw,
ago di ako ngka pekilameden ko kadaleman
aya pen o ba ko ngka pakitamboni ko kobor.

16 Ampona ko ngka, ya Allah, ka mapiya bes so gagaw ngka;
sabap ko kala a ka i kapedi na dingili ako ngka.

17 Di ngka baden pegnaa a paras ka ko oripen ka,
ka masisiksa ako; ampona ko ngka nggagaan.

18 Obay ka raken na go ako ngka panabangi;
sabeta ko ngka ko manga ridoay aken.

19 Katawan ka den so di raken dii kapagongatongata, so kapepakayai ago kapepakaitoa
raken;

pekeilay ngka so langon o manga ridoay aken.

20 Inikaropet o poso aken so di raken dii kapagongatongata,
na tanto ako den a kapepenedan.

Ininam aken so kapedi, ogaid na da den,
ago so pemakarinarinaw sa ginawa ko, ogaid na da den a miyatoon aken.

21 Tiyagoan iran sa gamot so ken aken,
na soka a piyakiinom iran raken ko kaaawaw aken.

22 Mabaloy a litag so lamisaan a inenatan kiran,
mabaloy pen a misampirok kiran so ipekepiya a ginawa iran.

23 Kalibotengan so manga mata iran kaan siran di pekanono,
ago malalayon mabekong so manga likod iran.

24 Pakamborngata ngka kiran so gani ngka;
na pakatanaa ngka kiran so pesokeyaw a rarangit ka.

25 Kaawaan so kampo iran
a da den a ba pekakaden ko manga barombarong iran.

26 Ka pesetroon iran sekaniyan a siyogat ka,
na di iran dii tototolaan so kapekerasay o siran oto a piyamalian ka.

27 Danegen ka kiran so langon a sala iran,
na di ngka siran pakapembagiana ko kapenabet ka.

28 Maponas so manga ngaran iran ko ribro a kasosoratan ko kikaoooyag,
na di siran den mitapi ko listaan ko manga oontol.

29 Ogaid na mararasay ago makamboboko ako;
malinding ako o kapepenabet ka, hey Tohan ko.

30 Podin ko a idaida so Ingaran o Tohan

ago mbantogen aken sekaniyan sa kapanalamat.

31 Lebi ini a ikesoat o Allah a di so pekorbanen on a sapi

ago lebi pen a di so mama a sapi a aden a manga panga niyan ago kanoko.

32 So dii mamangalimbabaan na pekailay sii ago penga bebebaya;

sekano a dii mbabanog ko Allah, na pengnin ko a manga ooyag so manga poso iyo.

33 Ka pepakinegen o Allah so siran oto a pepakitabang,

na di niyan ipendarainon so manga pagtaw niyan a miyanga bibiyag.

34 Podiya niyo sekaniyan, hey manga langit ago so doniya,

taman ko manga ragat ago so langon o manga baraniyawa on.

35 Ka sebeten o Tohan a Siyon

ago mbengonen iyan peroman so manga siti sa Yodah.

Oriyan iyan na pekakaden roo so manga pagtaw niyan ka ketangan iran so inged;

36 So kebabadan ko manga oripen iyan na mapekewali ran ai,

na pekabaling roo so siran oto a pekebabaya ko Ingaran iyan.

SABOR 70

Pangni sa Tabang

Nggagaan ka, hey Tohan ko, sa kasabeta ngka raken.

Ya Allah, tabangi ako ngka nggagaan.

2 Makakeya ago makadapanas so siran oto a sesabenar ko niyawa ko.

Makapeto a kadidiyamanan so siran oto a kabaya iran a kamoralai raken.

3 Mamakapeto ko kiyayai kiran so siran oto a di iran raken dii teroon a

"Nari! Nari!"

4 Ogaid na makapiya bo a ginawa o langon a mananagontaman reka,

ago ikabebaya ka iran.

So siran oto a pekebabaya ko kapepanabet ka

na malalayon iran matero a "Mabantog so Tohan."

5 Ogaid na makapantag raken na malobay ako ago kadodowaanan;

song ka raken nggagaan, hey Tohan ko.

Seka i pepekitabang raken ago pepekasabet, ya Allah;

di ngka sendoden.

SABOR 71

Pangni o Pekelokes

Sii ako reka pepagapas, ya Allah;

di ako ngka den pakapekeyaa.

2 Sii ko kapagiinontolan ka na panabangi ako ngka ago pakalidasa ko ngka;

lekai ngka raken so tangila ngka na go ako ngka sabeta.

3 Pengnin ko a mabaloy ka a lakongan a apasa aken

a lalayon ako ron pepekasong.

Sogoon ka a kakesabet aken,

ka seka i lakongan ago kota aken.

4 Pokasa ko ngka, hey Tohan ko, ko lima o manga rarata,
a so lima o di maontol ago marangit a manga taw.

5 Ka seka bo i iinamen ko, ya Allah a Kadnan aken,
a aya ko sasarigan ipoon ko kangoda ko.

6 Sii ako reka romerenda inipoon ko kinimbawataan raken;
seka i lomiyotad raken ko tiyan o ina aken.
Podin ko seka lalayon.

7 Ipepememesa ako o madakel a taw,
ka seka i mabager a lindonga aken.

8 Mipepeno ko ngari aken so podi reka,
na pepayagen aken sa mababasa alongan so bantogan ka.

9 Di ako ngka mbowangen amay ka malokes ako;
di ako ngka pendarainonen amay ka mada so bager aken.

10 Ka mananamar raken mono so manga ridoay aken;
pepamagantaan ako iran ago pepagopakatan sa marata

11 A tig iran a "Inawaan sekaniyan den o Tohan:
na, salobaan tano ago dakepen,
ka da den a ba on makapenabang."

12 Hey Tohan, di ako ngka aawata;
tabangi ako ngka nggagaan, hey Tohan ko.

13 Makakeya ago mapolang so langon a penggobat raken;
katambonan a kayaan ago kaitoan so langon a sesebenar raken memarata.

14 Ogaid na so saken on peman na ketatap a kaiinam aken;
pegomanomanan ko so kapepodiya ko reka.

15 Peteroon o ngari aken so kapagiinontolan ka
ago so kapepanabet ka sa mababasa alongan
apiya pen di aken katawan i kala iyan.

16 Pekaoma ko sa kapenotola ko ko manga kabarakat ka, ya Allah a Kadnan aken,
ago so kapekalangkapa ko ko kaontol ka, a so bo so rek ka.

17 Ipoon ko kangoda ko, hey Tohan, na pepangendaon ako ngka,
na taman imanto na pepayagen aken so piyakamemesa a manga galebek ka.

18 Na apiya amay ka malokes ako ago makapoti so bok aken
na di ako ngka pagawai, hey Tohan,
taman sa di aken mapakalangkap so kabarakat ka ago so gees ka
ko langon a pekasalono a manga taw.

19 So kaontol ka, hey Tohan, na somosoko sa langit.
Minggolaola ka sa manga ala a galebek;
antawaa i datar ka, hey Tohan?

20 Apiya pen piyakaokit ako ngka sa madakel ago mapait a manga karomasayan
na pekaasalen ka so kaoyagoyag aken;

poon ko didalem o doniya na inggakap ako ngka on bo.

21 Pekaosoren ka so pangkatan aken
ago pekapiyaan ka bo peroman a ginawa ko.

22 Podin ko seka sii ko kapepangotiyapi sabap ko kasasarigi reka, hey Tohan ko.
Ndidaon ko seka a podi a sasartaan o boniboniyon a alpa, hey Soti a Tohan o Israil.

23 Pelalis sa kapekebebaya so manga modol aken sii ko kapendidawa ko reka,
a rakes on so dalem a ginawa ko a miyaaon ka.

24 So pen so dila aken na penotolen iyan so kaontrol ka sa mababasa alongan,
ka siran oto a miyanamar raken memarata
na miyakakeya ago miyakadapanas.

SABOR 72

Pangni pantag ko Dato

Began ka ko dato so manga kokoman ka, hey Tohan, ago so kaontrol ka
sii rekaniyan a inimbawata a dato

2 Kaan iyan kandatoy so manga pagtaw ngka sa kapaginontolan
ago so kitararasay kiran sa katito.

3 So manga palaw na magawid sa kalilintad ko manga taw
ago so pen so manga bobongan, a nggolalan ko kaontrol.

4 Ipenindog o dato so kabonar o manga miskin ko manga taw,
na sebeten iyan so manga wata o kikedodowaanan;
sesaan iyan so dii melolopit.

5 Ikelek sekaniyan o manga taw taman sa aden pen a alongan
ago taman sa aden a olan, sii ko langon a kapepamagapidapid o masa.

6 Kebaloy sekaniyan a lagid o oran a pepenga oolog ko dii mbabasokan,
ago datar o tarintik a pepekabasa ko lopa.

7 Pekarimpoong so manga oontrol sii ko masa niyan,
na kitaralo so kalilintad taman sa di mada so olan.

8 Pekalangkap so kandatoyan iyan poon ko isa a ragat na taman den ko sabala a ragat
ago poon ko lawasaig a Yopratis na taman den ko manga titib a doniya.

9 Pemanodiyod rekaniyan so manga bangsa a kibabaling ko disirto,
na so manga ridoay niyan na pemakadila ko bayanek.

10 So manga dato sa Tarsis taman ko manga polo ko ragat
na pemangowit rekaniyan sa bowis,
na so manga dato sa Arabiya ago giya Itiyopiya
na mbegay ron sa manga pamemegayan.

11 Pemanodiyod rekaniyan so langon o manga dato,
na pamanalagad on pen so langon o manga nasiyon.

12 Ka penabangan iyan so manga miskin a penggoraok rekaniyan
ago so pen so kikedodowaanan a da a ba kiran tebang.

13 Ipengalinggagaw niyan so manga lolobay ago so kikedodowaanan,
na sebeten iyan so kaoyagoyag o manga miskin.

14 Penabangan iyan siran ko kapekelopita ago kapekeaniyayaa kiran.
ka mala rekaniyan i gona so rogo iran.

15 Kemboway so dato,
na mbegan sekaniyan sa bolawan a poon sa Arabiya;
ipemangni sekaniyan lalayon o manga taw,
ago perakmatan mambo o Tohan ko mababasa alongan.

16 Kitaralo so pereperan ko dalem a inged;
pemangpipapipay ini ko poro o manga bobongan,
ago peteribonga pen a datar roo sa Libanon.
Pemakalombay so kipagiinged on a lagid o tanageb ko gilopa.

17 Ketatap so Ingaran o dato sa taman sa pakataman;
kitaros so bantogan iyan sa taman sa kaaaden pen o alongan.
Perakmatan so langon a nasiyon a nggolalan rekaniyan,
na mbetowan iran sekaniyan sa rarakmatan.

18 Podin so Allah a Tohan, a so Tohan o Israil.
Sekaniyan bo i dii nggolaola sa piyakamemesa a manga galebek.

19 Podin so kababantogan a Ingaran iyan sa taman sa pakataman.
Mapeno a bantogan iyan so dalem o doniya.
Amin ago Amin.

20 Giyai i kaposan o manga pangangarapan o Daod
a wata o Yasay.

IKATELO BAGI
(Sabor
73-89)

SABOR 73
So Kapengokom o Tohan

Matamataan a so Tohan na mapiya ko Israil,
sii ko siran oto a da a saninsaning o poso iyan.

2 Ogaid na makapantag raken na samabo da midolas so ai aken;
maito bo na mada so pekedapoan aken

3 Ka kagiya inikasigi aken so manga takabor
isako mailay aken so kapiya i bobolos o manga rarata a taw.

4 Ka di siran den kepasangan sa paniyakit;
manga lilimegas so manga lawas iran.

5 Da a ba iran manga awid a akal a komakalilid ko manga taw,
aya pen o ba siran pekesiksa a datar o ped a manosiya.

6 Sabap roo na sesalain iran so kapangimporoan,
ago sosoloten iran so kapanganियaya a lagid o gerab.

7 So bo so lebi a pakabarayat i sisingayoon milay o manga mata iran;
da den a diyangka o baya a ginawa iran.

8 Di siran dii mamagompat ago dii tetaro sa kamarataan;
sii ko kapepangimporoan iran na di siran dii mamagita sa kapangarasi.

9 Petegoon iran so manga ngari iran roo sa kasorgaan
na pepegenebenedeb so manga katero iran ko dalem o doniya.

10 Sabap san na pesengoran siran o manga taw
a pepangosipen iran lomamed so manga katero iran a lagid o ig.

11 Na penggiraw siran pen a
"Andamanaya i kaketokawi sii o Tohan?
Ba aden a katao o Lebi a Maporo?"

12 Giyanan den i sowasowai o manga rarata a taw;
lalayon siran makadadaya, na pepekala pen so kakawasaan iran.

13 Mataan den a da a gona o kapepakaliwanaga ko ko poso aken
ago so kapesotiya ko manga olaola ko.

14 Ka pesiksaan ako ko mababasa alongan
ago pendanegen pen oman mapita.

15 Opama ka miyakatero ako sa datar anan
na miyatipo aken den so kapapantagan a manga pagtaw ngka.

16 Na igira a pepanamaran aken ai langon somabot
na tanto aken a pekiawid a akal

17 Taman ko kiyapakasoled aken ko Timplo o Tohan
na go aken bo kasaboti so keakiran sangkoto manga rarata a taw.

18 Matamataan a sii ngka siran petegoon ko manga lilindeg a darpa;
pepepaden ka siran pen ko kabinasaan iran.

19 Sakadiyap den a kapekemoralai kiran.
Tarotop a kapekeipeda kiran o piyamakalekelek.

20 Lagid siran o taginepen a kelipatan o taw amay ka makanaw,
ka amay ka mbowat ka, hey Kadnan,
na pesodiin ka baden so kapakiilailain iran.

21 Isako kapaitan so pamikiran aken ago kasakitan so poso aken

22 Na da a lalag aken ago da a sabot;
lagid ako o maila a binatang sii reka.

23 Apiya pen oto na tatap a kaaped aken reka;
kakapetan ka so kawanana a lima ko.

24 Pepakinggonanao ako ngka ko manga toma ngka,
na oriyan oto na terimaan ako ngka a kebantogan.

25 Antonaa i bagian aken san sa kasorgaan a rowar reka?
Na da den a ba ko kebayaan sii sa doniya a makaliyoliyo reka.

26 Apiya pen pekedaan sa bager so lawas aken ago so poso aken
na so Tohan i bager o poso aken
ago aya ko den bagian sa taman sa pakataman.

27 Siran oto a maaawat reka na penga dadadas bo;

pembinaan ka so langon a petelikod reka.

28 Ogaid na kamapiyaan aken so kapakararani aken ko Tohan.

Biyaloy aken a aya ko lindonga so Allah a Kadnan aken,
na peyagen ko so langon a manga galebek ka.

SABOR 74

Pangni sa Kabokai ko Nasiyon

Hey Tohan, ino kami ngka mbobowangen sa taman sa pakataman?

Ino petegebel so rarangit ka ko talon a tatagikoren ka gowani?

2 Tademi ngka so manga pagtaw ngka a miyatangan ka sii ko miyanga oona a gawii,
a so bangsa a miyaaon ka a makewali ngka.

Tademi ngka so Palaw a Siyon a ron ka miyakakaden.

3 Pagenebenebi ngka angkai a tarotop a kiyagebaa on;
miyanga bibinasa o ridoay so langon taman sii ko Soti a Timplo.

4 Miyamameseg so manga ridoay ngka sii ko darpa a petelabokan ka rekami gowani;
piyakatindeg iran on so manga pandi iran a aya toos ko kiyapakataban iran.

5 Siyayanan iran so manga pamamatok a pepemamata sa marabong a manga kayo.

6 Piroropet iran a manga patok ago rompi so langon a ookiran a pangeleban.

7 Tiyotong iran so Timplo ngka a somiyarta ko lopa;
piresikan iran so pekedenan o Ingaran ka.

8 Aya minigedi ko pamikiran iran na

"Binabinasaan tano siran piyapiya."

Piyanotong iran so oman i darpa a pesimbaan ko Tohan sii ko dalem a inged.

9 Da den a kitoos rekami a ba pekeilay;

da den a miyalamba a nabi,

na da den a matao rekami ron o ay katey pen angkai a masosowa.

10 Ay katey pen, hey Tohan, a kapepagitowitua reka o manga ridoay ngka?

Ba da a kaposan o di iran dii kasodia ko Ingaran ka?

11 Ino ngka penggenggena a lima ngka, apiya so kawanana a lima ngka?

Kowaa ngka ko lililipan ka on ko nditaren ka na go ngka siran polanga.

12 Ogaid na seka den, Tohan, i dato aken ipoon ko miyanga oona a gawii
a dii nggolalan ko kapepanabet ko dalem a doniya.

13 Seka i somiray ko ragat a nggolalan ko kabarakat ka;
piroropet ka so manga olo o naga sii ko kalodan.

14 Seka i somiyasa ko manga olo o Lebiyatan, a so mala a binatang sa kalodan
na inibegay ngka ini a pangenengken ko manga kaaden ko disirto.

15 Seka i mileleka ko manga bowalan ago manga tataya,
na piyakamaraan ka so manga ala a lawasaig.

16 Rek ka so kadaondaw, na rek ka pen so kagagawii;
piyakambeken ka so alongan ago so olan.

17 Seka i miyanendo ko langon a temanaan ko doniya;
inembaalan ka so laon ago so rendeng.

18 Tademi ngka ini, ya Allah, a piyagitowito ka o manga ridoay, ago pisodi o manga lalong so Ingaran ka.

19 Di ngka pelada ko manga iila a binatang so niyawa o pakatatayaan ka; di ngka pekali pati sa taman sa pakataman so kaoyagoyag o manga pagtaw ngka a kikararasay.

20 Tademi ngka so kapasadan ka, ka so manga liliboteng a darpa ko inged na mapepeno a kibabalingan a ndodon so kapanganiyaya.

21 Di ngka peparoa a kapaka pepato a kikaayaan so siran oto a pepelopiten; mapodi o manga miskin ago so kikadodowaanan so Ingaran ka.

22 Mbowat ka, hey Tohan, na pakabenara ngka so titindegan ka.

Tademi ngka so kapepagongatongata reka o manga lalong ko mababasa alongan.

23 Di ngka perendana so dii kapelalalis o manga ridoay ngka, a so kapendaleg o kisosorang reka a lalayon a kapekigorong iyan.

SABOR 75

So Tohan i Pepengokom

Pepanalamatan ami seka, hey Tohan, pepanalamatan ami; marani so Ingaran ka, na pepeyagen ai o piyakamemesa a manga galebek ka.

2 "Tindo aken so gawii a kapengokom," a tig o Tohan, "na saken i pepangokom sa matito.

3 Apiya pen pekeiragirag so doniya ago so langon a kibabaling on na saken i pepekabeken ko manga polaos iyan.

4 Peteroon ko ko manga ambog a 'Genek kano den tekabor,' ago sii ko manga rarata a taw a 'Di niyo pembayaon so manga panga niyo.

5 Di niyo pembayaon so manga panga niyo a sopak ko kasorgaan, aya pen o ba kano petero sa kapepangimporoan.' "

6 Ka so kakiporo na kena a ba sii pekapoon sa sebangon o di na sii sa sedepan aya pen o ba sii sa pagabagatan,

7 Ka so den so Tohan i pepangokom; ipembaba iyan so isa, na ipeporo iyan so ped.

8 Ka sisii ko lima o Allah so isa a tagayan a tetebira sa mabisa a arak a katitimplaan.

Pegododen iyan,

na so langon o manga rarata a taw sa doniya

na pengongosipen iran ai minom taman ko bageber iyan.

9 Ogaid na so saken on peman na kelalayon ako tero makapantag ko Tohan o Yakob; ndidaon ko sekaniyan a manga podi.

10 Potolen iyan so langon o manga panga o manga rarata a taw, ogaid na kiporo so manga panga o manga oontol.

SABOR 76

So Tohan a Pepekataban

Katawan den so Tohan sii sa Yoda;
kababantogan so Ingaran iyan sii sa Israil.

2 So barombarong iyan na sii sa Yarosalim;
so kadena iyan na ndodoo sa Siyon.

3 Roo niyan piyamotol so pepamangikilat a manga gasa,
ago so manga kelong taman ko manga pedang,
a so manga gomaan ko katidawa.

4 Sayana ka a pesigay ago mala i gees, hey Tohan,
ko kapetondagay ngka ko manga palaw
a miyakataban ka ko manga ridoay ngka.

5 So manga wawaraw a sondaro na miyamakakelit a piyanabanan,
ipakatotorog iran so kaposposan a torog iran;
da den a isa bo sangkoto a manga sondaro
a ba niyan magaga nggolalan so kapasang iyan.

6 Sii ko kiyambongeti ngka kiran, hey Tohan o Yakob,
na ndatar so manga koda ago so kikokoda on
a palaya den minilampes a kipipinsanen.

7 Seka bo, seka den i patot a ikelek.

Antawaa i pekatindog ko hadapan ka igira a kiyararangitan ka?

8 Poon sa kasorgaan na miyokas ka sa kokoman;
na miyalek so doniya ago rominek

9 Isako mbowat ka a pengokom, hey Tohan,
sa kasebeta ngka ko langon a peperasain ko doniya.

10 Matamataan a pekipodi reka baden so kapekerarangiti ngka ko manosiya
na siran oto a pepekapagoyag ko rarangit ka na pepanga gegenggen.

11 Semaya kano baden ko Allah a Tohan iyo na go niyo tomanen.

Hey langon iyo a miyakandaidair a manga inged,

na witi niyo sekaniyan sa manga pamemegayan, a sekaniyan a patot a ikelek.

12 Pepemotolen iyan so kapepangimporoan o manga olowan;
ipekelek sekaniyan o manga dato sa doniya.

SABOR 77

So Kapiiya a Ginawa ko Masa a Kamarengan

Penggoraok ako ko Tohan sa tabang;

penggoraok ako ko Tohan sa kapakinega niyan raken.

2 Sii ko manga masa a kareregeni raken na di aken dii mbabanogen so Kadnan;
igira a gagawii na ipembayaw aken a manga lima ko a di den ndokawan,
ogaid na minda so ginawa ko o ba karinawi.

3 Igira a petedeman ko seka, hey Tohan, na makapeperego ako;
igira a pepamimikiran ako na pekikopay so niyawa ko.

4 Pegenggenen ka a kakepideng o manga mata ko,
na di ako makapetero sa tanto aken a kasososa.

5 Pepamikiren aken so miyanga iipos a gawii,
a so miyanga atey den a ragon.

6 Petademan ko so manga idaida aken igira a gagawii;
di ako dii makimbitiyarai ko poso aken
na giyai i ipegise aken sa ginawa ko:

7 "Ino mangaday so Kadnan,
ba lalayon a katatalikodi niyan rektano?

Ba di sekaniyan den pengalimo peroman?

8 Ba miyada den so gagaw niyan sa di den pekaasal?

Ba dayon sa dayon a di kakitoman o manga initopa niyan?

9 Ba miyakalipat mangapedi so Tohan?

Ba gominek sekaniyan mangalinggagaw ko kapekerarangiti ron?"

10 Na pitero aken pen a "Giyanan den i ikararata a ginawa ko,
ogaid na tedeman ko so manga ragon a kiyapayag o kapaar o Lebi a Maporo."

11 Penanademan ko so manga galebek o Allah;

oway, tedeman ko so manga kabarakat ka ko miyanga oona a gawii.

12 Perasamen aken so langon a miyanga papasad ka,

ago di aken dii pendapatatan so manga ala i gees a pinggolaola ngka.

13 So manga okitokit ka, hey Tohan, na palaya soti.

Antonaa a tohan i datar sa kala o Tohan tano?

14 Seka so Tohan a dii nggolaola sa manga kabarakat;

pepakiilay ngka so kapaar ka sii ko manga taw.

15 Iniaon ka ko manga pagtaw ngka so bager ka,

a so manga mbawataan o Yakob ago so Yosop.

16 Miyailay ka o manga ig, hey Tohan,
miyailay ka o manga ig na miyalek siran;
na so pen so kadaleman on na tiyabeker.

17 So manga gabon na miyamangodod sa oran,

na go mindadalendeg so manga langit;

miyamangiteras ko mbalabala so manga gasa a ka.

18 Miyaneg so dalendeg ka sii ko barabarat,

na linindawan o manga kilakilat ka so doniya;

tiyabad so lopa ago lininog.

19 Minikentay ko ragat so lalan ka,

na so kiyaokitan ka na sisii ko manga ala a ig

apiya pen da on masarino so manga lakaw ngka.

20 Inagak ka so manga pagtaw ngka a lagid o talon a manga bilibili
a nggolalan ko lima o Mosa ago so Aron.

SABOR 78

So Tohan ago so manga Pagtaw niyan

Pamakinega niyo a manga pagtaw aken so manga ndao aken;
tagoa niyo sa ginawa so manga katero aken.

2 Pekaokiten aken so peteroon ko ko manga bayambayanan;
penggogod ako sa manga pageemaan ipoon ko miyanga oona a gawii,

3 A so manga nganin a miyanga aneg tano ago piyanga totokawan,
ka miyapamanotol rektano den o manga lokes tano.

4 Di tano ini pagemaan ko manga mbawataan iran,
ka peyagen tano mambo ko pekasalono a manga taw so mapopodi a manga galebek o
Allah,

so gees iyan ago so manga piyakamemesa a pinggolaola niyan.

5 Inimbaal iyan sa manga taritib so mbawataan o Yakob
ago bigan iyan sa kitab so manga Israil,

na piyamando iyan pen so manga apo tano
sa kipamangendaon iran on ko manga wata iran

6 Kaan katokawi mambo o pekasalono a manga taw,
a so manga wata a da pen milotad;

kaan iran peman matero ko manga wata iran.

7 Aya sabap iyan na an iran kasarigi so Tohan,
ago di iran den kelipatan so manga galebek o Tohan

ka ba iran baden tomana so manga sogoan iyan,

8 Ago an siran pen di sowa ko manga apo iran,
a mangatetegas ai i olo ago kisosopak a manga taw

a da iran den pakaiklasa so poso iran ko Tohan ago so niyawa iran
na kena a ba on mapaparatiyaya.

9 So manga mbawataan o Ipraim
na apiya pen kikagogomaanan sa manga pana
na miyakapeto siran ko gawii a kiyatidawa;

10 Da iran nggolalanan so kapasadan o Tohan
ago siyangka iran pen a kipaginetaon iran ko kitab iyan.

11 Kiyalipatan iran so miyanggolaola niyan,
a so manga piyakamemesa a piyakiilay niyan kiran.

12 Ka sii ko kamamasaan o manga apo iran
na miyangembaal so Tohan sa manga kabarakat
sii sa inged a Misir, sii ko kapantaran sa Sowan.

13 Siray niyan so ragat na go piyakaokit iyan siran on,
ka piyakatindog iyan so ig a datar o keleb.

14 Piyakiagak iyan siran ko gabon sii ko kadadaondaw,
ago so sindaw o apoy sii ko kagagawii.

15 Piyamensad iyan so manga ator roo ko disirto
ka bigan iyan siran on sa ig a poon ko pitidaleman ko lopa;

16 Piyakaliyo niyan so manga ig a sii miyakapoon ko mibobobong a lakongan
na piyakaondas iyan on sa kababaan a datar o manga lawasaig.

17 Apiya pen ai na itataros iran den so di iran rekaniyan dii kapakandosa,

a pesopaken iran sii ko disirto so Lebi a Maporo.

18 Pitibaba iran a kiyatepengi ran ko Tohan
ko kiyapamanton iran on sa pangenengken a maiinam iran.

19 Piyagitowito iran so Tohan a tig iran a

"Ba makagaga menat so Tohan sa pangenengken sii sangkai a disirto?"

20 Matamataan den a isako mabasal iyan so lakongan na minibogowak on so ig
na miyakapoon on mamangondas so manga lawasaig;

ogaid na ba tano niyan mambo kabegi sa paan?

Ba niyan kapagadili sa sapo so manga pagtaw niyan?"

21 Kagiya maneg siran o Allah na tanto sekaniyan a kiyararangitan;

piyakakadegan iyan sa apoy so manga mbawataan o Yakob,
na kiyalonsanan baden so gani niyan ko manga Israil,

22 Ka da iran paratiyayaa so Tohan

aya pen o ba iran sarigi so kapepanabet iyan.

23 Apiya pen oto na siyogo iyan so manga langit sa poro
na likaan iyan so manga gimowa o kasorgaan,

24 Ka piyakioranan iyan siran sa roti a makan iran;

bigan iyan siran sa pereperan a poon sa kasorgaan.

25 Na komiyan den so manosiya ko paan o manga malaikat;

inipakawit kiran o Tohan so ipenga oosog iran a pangenengken.

26 Piyakasamber iyan pen so ndo a poon sa sebagean,

na nggolalan ko kapaar iyan na inidendeg iyan so ndo a poon sa pagabagatan.

27 Piyakaoranan iyan siran sa manga sapo a lagid o bayanek,

a so manga papanok a lagid sa kadakel o peted sa kilid a ragat.

28 Piyamakatanana iyan siran ko soled o kampo iran

sii den ko melilibeta ko manga barombarong iran.

29 Na mikekan siran on taman sa miyanga oosog piyapiya,

ka inibegay kiran o Tohan so ikakadali iran.

30 Ogaid na kagiya da siran pen masemo ko pangenengken a ikakadali iran

a sisii pen ko manga ngari iran,

31 Na somiyokeyaw kiran so rarangit o Tohan,

ka piyamoto iyan so tanto kiran a mabager,

a so manga ngongoda a mama sii sa Israil.

32 Apiya pen oto na initaros iran baden so di iran dii kapakandosa;

na da iran paratiyayaa so manga piyakamemesa niyan.

33 Kagiya ka maoto na piyakaipos iyan a datar o sengaw so manga gawii iran

ago so pen so omor iran sii ko kalek.

34 Igira a biyonoan siran o Tohan na pimbabanog iran sekaniyan

a miyananangoran siran on sebenar.

35 Kiyatademan iran pen a so Tohan i Lakongan iran,

ago so Lebi a Maporo a Tohan i miyakaon kiran.

36 Ogaid na ba iran on baden inipagorayoray so manga ngari iran,

ago inipamokeyaw iran on so manga dila iran,

37 Ka kena a ba magiiklas rekaniyan so manga poso iran

aya pen o ba siran petoman ko kapasadan iyan.

38 Apiya oto na sabap sa masalinggagaw sekaniyan,
na rinilaan iyan so kadostaan iran

ago da niyan siran binasaa.

Omanoman iyan igenggen so rarangit iyan

ka da niyan pokawa langon so gani niyan.

39 Kiyatanodan iyan a matag siran baden manosiya
a lagid o ndo a baden somasagad na di den kesoy.

40 Sayana a madakel a kiyasopaka iran rekaniyan sii ko disirto
ago so kiyapakakerataa iran sa ginawa niyan roo ko mitataog a kaden.

41 Omanoman iran tepengan so Tohan;

tiyopowan iran so Soti a Tohan o Israil.

42 Da iran katademi so kapaar a ininggolalan iyan
sii ko gawii a kiyapokasa niyan kiran ko manga ridoay iran

43 Ago giya kiyapakiilain iyan ko manga kabarakat iyan sii sa Misir,
a so manga piyakamemesa niyan roo ko kapantaran sa Sowan.

44 Ka biyaloy niyan a rogo so manga lawasaig iran,
na da iran kainomi so manga baogan iran.

45 Inowitan iyan siran sa makapal a manga rengit a miyangangan kiran,
ago manga babak a mirata kiran.

46 Inibegay niyan ko manga oled so manga pamomolan iran
ago so manga pereperan iran sii ko manga tarapan.

47 Bininasa niyan a giyaw so manga waged iran a obas
ago sii ko tenggaw so manga kayo iran a korma.

48 Piyamono iyan pen a giyaw so manga pangangayamen iran
ago so manga talon iran sii ko manga kilakilat.

49 Piyakamborngat iyan kiran so pesokeyaw a gani niyan,
so rarangit iyan, so oteg iyan ago so kariridoa niyan kiran,
a so manga siyogo iyan kiran a pepeminasa.

50 Inimbaal iyan sa lalan so rarangit iyan;

da niyan siran lepasa ko kapatay

ka piyalad iyan siran baden ko kasiksaan.

51 Piyamono iyan so oman i kaka a wata a mama sii sa Misir,
a so paganay a inionga o bager iran sii ko manga barombarong o Ham.

52 Ogaid na piyakaliyo niyan roo so manga pagtaw niyan a lagid o talon;
inagak iyan siran a datar o manga bilibili ko kapegokit iran ko disirto.

53 Malilinding siran ko di niyan kiran on dii kanggonanaowa,
na da siran manga aalek,

ogaid na minikolob so ragat ko manga ridoay iran.

54 Inowit iyan siran ko soti a lopa iyan,

sii den ko kapalawan a miyatangan iyan a nggolalan ko kawatan a lima niyan.

55 Piyamogaw niyan so manga nasiyon sii ko kapepekaantap kiran o manga pagtaw
niyan,

na pimbagibagi iyan so manga lopa iran a mapekewali o manga mbatabataa a Israil
na piyakabaling iyan siran ko manga babalingan iran.

56 Ogaid na tipengan iran so Tohan
ago siyopak iran pen so Lebi a Maporo,
ka da iran nggolalananen so manga insarat iyan.

57 Miyamangonkir siran a da pamaratiyaya
a datar mambo o manga apo iran,
na miyakasilay siran a lagid o bekog a gasa.

58 Piyakapagoteg iran so Tohan sabap ko manga aparan iran sii ko manga bobongan,
ago piyakapanaod iran pen ko manga barahala iran.

59 Miyailay ini o Tohan, na kiyarangitan sekaniyan,
na tanto niyan a inibowang so manga Israil.

60 Inawaan iyan so Barombarong a pesimbaan rekaniyan sii sa Siloh
a aya niyan kakadenan sii ko manga manosiya.

61 Piyakiagaw niyan ko manga ridoay so Kaban sa Kapasadan
a aya toos ko kabatowa niyan ago bantogan.

62 Piyakipamono iyan a pedang so manga pagtaw niyan,
ka kiyarangitan iyan siran a kawali niyan.

63 Miyanga iiped a apoy so manga ngongoda kiran,
na da den a makapangaroma ko manga raga kiran.

64 So manga imam kiran na miyamatay a pedang,
na da siran den mimboko o miyanga babalo kiran.

65 Samaoto na miyakanaw so Allah a datar o totorogen,
na lagid sekaniyan o mabager a mama a miyapangoyat a arak.

66 Piyakapalagoy niyan so manga ridoay niyan,
na tiyagoan iyan siran sa da a ikepos iyan a kayaan.

67 Liyo ron pen na inisili niyan so kiyababadan ko Yosop,
na da niyan pilia so mbatabataa a Ipraim,

68 Ka aya niyan pinili so mbatabataa a Yodah,
ago so Palaw a Siyon a pekebabayaan iyan.

69 Roo niyan biyangan so Timplo niyan a lagid o ndodoo sa kasorgaan,
a da den a ikepos iyan a datar o doniya a piyakambeken iyan.

70 Pinili iyan mambo so Daod a oripen iyan
na kinowa niyan sii ko pananateba

71 A roo niyan petemengi so manga bilibili,
ka kinowa niyan den a mabaloy a pananagikor ko manga pagtaw niyan a manga
mbawataan o Yakob

a so kawali niyan a manga Israil.

72 Na inipanagikor kiran o Daod so kapagiinontolan a poso iyan,
ago piyagolowanan iyan siran ko kapasang iyan i kandato.

SABOR 79

Pangni sa Kabokai ko Nasiyon

Hey Tohan, tiyarapas o manga kapid so inged a aya ngka kawali;
piseboan iran so soti a Timplo ngka,
na pinggegeba iran a Yarosalim.

2 So manga bangkay o manga oripen ka
na piyakikan iran ko manga papanok sa kawang;
so sapo o manga kaom ka na inenat iran ko manga iila a binatang.

3 Piyakatoga iran a lagid o ig so rogo o manga pagtaw ngka
sii ko mbalabala sa Yarosalim,
na da den a pekalebeng ko miyamatay.

4 Miyabaloy kami a songkai o manga siringan ami
a di kami dii sodiin ago dii kela o melilibeta rekami a manga taw.

5 Ay katey niyan, ya Allah? Ba taman sa pakataman a kapekerangiti reka?
Ba mitataros so kapekerab o kapepanaod ka a datar o apoy?

6 Pakambornkata ngka so gani ngka ko manga nasiyon a di ka iran kikilalaan,
ago sii ko manga ndatoan a di telo ko Ingaran ka.

7 Ka siyakab iran so manga mbawataan o Yakob
ago liyaslas iran so inged a babalingan iran.

8 Di ngka rekami tenaan so manga dosa o manga apo ami;
kapediin kami ngka nggagaan
ka tanto kami den a minibaba.

9 Lindinga kami ngka, hey Tohan a pepekasabet rekami,
sabap ko bantogan o Ingaran ka;
panabangi kami ngka ago rilaan ka so manga dosa mi
sabap ko Ingaran ka.

10 Ino kami pen miise o manga nasiyon a
"Anda so Tohan iyo?"

Pakitokawi ngka ko manga nasiyon sii ko kakemasai ami ron
a ipeseop ka so kapekatogaa ko rogo o manga oripen ka.

11 Misampay reka so dii kapakaperego o miyanga bibiyag.
Nggolalan ko kala a ka i kapaar
na pakapagoyaga ngka so siran oto a miyatendo a pemamonoon.

12 Badali ngka sa makapito takep ko manga siringan ami
so manga songka a inipanongka iran reka, hey Kadnan.

13 Samaoto na sekami a manga pagtaw ngka,
a so manga bilibili ko talon ka
na penalamatan ami seka sa taman sa pakataman;
na sii ko kapepamagapidapidi rekami
na pamanotolen ami so manga podi ngka.

SABOR 80

Pangni sa Kapakaasal o Nasiyon

Pamakinega kami ngka, hey Tomatagikor sa Israil,
seka a pegagak ko manga mbawataan o Yosop a lagid o talon.

Hey seka a kokorsi sii ko poro o piyagtaotaw a manga malaikat,
na sindaw ka

2 Sii ko kamamasan o Ipraim, Baniyamin ago Manasih.

Pokawa ngka so bager ka,
na songowi kami ngka sa kasabeta ngka rekami.

3 Pakaasala kami ngka, hey Tohan.

Pakaliwanaga ngka rekami so paras ka
kaan kami masabet.

4 Ya Allah a Lebi a Mamaapaar a Tohan,

ay katey pen a kapekerarangiti reka
ko kapepangangarapan o manga pagtaw ngka?

5 Aya pangenengken a piyakikan ka kiran na manga lo;
piyakiinoman ka kiran so manga ladiya a kikaopeno a lo.

6 Biyaloy kami ngka a dii pepawalaan o manga siringan ami,
na pepagongatongaten kami o manga ridoay ami.

7 Pakaasala kami ngka, hey Tohan a Lebi a Mamaapaar.

Pakaliwanaga ngka rekami so paras ka
kaan kami masabet.

8 Piyakaliyo ngka sa Misir so isa a waged a obas;

piyamogaw ngka so manga nasiyon ko inged iran na ron ka ini piyamola.

9 Tiyagaran ka sa kaden a ketoan iyan,
na mimbekaw ini sa madalem, na minipeno ko dalem a inged.

10 Kiyasapengan so manga palaw o along iyan,
na kiyatanongan o manga sapak iyan so manga ala a kayo a sidro.

11 Domiyonapa pen so manga sapak iyan ko Ragat
ago so manga roroni a sapak iyan na taman den ko Lawasaig a Yopratis.

12 Ino ngka nggebaa so manga alad iyan?

Ka imanto na so langon a pepekasagad on na peperoropo ko onga niyan;

13 So manga baboy sa kalasan na pepelomegen iran ai
ago pepenganganen o manga iila a binatang.

14 Kasoy ka rekami, hey Tohan a Lebi a Mamaapaar.

Tolongi kami ngka san sa kasorgaan.

Kibira ngka angkai a waged,

15 A so bekaw a piyamola o kawanana a lima ngka,
a giyangkai a sapak a piyakagemaw ngka para sa ginawa ngka.

16 Miyapata so waged ka ago kiyabisolan;

pepanga dadadas so manga pagtaw ngka ko di ngka kiran dii kambongeti.

17 Misarta so kapaar ka ko mama a sisii ko kawanana ka,
a so wata o manosiya a piyakagemaw ngka para sa ginawa ngka.

18 Samaoto na di ami seka den telikodan;

oyaga kami ngka, ka telowan ami so Ingaran ka.

19 Pakaasala kami ngka, ya Allah a Lebi a Mamaapaar a Tohan.
Pakaliwanaga ngka rekami so paras ka
kaan kami masabet.

SABOR 81

So Idaida ko Kapista

Pagidaida kano sa kapekebabaya ko Tohan a bager tano;
ogiyab kano sa matanog ko Tohan o Yakob.

2 Pooni niyo so dii kamboboniboniyen; tepia niyo so manga garingking,
na pakaoniya niyo so manga pipiya i oni a alpa ago kotiyapi.

3 Pegiyopa niyo so bogiyong igira a miseribolan
ago igira mimbiring so olan, sii ko gawii a kapepista tano,

4 Ka giyai i taritib sa Israil, a so sogoan o Tohan o Yakob.

5 Inibegay niyan ai a insarat ko manga mbawataan o Yosop
isako magenebened siran sa inged a Misir
a ron iran miyaneg so basa a da iran sabota.

6 Pitero iyan a "Piyokas aken ko waga niyo so awid;
miyada rekano so kaaawid sa reban.

7 Sii ko kareregeni rekano na miyananalo kano na piyanabangan ko sekano.
Poon ko gabon a dii ndadalendeg na inampon aken sekano;
tipengan aken sekano sii ko manga ig sa Miribah.

8 "Pamakineg kano, hey manga pagtaw aken, ka pekaiktiyaren ko sekano,
hey Israil, o ba ako niyo bo pekinega!

9 Di kano den tatago sa barahala,
aya pen o ba kano sodiyod ko katohanan o manga rait.

10 Saken so Allah a Tohan iyo a miyakaliyo rekano sa inged a Misir.
Ngganga kano sebenar, ka penoon ko so ngari iyo.

11 "Ogaid na da ako pakinega o manga pagtaw aken;
giya Israil na di iran kabaya a kaparatiyayaa iran raken.

12 Kagiya ka maoto na inindarainon aken siran den ko kategas o poso iran
kaan iran kapangonoti so baya a ginawa iran.

13 "O ba ako bo pemakinega o manga pagtaw aken!
O ba bo kedega o Israil so manga lalan aken!

14 Ka o magiyanan na kedaag aken somambot so manga ridoay iran
ago kitana aken pen so lima ko ko manga soranga iran.

15 Siran oto a pekegowad ko Allah na pemakakipes ko hadapan iyan,
na ketatap so kandanega kiran sa taman sa pakataman.

16 Na sekano peman na mapekakan aken ko lebi a mapiya a trigo,
ago mapekaosog aken pen ko gola a teneb a poon ko lakongan."

SABOR 82

So Tohan a Lebi a Maporo a Dato

Makadadarpa so Tohan ko kalilimodan sa kasorgaan;
sii ko look o manga pangongokom na pegokasan iyan siran sa kokoman:

- 2** "Ay katey o bibid a kapepangokom iyo
ago so kaaampili niyo ko manga rarata a taw?
3 Panindegen iyo so kabenar o manga lolobay ago so manga ilo;
paginontolanen iyo so kikararasay ago so pepamakitabang.
4 Panabangi niyo so manga lolobay ago so manga miskin;
pokasa niyo siran ko lima o manga rarata.

5 "Da den a katawan iyo. Da den a sasaboten iyo.
Sii kano pelalakaw ko maliboteng;
so langon a manga onayan o doniya na palaya pekekokog.

- 6** "Pitero aken a 'Manga tohan kano;
palaya kano manga wata o Lebi a Maporo.'
7 Ogaid na pematay kano bo a datar o matag manosiya;
penga ooteng kano a lagid o ped a manga olowan."

8 Mbowat ka, hey Tohan, na kokoma ngka so doniya,
ka seka i kikawali ko langon a nasiyon.

SABOR 83

Pangni sa Katabana ko manga Ridoay o Israil

- Hey Tohan ko, di ka baden rerenek;
di ka ndadarainon, hey Tohan; di ka baden gegenek.
2 Ilaya ngka, ka dii mamisenga so manga ridoay ngka;
siran oto a pekegowad reka na pepamangimporoan.
3 Pepegopakat siran sa kiakal iran ko manga pagtaw ngka;
kekadiyatan iran sa marata so siran oto a pelindigen ka.
4 "Itano roo," a tig iran, "ka polangen tano so bangsa iran
kaan di den kapenanademi so ngaran a 'Israil'."
5 Maiisaisa so pamikiran iran ko kapepagopakat iran;
piyamagabangaan ka iran,
6 So manga Idomiyo ago so manga Ismail,
so manga Mowabiyo ago so manga mbawataan o Hagar,
7 So manga taw sa Gibal, so manga Amoniyo, so manga Amalik
ago so manga Pilistiyo a rakes o manga kibabaling sa Tiro.
8 Lagid mambo a Asiriya a tomiyapi kiran
a aya mabager a abanga o kiyababadan ki Lot.

9 Nggolaolaa ngka kiran so inikidia ngka ko manga taw sa Midiyan,
ago datar o pinggolaola ngka ki Sisira ago si Yabin sii ko lawasaig a Kison.

10 Bininasa ngka siran roo sa Indor,
na miyaredak so manga bangkay iran sii ko lopa.

11 Baloya ngka so manga olowan iran a lagid i Orib ago si Siib,
ago so langon a manga dato iran a lagid i Sibah ago si Salmona

12 A miyatero iran a "Tanganen tano so manga pananateba o Tohan."

13 Hey Tohan ko, baloya ngka siran a lagid o pekeporipis a bayanek
ago lagid o okap a ipembayog o ndo.

14 Datar o apoy a petotongen iyan so kalasan,
ago datar o kadeg a pepakakaraben iyan so manga palaw

15 A pakisalobaan ka siran ko barabarat ka,
na pakipangangaleken ka siran ko sobosobo ngka.

16 Pakapanagopa ngka siran sa kaya
taman sa di mambanog o manga taw so Ingaran ka, ya Allah.

17 Makakeya siran ago manga aalek sa taman sa pakataman;
madadas siran a kikadidiyamanan.

18 Pakitokawi ngka kiran a seka bo, a aya Ingaran ka na so Allah,
i Lebi a Maporo ko dalem a doniya.

SABOR 84

Kadali ko Walay o Tohan

Sayana a kebabayaan so kakadenan ka,
ya Allah a Lebi a Mamaapaar!

2 Pekikopay so niyawa ko ko kikakadaliin iyan ko manga lamalama o Timplo o Allah;
so poso ago so badan aken na ipenggoraok iran so oyagoyag a Tohan.

3 Apiya so kenti na miyakatoon sa walay,
ago so pen so ogona na mimbaal sa salag
a ron iyan kelendemi so manga wata iyan
sii ko obay o manga aparang ka,
ya Allah a Lebi a Mamaapaar a Dato aken ago Tohan ko.

4 Rarakmatan so siran oto a komakaden ko Walay ngka;
tatap a kapepodiya iran reka.

5 Rarakmatan so taw a sisii reka so bager iyan,
a madadalem ko poso iyan so kalawia niyan ko Palaw a Siyon.

6 Sii ko kapeterapas iran ko mamara a Balintad a Baka
na pembalowin iran ai a darpa o manga bowalan;
so pen so pepenga babalaga a oran na mapepakapelinaw niyan ai.

7 Pepekabager siran sii ko kapelalakaw iran
taman ko kapakapangadap o oman i isa kiran ko Tohan sii sa Siyon.

8 Pamakinega ngka so kapepangangarapan aken, ya Allah a Lebi a Mamaapaar;

lekai ngka a tangila ngka, hey Tohan o Yakob.

9 Ilaya ngka so dato a aya rekami pelinding, hey Tohan;
kalimoon ka sekaniyan a miyapili i ka.

10 Lebi a mapiya so salongan sii ko manga lamalama ngka
a di so sanggibo a gawii ko salakaw a darpa.

Tomoon ko a kapakatitindog aken ko pintoan o Walay o Tohan aken
a di so kapakababaling aken ko manga kakadenan o manga rarata.

11 Ka so Allah a so Tohan na aya alongan ago kelong;
pembegay so Allah sa limo ago pangkatan;
da den a mapiya a nganin a ba niyan pepanganogoni
ko siran oto a pepaginetaw a da a daway niyan.

12 Ya Allah a Lebi a Mamaapaar,
rarakmatan so taw a somasarig reka.

SABOR 85

Pangni sa Kamapiyaan o Inged

Inikalimo o ka den so inged ka, ya Allah;
piyakaasal ka so kapepekapiya o manga mbawataan o Yakob.

2 Inirila a ka so kadostaan o manga pagtaw ngka
ago tiyambonan ka so langon a dosa iran.

3 Piyakada a ka so langon o rarangit ka
ago piyakalenggaw ngka so pesokeyaw a gani ngka.

4 Pakaasala kami ngka peroman, hey Tohan a pepekasabet rekami,
na geneki ngka so kapagootege ngka rekami.

5 Ba dayon sa dayon a kapekerarangiti ngka rekami?
Ba ngka tatarosen so gani ngka taman ko kapepamagapidapid o masa?

6 Ba kami ngka di pagoyaga peroman
kaan mabebaya reka so manga pagtaw ngka?

7 Pakiilain ka rekami so da a ikeda iyan a gagaw ngka, ya Allah,
na nggolalanan ka rekami so kapepanabet ka.

8 Pemakinegen ko so peteroon o Tohan a so Allah,
ka ipetopa niyan so kapakalilintad o manga pagtaw niyan, a so manga kaom iyan,
ogaid na disomala a di siran den kesoy ko kalalalangan.

9 Matamataan a marani so kapepanabet iyan ko siran oto a maaleken rekaniyan,
kaan makakaden so bantogan iyan sii ko inged tano.

10 So gagaw ago so tito a benar na makapetoon siran;
so kaontol ago so kalilintad na makapagareka.

11 So tito a benar na meretok sii sa doniya,
na tolong so kaontol roo sa kasorgan.

12 Matamataan a imbegay o Allah so kamapiyaan,
na pagodaren so lopa tano.

13 Moona rekaniyan so kapaginontolan
ka aya petiyagar ko lalan a pelalakawan iyan.

SABOR 86

Pangni sa Tabang

Lekai ngka a tangila ngka, ya Allah, na go ako ngka pamakinega,
ka miskin ako ago kadodowaanan.

2 Ipata ngka so kaoyagoyag aken, ka magiiklas ako reka.
Seka i Tohan ko; sabeta ko ngka a oripen ka
ka somasarig ako reka.

3 Kalimoon ako ngka, hey Kadnan,
ka sii ako reka pepananalo sa mababasa alongan.

4 Pakapiyaa ngka so ginawa o oripen ka,
ka sii aken reka ipepangadap so niyawa ko, hey Kadnan.

5 Mapiya ka, Kadnan, ago dii meririla;
mitataralo reka so kapepangalinggagaw ko langon a pepananalo reka.

6 Pamakinega ngka so kapepangangarapan aken, ya Allah;
tagoa ngka sa ginawa so kapenggoraok aken sa kapedi.

7 Sii ko masa a kakeregeni raken na telowan ko seka,
ka pagamponen ako ngka.

8 Sii ko manga tohan na da den a ba ngka on datar, hey Kadnan,
aya pen o ba aden a manga galebek a ba miabay ko manga galebek ka.

9 So langon o manga bangsa a inaden ka
na pemakaoma ago pemanodiyod ko hadapan ka, hey Kadnan,
na mbantogen iran so Ingaran ka.

10 Ka mala ka i gees a dii nggolaola sa manga piyakamemesa;
seka bo i Tohan.

11 Toroon ka raken so lalan ka, ya Allah,
ka lomalakaw ako ko tito ngka a benar;
timana ngka so poso aken sa kikaleken iyan ko Ingaran ka.

12 Podin ko seka, hey Kadnan a Tohan ko, sa iklas ko poso aken,
na mbantogen aken so Ingaran ka sa taman sa pakataman.

13 Ka tanto a mala so kapepangalinggagaw ngka raken;
siyabet ka so niyawa ko ko pitidaleman ko darpa o miyamatay.

14 Hey Tohan, so manga pepangimporoan na riridoon ako iran;
aden a sagorompong a manga sosopiit a manga taw a mananamar ko niyawa ko,
a so manga mama a di ka iran tatagoon sa ginawa.

15 Ogaid na seka, hey Kadnan, na makapediin ago makalimoon a Tohan,
a kena a ba malebod kararangiti, mala i gagaw ago tanto a kasasarigan.

16 Dingili ako ngka na go ngka kalimoon;
begi ngka ko bager ka so oripen ka
na go ngka sabeta so wata o oripen ka a babay.

17 Pakailaya ko ngka sa toos ko kamapiyaan
kaan ai mailay o siran oto a pekegowad raken ago an siran kayai,
ka seka, ya Allah, i tomiyabang raken ago miyakarinaw raken.

SABOR 87

So Kapodiya sa Yarosalim

Biyangon o Allah so onayan o siti niyan sii ko Soti a Palaw.

2 Tanto niyan a pekebabayaan so manga gimowa a Siyon
a di so langon a babalingan o manga Israil.

3 Kababantogan so manga nganin a dii matero makapantag reka, hey siti o Tohan:

4 "Pagalowin ko a Misir ago Babiloniya
a ped ko siran oto a makakikilala raken,
so pen so Pilistiya ago giya Tiro a rakes o Itiyopiya,
na peteroon ko a 'Giyangkai a taw na inimbawata roo sa Siyon.' "

5 Matamataan a aya mapetero makapantag sa Siyon na
"Giyangkai ago giyangkanan a taw na minimbawata on,
na so den so Lebi a Maporo i makapembeken on."

6 Isorat o Allah ko kasosoratan ko manga bangsa a
"Giyangkai a taw na inimbawata sa Siyon."

7 Sii ko kapemboboniboniyiran na ipegidaida iran a
"So langon a pekepoonan o manga rakmat aken na ndodoo sa Siyon."

SABOR 88

Kapenggoraok sa Tabang

Ya Allah a Tohan a pesebet raken,
gagawii daondaw na penggoraok ako sii ko hadapan ka.

2 Misampay reka so kapepangangarapan aken;
lekai ngka so tangila ngka ko kapenggoraok aken.

3 Ka miyasemo so niyawa ko ko manga karomasayan,
na pepekadaseg so kaoyagoyag aken ko kobor.

4 Ibibilang ako a ped ko siran oto a pepanga aaloganen ko galebo;
lagid ako o mama a da den a bager iyan.

5 Maaped ako ko miyamatay a minindarainon,
a datar ako o siran oto a miyapamono a kikaiiga ko kobor a di ngka den ketademan,
a miyabelag siran ko kapetebangi ngka kiran.

6 Tiyago ako ngka ko didadidalem o galebo
sii den ko miyakaliboliboteng ko kadaleman.

7 Tanto raken a pekidag so gani ngka;
inikolob ka raken so langon o manga begel ka.

8 Piyakitalikodan ako ngka ko manga ginawai aken
ka miyabaloy ako ngka a ipekesisingay iran.

Kaseseletan ako na di ako pekaliyo;

9 Miyakalobay so manga mata ko sabap ko kapakamboboko aken.

Oman gawii na petelowan ko seka, ya Allah,
na ipapalad aken reka so manga lima ko.

10 Ba ngka dii nggolaolai sa manga kabarakat so miyamatay?

Ba pepamangembowat so miyamatay sa kapodiya iran reka?

11 Ba dii matero so kapepangalinggagaw ngka sii ko kobor,
o di na so kasasarigi reka sii ko darpa o kabinasaan?

12 Ba sii peketokawi so manga kabarakat ka ko darpa a maliboteng,
o di na so kapagiinontolan ka sii ko inged a da den a katatanodan on?

13 Ogaid na sii ako reka pepananalo sa tabang, ya Allah;
oman kapipita na pekitalingoma reka so kapepangangarapan aken.

14 Ya Allah, ino ako ngka bobowangen
ago pageenaan ka raken so paras ka?

15 Ipoon den ko kangoda ko na pekerasay ako ago sama bo di petay;
kiyapanagadan aken so piyamakalekelek ka, na kiyadaan ako den sa inam.

16 So pesokeyaw a gani ngka na minipayopas raken;
so piyamakatekatekaw ngka na miyakabinasa raken.

17 Mababasa alongan na lilikopan ako iran a lagid o bagiyaw
a pendasaan ako iran ko mbala sa takilidan.

18 Piyakitalikodan ako ngka ko manga ginawai aken ago siran oto a pekebabayaan ko;
na aya bo a mipageepeda aken na so maliboteng.

SABOR 89

So Kapasadan o Allah ko Daod

Indikir aken so da a ikeda iyan a gagaw o Allah sa taman sa pakataman;
pekitokawan o ngari aken so kasasarigi reka sii ko langon a kapepamagapidapid o masa.

2 Ka katawan aken a makambebeken sa dayon sa dayon so gagaw ngka,
ago piyakatikna a ka so kasasarigi reka sii ko manga langit.

3 Pitero o ka a "Inimbaal aken sa kapasadan so mama a miyapili aken,
ka inisepa aken ko Daod a oripen aken a

4"Tetapan ko sa dayon sa dayon so kebabadan reka,
na pakapembekenen ko so korsi i ka sii ko langon a kapepamagapidapid o masa."

5 Pepodin o manga langit so manga piyakamemesa ngka, ya Allah,
ago so pen so kasasarigi reka sii ko kalilimod o kikasosoti.

6 Ka antawaa sii sa kawang i kiabay ko Allah?

Antawaa ko manga kaaden sa kasorgaan i kelagidan ko Allah,

7 A so Tohan a tanto a ipekelek sii ko pepagopakat a kikasosoti;
ago lebi a pagaadatan a di so langon a lomilibet on?

8 Ya Allah a Lebi a Mamaapaar a Tohan, antawaa i datar ka?
Mabager ka, ya Allah, na lilibeten ka o kasasarigi reka.

- 9** Seka i makapapaar ko pendaleg a ragat;
igira a dii mbegel sa manga ala na seka i pepekalengen on.
- 10** Seka i somiyasa ko Rahab a so piyakalekelek a binatang a aya niyan inipatay;
iniparak ka so manga ridoay ngka a nggolalan ko mabager a barokan ka.
- 11** Rek ka so manga langit, na rek ka pen so lopa;
seka i miyangon ko doniya ago so langon o matatago on.
- 12** Seka i miyaden ko pagotaraan ago so pagabagatan;
so palaw a Tabor ago giya Hirmon na pepelalalis sa kapekebabaya sabap ko Ingaran ka.
- 13** Mala i gees so barokan ka.
Mabager so lima ngka; maporo so kawanan a lima ngka.
- 14** So kaontrol ago so kokoman na aya kaonayan o korsi i ka;
so kapangalinggagaw ago so tito a benar na pepangonaan reka.
- 15** Sayana a mapipiya a ginawa o siran oto a miyasowa iran so kapamesegi ran reka sa
kapekebabaya,
a pelalakaw siran, ya Allah, ko kaliwanag o paras ka.
- 16** Ipekebabaya iran so Ingaran ka sa mababasa alongan;
na ipepangandag iran so kaontrol ka.
- 17** Ka seka i kababantogan a bager iran,
na sabap ko limo o ka na pekipangkat so gees ami.
- 18** Matamataan a rek o Allah so dato ami a aya mi kelong,
sekaniyan na rek o Soti a Tohan o Israil.
- 19** Miyakaisa a mitero ka a miyakanggolalan ko pangingilain;
sii ko manga kaom ka na pitero o ka a
"Bigan aken sa tabang so mabager a sondaro;
inipangkat aken ko manga taw so sakataw a mangoda.
- 20** Miyapili aken so Daod a oripen aken;
siyalawatan aken sekaniyan sa kadato ko soti a lana ko.
- 21** Tokoden sekaniyan o lima ko,
na pekabageren pen o barokan aken.
- 22** Da den a ridoay a ba rekaniyan pekabinta
aya pen o ba aden a makarasay ron a marata a taw.
- 23** Sesaan ko so manga soranga iyan sii ko danga iyan,
ago siksaan ko so siran oto a pekegowad on.
- 24** Magonot rekaniyan so kasarigi raken ago so gagaw aken,
na nggolalan ko Ingaran aken na kipangkat so gees iyan.
- 25** Pakapengoladen aken so kapaar iyan taman ko ragat,
ago so kadato iyan taman ko lawasaig a Yopratis.
- 26** Itelo niyan raken a 'Seka i Ama aken, so Tohan aken
ago so Lakongan a pepekasabet raken.'
- 27** Ito aken sekaniyan a kaka a wata aken
a aya lebi a maporo ko manga dato sa doniya.
- 28** Iteros aken so kapepangalinggagaw aken on sa dayon sa dayon,
na da den a ikepos o kapasadan aken mipantag rekaniyan.
- 29** Tetapen ko so kebabadan rekaniyan sa taman sa pakataman

ago so korsi iyan sa taman ko kaaaden o manga langit.

30 "O pekalipati o manga wata iyan so Kitab aken
ago di iran ipenggolalan so manga kokoman aken;

31 O sogoka iran so manga taritib aken
ago di iran tomanen so manga sogoan aken,

32 Na ipemadas aken kiran so manga sala iran
ago ipeleped aken kiran so kadostaan iran;

33 Ogaid na di aken den rekaniyan mbelagen so gagaw aken,
aya pen o ba aken barobaa so kasasarigi raken.

34 Di aken den sogoken so kapasadan aken
aya pen o ba aken alina so miyatero o modol aken.

35 Miyakaisa a minisepa aken ko kasosoti aken;
di ako den pemokeg ko Daod.

36 So kebabadan rekaniyan na ketatap sa taman sa pakataman,
ago so pen so korsi iyan sii ko hadapan aken a lagid o alongan.

37 Pakapembekenen ai sa dayon sa dayon a lagid o olan
a giyangkoto a kasasanaan a saksi sii sa kawang."

38 Ogaid na tanto ngka a kiyararangitan so miyapili i ka a dato;
na inibowang ka sekaniyan ago tiyalikodan ka.

39 Piyakadaan ka sa bali so kapasadan ka ko oripen ka,
na piresikan ka ko bayanek so sangkad iyan.

40 Initobak ka so langon a manga pangeleban o siti niyan,
na pinggegeba a ka so manga kota iyan.

41 Di sekaniyan dii tebanan o langon a pepamanagad on;
pekowaan sekaniyan a diyaman o manga siringan iyan.

42 Iniporo o ka so kawanana a lima o manga soranga iyan;
piyakikeriyalaan ka so langon a ridoay niyan.

43 Kilid ka pen so garangan o pedang iyan
na da ngka sekaniyan pamayandegen ko katidawa.

44 Piyakada a ka so bantongan iyan,
ago pipad ka so korsi iyan ko lopa.

45 Sipok ka so manga gawii a kangodai ron;
piyotos ka sekaniyan a kayaan.

46 Ay katey niyan, ya Allah?

Ba taman sa pakataman a kapageenaa ngka ko ginawa ngka?

Ay katey a kasosokeyaw o rarangit ka a datar o apoy?

47 Tatademi ngka so kasasagad o omor aken.

Sayana den a da a gona niyan a iniaden ka ko langon a manosiya!

48 Antawaa i makapeginetaw a di pekaokit ko kapatay
aya pen o ba niyan milidas so niyawa niyan ko kapaar o kobor?

49 Hey Kadnan, anda den so miyanga oona a poriba o gagaw ngka
a minisepa a ka ko Daod ko kasasarigi reka?

50 Tanodi ngka, Kadnan, so kapepanonongkaa raken a oripen ka,
ago so kiaawiden a akal aken ko manga panonongka o madakel a taw

51 A inipagongatongat o manga ridoay ngka, ya Allah,
a inipagongatongat iran ko oman i kapelakad o miyapili i ka a dato.

52 Mapopodi so Allah sa taman sa pakataman.
Amin. Amin.

IKAPAT BAGI

Sabor

90-106

SABOR 90

Pangangarapan o Mosa

Hey Kadnan, seka den i babalingan ami
ko langon o miyanga iipos a kapepamagapidapid o masa.

2 Sa da pen kibayanen ko manga palaw
o di na so kiyalimbaga ngka ko lopa ago so doniya,
apiya ipoon sa poonan ago taman sa pakataman na seka den i Tohan.

3 Pepakasonoden ka so manosiya ko bayanek a di ngka dii teroon a
"Sonod kano, hey manga wata o manosiya."

4 Ka so makasanggibo ragon ko kapembilanga ngka on
na datar bo o kagai a miyaiapos den,
o di na lagid o sapokaw sii ko kagagawii.

5 Pepayopasen ka so manosiya a datar o reges;
somasagad siran baden a datar o kapakatorog.

Lagid siran o otan a pereti ko kapipita

6 A apiya pen sii ko kapipita na pegto ini ago lomolombay
na amay ka magabi na kelas ago kelayon.

7 Matamataan a pekeiped kami o rarangit ka
ago pepanga aalek sabap ko gani ngka.

8 Tiyago o ka ko kabebelengan ka so manga kadostaan ami
ago so mapageema a manga dosa mi sii ko kalilindawan on o kamamasaan ka.

9 Ka pepamanagad so langon o manga gawii ami a mapapadalem ko rarangit ka;
pekepopos so manga ragon ami a lagid o kapengginawa sa madalem.

10 Aya kalendo o omor ami na pito polo ragon,
o di na walo polo ragon o aden pen a bager ami.

Ogaid na so kipepaginetaon ami ron na baden kandokaw ago rata a ginawa.
ka magaan bo a kasegad iran, na kedadas kami bo.

11 Antawaa i matao ko bager o rarangit ka?

Ka so gani ngka na lagid sa kala o kipekeleken reka a mapapatot reka.

12 Kagiya ka maoto na pangendaon ka rekami so kapamagitong ko manga gawii ami
kaan mapamola so ongangen ko poso ami.

13 Lokei kami ngka, ya Allah! Ay katey niyan?
Pangalinggagaon ka so manga oripen ka.

14 Pakaosoga kami ngka ko gagaw ngka oman mapita
kaan kami makapagidaida sa kapekebabaya
ago makapiya a ginawa mi ko langon o manga gawii ami.

15 Pakapiyaa ngka a ginawa mi a lagid sa kadakel o manga gawii a kiyarasaya ngka
rekami,
a lagid sa kadakel o manga ragon a kiyapakapanagad ami ron sa marata.

16 Mapakiilay ko manga oripen ka so galebek ka
ago so bantogan ka sii ko manga moriyataw iran.

17 Misarta rektano so limo o Kadnan a Tohan tano.
Pakabolosa ngka sa mapiya so galebek o manga lima mi,
oway, pakabolosa ngka sa mapiya so galebek o manga lima mi.

SABOR 91

So Tohan a Magiipat Rektano

Saden sa komakaden ko kalilindongan o Lebi a Maporo
na pekadarpa ko along o Lebi a Mabager.

2 Peteroon ko ko Allah a "Seka i apasa aken ago kota,
a aya ko Tohan a sasarigan aken."

3 Matamataan a sekaniyan i pekalidas reka ko litag o panganganop
ago sii ko pekapatay a paniyakit.

4 Ndalongan ka niyan ko bombol iyan,
na sii ko didalem o manga papak iyan na ron ka pekaapas;
so kasasarigi rekaniyan na aya ngka kelong ago raben.

5 Di ngka den ikewan so piyakalekelek igira a kagagawii
o di na so gasa a pelayog ko kadadaondaw,

6 O di na so paniyakit a magaayan ko maliboteng,
aya pen o ba so kabinasaan a pemakalaslal ko keoto a alongan.

7 Ka apiya pen penga ooteng so nggibowan ko kilid ka
ago sapolo nggibo sii ko kawanan ka
na di reka den ai pekadaseg.

8 Pakapembantay baden so manga mata ngka
ko kapagilaya ngka ko kandanega ko manga rarata.

9 Kagiya so Lebi a Maporo a aya ngka apasa na miyabaloy ngka pen a babalingan ka

10 Na da den a marata a ba reka pekatana
aya pen o ba aden a kasiksaan a makadaseg ko barombarong ka.

11 Ka sagoon iyan so manga malaikat iyan mipantag reka
sa kapagipata iran reka ko langon a di ngka dii nggolaolaan.

12 Papaladen ka o manga lima iran
kaan di kisosong so ai ngka ko ator.

13 Ndapoan ka so arimaw ago so darpo;

pelomegen ka so mangoda a arimaw ago so nipay.

14 "Sabap sa pekebabayaan ako niyan," a tig o Allah, "na penabangan ko sekaniyan; pelindingen aken den ka kagiya kikilalaan iyan so Ingaran aken.

15 Telowan ako niyan na pagamponen ko sekaniyan; keped ako niyan sii ko masa a kasasamok; pokasen aken ago ipengkat aken sekaniyan.

16 Ipesoasoat aken on so malendo a omor na pekiilay aken on so kapepanabet aken."

SABOR 92

Kadikir sa Podi

Sayana a mapiya so kapepanalamati reka, ya Allah ago so kapendidawa a manga podi ko Ingaran ka, hey Lebi a Maporo,

2 Ago so kapepakalangkapa ko gagaw ngka oman mapita ago so kasasarigi reka oman gagawii

3 A sasartaan o sengkoan o sapolo i tapes a kotiyapi ago so boniboniyana a alpa.

4 Ka piyakapiya ngka a ginawa ko a nggolalan ko miyanggolaola ngka, ya Allah; pepagidaida ako sa kapekebabaya sabap ko miyanga papasad o manga lima ngka.

5 Sayana a kababantogan so manga pasad ka, ya Allah; tanto a madalem so manga pamikiran ka!

6 So boda a taw na di niyan katawan, ago so pen so manga lalong na di iran kesabot

7 A apiya pen mereretok so manga rarata a taw a datar o otan ago pepekarimpoong so langon a dii mbabaradosa na ba siran baden kebinasa sa dayon sa dayon.

8 Ogaid na seka, ya Allah, na lebi a maporo sa taman sa pakataman.

9 Ka matamataan a so manga ridoay ngka, matamataan a so manga ridoay ngka na penga dadadas; kiparak so langon a dii mbabaradosa.

10 Ogaid na inipangkat ka so panga aken a lagid o manga panga o maila a mama a sapi; kiyalanaan ako sa bago a lana.

11 Kiyabantayan o manga mata ko so kiyatabana ko manga soranga aken, na miyaneg o tangila ko so kiyabinasa o manga rarata a romirido raken.

12 So manga oontol a taw na pemakarimpoong a lagid o kayo a korma; pamangeto siran a datar o kayo a sidro sa Libanon.

13 Sii siran miyapamola ko Walay o Allah, na pekarimpoong siran ko manga lamalama o Tohan tano.

14 Pemangonga siran pen sii ko kapenga lolokes iran a lalayon siran malimegas ago pepemakalombay

15 A pepayagen iran a "Matito so Allah;

sekaniyan i Lakongan aken, na da den a ba on di ontol."

SABOR 93

So Allah i Dato

Ndadato so Allah, ndiditar sekaniyan sa menang;
ndiditar so Allah sa menang na sesambitan pen sa bager.
So doniya na makambebeke piyapiya a di den kiiseg.
2 Makambebeke so korsi i ka ipoon ko miyanga oona a gawii;
kapapantagan ka den ipoon ko da a poonan iyan a masa.

3 Minigorong o manga ragat, ya Allah,
minigorong o manga ragat so kapendaleg iran;
minigorong o manga ragat so manga ala a begel iran.

4 Ogaid na mabager a di so daleg o madakel a ig,
ago mabager a di so manga ala a begel sa ragat,
na mabager so Allah roo sa poro.

5 Tanto a matatangked so manga taritib ka;
so kasosoti na aya domadait ko Timplo ngka, ya Allah, sa taman sa pakataman.

SABOR 94

So Tohan i Pepangokom ko Langon Taman

Ya Allah, a so Tohan a peseop,
hey Tohan a peseop, na peyag ka.

2 Mbowat ka, hey Pepangokom ko doniya;
badalen ka ko pepamangimporoan so patot kiran.

3 Ay katey a dii kakeriyala o manga rarata a taw;
ay katey niyan, ya Allah?

4 Di siran dii teyak sa katekabor;
dii mbantogan so langon a dii mbabaradosa.

5 Pesesaan iran so manga pagtaw ngka, ya Allah;
pepelolopiten iran so kawali ngka.

6 Pegimatain iran so manga balo ago manga mananangga,
na pembonoon iran so manga ilo.

7 Na di iran dii teroon a "Kena a ba ini pekeilay o Allah
aya pen o ba ini tatagoa sa ginawa o Tohan o Yakob."

8 Sabota niyo ai, sekano a manga boda ko manga taw;
sekano a manga lalong, anda i kapekaongangen iyo?

9 Ba so miyamola ko tangila na di pekaneg?

Ba so miteong ko mata na di pekailay?

10 So dii mbonget ko manga nasiyon na ba di pendadaneg?

So pepangendao ko manosiya na ba korang i katao?

11 Katawan den o Allah so manga pamikiran o manosiya;

katawan iyan a matag baden ai sengaw.

12 Rarakmatan so taw a pepakatanoren ka, ya Allah,
a ipepangendaon nga on so kitab ka

13 Kaan ka sekaniyan mapakadeke sii ko manga gawii a kamaregenan
taman sa makalot so galebo a keologan ko manga rarata a taw.

14 Ka di imbowang o Allah so manga pagtaw niyan
aya pen o ba niyan talikodi so kawali niyan.

15 So kapangokom na pembaloy peroman a maontol,
na so langon o manga titito i poso na pemangonot on.

16 Antawaa i magampil raken sa kasopaka ko ko manga rarata a taw?

Antawaa i pemayangdegen raken sa kasopaka ko ko dii mbabaradosa?

17 Opama ka da ako katabangi o Allah

na magaan ako den ai makakaden ko darpa o karerenek o kapatay.

18 Isako teroon ko a "Pekidolas so ai aken,"

na so gagaw nga, ya Allah, na minitokod raken.

19 Igira a tanto a miyakaawid a akal aken

na so kaperinawi nga raken na aya ko ipekebabaya.

20 Ba ka mipageepeda o di ontol a manga pangongokom

a pepemakambaal sa kasasamok a dii makanggolalan ko manga kokoman?

21 Pepagopakatan iran sa marata so manga oontol

na peselaan iran sa kapatay so da a sala iyan.

22 Ogaid na so Allah i lindonga aken,

a so Tohan ko a aya ko lakongan a apasa aken.

23 Itena iyan kiran so manga dosa iran

na mbinasaan iyan siran sabap ko kamarataan iran;

so Allah a Tohan tano na polangen iyan siran.

SABOR 95

Idaida a Podi

Itano, ka pagidaidaan tano sa kapipiya a ginawa so Allah;

melalalis tano sa kapekebabaya ko Lakongan a pesebet rektano.

2 Mangadap tano rekaniyan a pepanalamat,

na pagidaidaan tano sekaniyan sa matanog

a sasartaan o dii kamboboniboniyen.

3 Ka so Allah na aya mala a Tohan,

ago so mala a Dato a maporo a di so langon a tohan.

4 Sii sa lima niyan so manga kadaleman ko doniya,

na rek iyan so manga lipompongan o manga palaw.

5 Rek iyan pen so kalodan, ka sekaniyan i mimbaal on,

na linimbag o lima niyan so kalopaan.

6 Itano roo, ka romoko tano sa kasimba;

somodiyod tano ko hadapan o Allah a miyaden rektano.

7 Ka sekaniyan i Tohan tano,
na manga taw tano a aya niyan talon,
a so manga bilibili a tatagikoren iyan.

O ba niyo bo pekinega imanto so sowara niyan!

8 Di niyo pekategasa so manga poso iyo a datar o manga apo iyo sii sa Miribah,
a datar o siyowa iran sangkoto a gawii sii sa Masah ko disirto

9 A ron ako iran tipengan ago tiyokawan
apiya pen kiyabantayan iran so miyanggolaola ko.

10 Sii ko soled o miyakapat polo ragon na kiyarangitan aken angkoto a manga taw;
pitero aken a "Siran so manga taw a pekedadag so manga poso iran,
na da iran den katokawi so manga okitokit aken."

11 Kagiya ka maoto na inisepa aken ko kiyarangiti raken
a "Di siran den pekasoled ko dedekean ko."

SABOR 96

So Tohan a Pipeporoan a Dato

Pagidaidai niyo so Allah sa bago a dikir;
pagidaidai niyo so Allah, hey dalem a doniya.

2 Pagidaidai niyo so Allah, na podiya niyo so Ingaran iyan;
gawii gawii den na pakalangkapa niyo so kapepanabet iyan.

3 Payaga niyo so bantogan iyan sii ko manga nasiyon
ago so manga piyakamemesa niyan sii ko langon a manga bangsa.

4 Ka mala so Allah a sayana a mapopodi;
patot a lebi a kipekeleken on a di so langon a tohan.

5 Ka so langon a katohanan o manga nasiyon na matag baden barahala,
ogaid na so Allah i miyakambaal ko manga langit.

6 Oonotan sekaniyan o menang ago pangkatan;
so bager ago kataid na sisii ko soti a darpa iyan.

7 Papalada niyo ko Allah, hey manga bangsa o manga taw,
papalada niyo ko Allah so bantogan ago bager.

8 Papalada niyo ko Allah so bantogan a kak o Ingaran iyan;
wit kano sa pamemegayan na soled kano ko manga lamalama niyan.

9 Simba kano ko Allah a ndiditar kano sa kasosoti;
tebeker kano ko hadapan iyan, hey dalem a doniya.

10 Teroa niyo sii ko manga nasiyon a "Ndadato so Allah."
Miyapakambeken so doniya a di den kiiseg;
kokomen iyan so manga taw sii ko katito.

11 Mabebaya so manga langit, makapiya a ginawa o doniya;
domaleg so ragat ago so langon a madadalem on;

12 Makakeriyala so manga pangomaan ago so langon taman on.

Samaoto na pemagidaida sa kakebebaya so langon a kayo sa kalasan;

13 Pemagidaida siran sii ko hadapan o Allah, ka pekaoma sekaniyan;

pekaoma sekaniyan sa kakokoma niyan ko doniya.
Kokomen iyan so doniya sii ko kaontol,
ago so manga taw sii ko katitito niyan a benar.

SABOR 97

So Tohan a Lebi a Mamaapaar a Dato

Ndadato so Allah; pakapiyaa ngka a ginawa ngka, hey doniya;
kabebaya kano langon a manga polo sa ragat.

2 Mililibet rekaniyan so manga gabon ago maliboteng;
so kaontol ago so katito na aya kaonayan ko korsi iyan.

3 Manongonaan rekaniyan so apoy
a pepamanotong ko manga ridoay niyan ko mbalabala.

4 So manga kilakilat iyan na pepekalindaw ko doniya;
pekeilay ini o lopa na petebaden.

5 Pekelanag so manga palaw a datar o taro sii ko hadapan o Allah,
sii ko hadapan o Kadnan o dalem o doniya.

6 Pepakalangkapen o manga langit so kaontol iyan,
na pekeilay o langon o manga bangsa so bantogan iyan.

7 Makapekeya so langon a pepamanimba sa pimbobontalan a manga katohanan,
a so siran oto a ipetekabor iran so manga barahala iran.
Sodiyodi niyo so Allah, hey langon iyo a manga tohan!

8 Pekeneg a Siyon na mapipiya a ginawa niyan,
na mabebebaya so manga iito a inged sa Yodah
sabap ko manga kokoman ka, ya Allah.

9 Ka seka, ya Allah, i Lebi a Maporo ko dalem a doniya;
lebi ka a maporo a di so langon a tohan.

10 Sekano a pekebabaya ko Allah, na kagowaden iyo so marata,
ka pepagipaten iyan so kaoyagoyag o manga kaom iyan,
na pembokaan iyan siran ko lima o manga rarata.

11 So kaliwanag na pesindaw ko manga oontol
ago so kapipiya a ginawa sii ko manga titito i poso.

12 Kabebaya kano sii ko Allah, hey manga oontol,
na panalamati niyo sekaniyan ko kapeketademi niyo ko kasosoti niyan.

SABOR 98

So Allah i Pengokom ko Doniya

Pagidaidai niyo sa bago a dikir so Allah,
ka minggolaola sekaniyan sa manga piyakamemesa.
Ininggolalan o kawatan a lima niyan ago so soti a barokan iyan so kiyapakataban iyan.

2 Piyakitokawan den o Allah so kapepanabet iyan,
ago miyapayag iyan so kaontol iyan ko kapegilaya on o manga nasiyon.

3 Kiyatademan iyan so da a ikeda iyan a gagaw niyan

ago so kasasarigi rekaniyan sii ko manga mbawataan o Israil,
na miyailay o langon a taw ko pirowarowangan o doniya
so kapepanabet o Tohan tano.

4 Pelalalis kano sa kapekebabaya ko Allah, hey dalem o doniya;
pameseg kano sa matanog ago pagidaida kano sa manga podi
a sasartaan o dii kamboboniboniyon.

5 Pangotiyapii niyo so Allah,

pangotiyapii niyo, a rakes o oni a kapamagidaida,

6 A sasarenganen o manga kornita ago so oni a kapepamogiyong;
pelalalis kano sa kapekebabaya ko hadapan o Allah a so Dato.

7 Daleg ka, hey ragat ago so langon a madadalem reka,
giya doniya ago so langon a kibabaling on.

8 Ndadaopay kano a manga lawasaig,

pagidaida sa kapekebabaya, hey langon iyo a manga palaw;

9 Pagidaida kano sii ko hadapan o Allah

ka pekaoma sekaniyan sa kakokoma niyan ko doniya.

Kokomen iyan so doniya ko kaontrol,

ago so manga taw sa da a kaperamiramig on.

SABOR 99

So Tohan a Lebi a Mamaapaar a Dato

Ndadato so Allah;

Tebeker kano a manga nasiyon.

Kokorsi sekaniyan ko kaporoan o piyagtaotaw a manga malaikat ko Kaban sa Kapasadan;
pelinog ka, hey doniya.

2 Mala so Allah sii sa Siyon;

mipapangkat sekaniyan a maporo ko langon a nasiyon.

3 Mapodi iran so kababantogan ago piyakalekelek a Ingaran iyan,
ka soti sekaniyan.

4 Hey mabager a Dato, pekebabayaan ka so kokoman,

miyapakambeken ka den so katitito;

ininggolalan ka so kokoman ago kaontrol

sii ko manga mbawataan o Yakob.

5 Bantoga niyo so Allah a Tohan tano

ago simba kano sii ko dadapoan iyan;

soti sekaniyan.

6 So Mosa ago so Aron na ped ko manga imam iyan,

na so Samowil na ped ko miyamananalo ko Ingaran iyan;

miyananalo siran ko Allah na inampon iyan siran.

7 Sii ko mapopolaos a gabon na inimbitiyarai niyan siran,

na tiyoman iran so manga sogoan iyan ago manga taritib a inibegay niyan kiran.

8 Ya Allah a Tohan ami, na inampon ka so manga pagtaw ngka;

sii ka kiran a paririla a Tohan
apiya pen inidaneg ka kiran so manga dosa iran.

9 Bantoga niyo so Allah a Tohan tano
ago simba kano roo ko soti a palaw niyan,
ka soti so Allah a Tohan tano.

SABOR 100

So Kadikir sa Podi

Pelalalis kano sa kapekebabaya ko Allah, hey dalem a doniya.

2 Panalagadi niyo so Allah sa kapipiya a ginawa;
pangadap kano ron a pepamagidaida sa kapekebabaya.

3 Kilalaa niyo a so Allah i Tohan.

Sekaniyan i mimbaal rektano, na rek tano niyan;
sektano i manga pagtaw niyan, a so manga bilibili a tatagikoren iyan.

4 Soled kano ko manga gimowa iyan a rakes o kapepanalamat,
ago sii ko manga lamalama niyan a sarta o kapepemodi;
panalamati niyo sekaniyan ago podiya niyo so Ingaran iyan.

5 Ka mapiya so Allah; da a ikeda o gagaw niyan,
na matatatap so kasarigi ron sii ko langon a kapepamagapidapid o masa.

SABOR 101

So Initopa o Dato

Ipegidaida aken so gagaw ago so katito;
seka, ya Allah, i pegidaidaan ko sa podi.

2 Pagiktiyaran ko o ba o ba aden a daway o sowasowai aken;
anda i kapekatalingoma ngka raken?

Maginetaw ako a maliwanag i poso sii ko soled o walay aken.

3 Da den a tegoon ko a marata ko danga o manga mata ko.

Ipekegowad aken so manga olaola o siran oto a petelikod ko Allah;
di raken den ai pekakapet.

4 So bibid a poso na pengimbelag raken;
da den a kamarataan a ba aken tegoa sa ginawa.

5 Apiya antawaa i pepamaganta ko siringan iyan sa masolen
na mbinasaan ko sekaniyan;
saden sa mipoporo so manga mata niyan ago dii tekabor so poso iyan
na di aken pesebaran.

6 Aya pagilain ko a limo sii ko inged na so kipaparatiyaya
kaan siran raken makakaden;
saden sa da a daway o sowasowai niyan
na aya raken makapenalagad.

7 Da den a pepagakal a ba pekakaden ko walay aken;
da den a pepamokeg a ba makatindog ko kamamasaan aken.

8 Oman kapita na pembinasaan ko so langon a manga rarata ko inged
sa kapegosipa ko ko oman i dii mbaradosa sii ko siti o Allah.

SABOR 102

Pamakinega ngka so kapepangangarapan aken, ya Allah;
misampay reka so kapenggoraok aken sa tabang.

2 Di ngka raken pegmaa so paras ka igira a kareregenan ako.

Lekai ngka raken so tangila ngka;
ampona ko ngka nggagaan ko katelowi aken reka.

3 Ka dii senaw so manga gawii aken a lagid o bel,
na pepowaga so manga tolan aken a datar o sisii ko apoy.

4 Pesakit so poso aken ago pekelayon a lagid o otan
ka apiya so kakena ko ko pangenengken aken na pekeliwatan ko.

5 Sabap ko matanog a di aken dii kapakaperego
na domedeket so kobal ko tolan aken.

6 Lagid ako o banog sii ko disirto,
ago lagid o bengit ko matatanaw a kaden.

7 Pegiga ako a di torogen;
miyabaloy ako a lagid o matatawantawan a kenti sii ko atep o walay.

8 Mababasa alongan a kapepagitowitoa raken o manga ridoay aken;
so pepemagongatongat raken na miyakowa iran a sinta so ngaran aken.

9 Ka aya peken aken a pangenengken na so ombi,
na pekisaog so manga lo aken ko peginomen aken

10 Sabap ko tanto reka a kapekerarangiti,
ka piyorot ako ngka ago inidebak.

11 So manga gawii aken na lagid o along ko perimon,
na pekelayon ako a lagid o otan.

12 Ogaid na seka, ya Allah, na matatatap sa taman sa pakataman,
ago so kababantogi reka sii ko langon o kapepamagapidapid o masa.

13 Magembowat ka ago ikepedi i ka a Siyon,
ka imanto i masa a kipengalimoon ka on;
miyakatalingoma den so miyatendo a masa.

14 Ka pekebabayaan o manga oripen ka so manga ator on;
apiya so bayanek on na ipekepedi iran.

15 Matamataan a ikelek o manga nasiyon so Ingaran o Allah,
na peselasalan o langon a dato sa doniya so bantogan iyan

16 Amay ka mbangonen peroman o Allah a Siyon
ago gomemaw sekaniyan sii ko bantogan iyan.

17 Pegamponen iyan so kapepangangarapan o kikadodowaanan,

ka di niyan pesodiin so manga pangni iran.

18 Misorat ai ko pekasalono a manga taw
kaan makapodi ko Allah so da pen mimbabawata:

19 "Tomiyolong so Allah roo ko soti a darpa iyan sa poro;
roo sa kasorgaan na tiyobos iyan milay a doniya

20 Sa kapemamakinega niyan ko kapakapepereg o kikabibiyag
ago an iyan kabokai so siran oto a miyatendo a mbonoon."

21 Samaoto na peselaselaan so Ingaran o Allah sa Siyon
ago so podi niyan sii sa Yarosalim

22 Igira a dii makatetalabok so manga bangsa ago so manga ndatoan
sa kasimbaa iran ko Allah."

23 Sipok iyan so bager aken ko kangodai raken pen;
piyakababa iyan so omor aken.

24 Na pitero aken a "Hey Tohan ko, di ako ngka terimaa imanto a da pen kalooki so omor
aken,

hey seka a matatatap so manga ragon ka ko langon a kapepamagapidapid o masa."

25 Sii ko miyanga oona a gawii na miyabangon ka so manga onayan o doniya,
na so manga langit na pasad o manga lima ngka.

26 Penga ada siran, ogaid na tatap ka den;
palaya siran penga roronot a lagid o nditaren.

Datar o bangkala a sembian ka siran
na kipilak siran baden.

27 Ogaid na di ka den kealin,
na da den a kaposan o manga ragon ka.

28 So manga wata o manga oripen ka na pemakakaden ko kamamasaan ka,
na so penga babadan kiran na pakapetiknaan sii ko hadapan ka."

SABOR 103

So Gagaw o Allah

Podiya ngka so Allah, hey niyawa ko.

Hey, dalem a ginawa ko, podiya ngka so soti a Ingaran iyan.

2 Podiya ngka so Allah, hey niyawa ko,
na di ngka pelipati so langon a kamapiyaan iyan reka.

3 Iperila iyan so langon a dosa ko,
ago pembolongan iyan so langon a gedamen aken.

4 Pegaonen iyan so kaoyagoyag aken ko kobor
ago pesengkadan ako niyan sa gagaw ago kapedi.

5 Pepakaosogen iyan so kaoyagoyag aken sa manga pipiya a nganin
a aya kapepekaasal o kangoda ko a datar o agila.

6 Dii nggolalan o Allah so kaontol ago kokoman
para ko langon a kilolopiten.

7 Piyakitokawan iyan ko Mosa so manga takdir iyan,
na piyakiilay niyan ko manga taw sa Israil so manga galebek iyan.
8 Masalinggagaw ago makalimoon so Allah,
a kena a ba malebod kararangiti ago mala i kapedi.
9 Kena a ba sekaniyan lalayon dii mbonget
aya pen o ba niyan pakaangeda sa ginawa sa dayon sa dayon so oteg iyan.
10 Kena a ba niyan rektano ipetena so patot ko manga dosa tano
aya pen o ba niyan rektano badalen so makaaayon ko manga kamarataan tano.
11 Ka lagid sa kaporo a langit sii sa doniya
so kala o gagaw niyan ko siran oto a maaleken on;
12 Na so kawatan a sebang an sa sedepan
na aya den kawatan a kiyabelaga niyan rektano ko manga sala tano.
13 So kikakapediin o ama ko manga wata iyan
na aya mambo kipekapediin o Allah ko siran oto a maaleken on.
14 Ka katawan iyan o antonaa i pimbaalan rektano;
katatanodan iyan a matag tano baden bayanek.

15 Makapantag ko manosiya na so omor iyan na lagid o otan,
ka pepekalombay sekaniyan a datar o obarobar ko pangomaan,
16 Na amay ka samberen a ndo na keda bo ini,
na di den ketademan o darpa iyan.
17 Ogaid na ipoon sa poonan na taman den sa pakataman
so kipepangalinggagaon o Allah ko siran oto a maaleken on,
na tatap pen so kapagiinontolani niyan ko manga wata o manga wata iran
18 A so siran oto a petoman ko kapasadan iyan
ago tomatanod ko manga sogoan iyan sa kapeperatiyayaa iran on.

19 Piyakambeken o Allah so korsi iyan roo sa kasorgaan,
na so ndatoan iyan na aya mamaapaar ko kalangolongan.
20 Podiya niyo so Allah, hey manga malaikat iyan
a mangaala i gees a tomotoman ko ipesogo iyan
ago pepamaratiyaya ko manga katero iyan.
21 Podiya niyo so Allah, hey langon a manga kaaden iyan sa kasorgaan,
a so pepamanalagad on a dii nggolaola ko kabaya iyan.
22 Podiya niyo so Allah, hey langon a miyanga papasad iyan
sii ko pirowarowangan o ndatoan iyan.

Podiya ngka so Allah, hey niyawa ko.

SABOR 104

So Podi ko Miyangaden

Podiya ngka so Allah, hey niyawa ko.
Ya Allah a Tohan ko, tanto ka a kababantogan.
Ndiditar ka sa menang ago pangkatan;
2 Kokokosan ka a ginawa ngka sa tihaya a datar o gerab.
Kiyayat ka so manga langit a datar o sayap

3 Na inibetad ka ko manga ig on so manga dolog o manga rowang ka sa poro.
Pembalowin ka a karo ngka so manga gabon,
na pepegeda ka ko manga papak o ndo.

4 Pembalowin ka so manga ndo a manga talasogoay ngka,
ago so manga kadeg o apoy a aya reka pepemanalagad.

5 Biyangan ka so doniya ko manga kaonayan on,
na di den kiiseg sa taman sa pakataman.

6 Inisapeng ka on so kalodan a lagid o nditaren,
na somiyangkap so manga ig ko poro o manga palaw.

7 Ogaid na sii ko kiyambongget ka na miyamalagoy so manga ig;
sii ko kiyani o dalendeg ka na miyamangawa siran nggagaan.

8 Miyamanoga siran ko liyawaw o manga palaw,
na miyamangondas sa baba ko manga balintad
roo ko darpa a singgayan ka kiran.

9 Mitad ka sa temanaan a di iran kelepas
kaan di den kapeperomani a kiyalapayi ran ko doniya.

10 Pepamakambowaten ka so manga bowalan,
na pepemanoga so ig ko manga baogan
ago pepemangondas ko pageleteletan o manga bobongan.

11 Pepekabegay ini sa panginginomen ko langon a binatang sa kalasan;
so manga iila a kimar na pepemolong siran on sa kawaw.

12 Dii sesalag so manga papanok ko marani ron a manga kayo;
di siran dii mamagoniyoniya sii ko manga sapak.

13 Poon ko manga rowang ka sa poro na pepakioranan ka so manga bobongan;
mipepeno ko doniya so onga o manga galebek ka.

14 Pepakatoon ka so manga otan a mapepenateb o manga pangangayamen,
ago so manga pamomolan a pekealimaan o manosiya
kaan siran makakowa sa pereperan ko lopa,

15 A so arak a ipekapiya o poso o taw,
so lana a ipekatenang o paras iyan,
ago paan a ipekabager o poso iyan.

16 So manga kayo o Allah na pepanga rarames piyapiya,
a so manga kayo a sidro sa Libanon a piyamola niyan.

17 Di on dii sesalag so manga papanok;
so talik na aden a walay niyan ko manga kayo a goo.

18 So manga poporo a palaw na aya kakadenan o manga saladeng,
na so manga ala a ator na aya apasa o manga taksing.

19 Inaden ka so olan a ipenanao ko manga mosim,
na katao den o alongan i kasedep iyan.

20 Ipetelingoma ngka so maliboteng, na pekegagawii
a mipegenebened o langon a binatang sa kalasan.

21 Pepemangengger so kangodaan a manga arimaw sii ko kapepanganopa iran ko kesikem iran

a pepelolobaan iran so pangenengken a ipepegeper kiran o Allah.

22 Igira a pesebang so alongan na peliso siran komasoy sa kapeleko iran ko manga lowak iran.

23 Samaoto na peliyo so taw sa kapenggalebek iyan a matetembang sekaniyan on taman ko perimon.

24 Sayana a madakel a manga pasad ka, ya Allah.

Nggolalan ko ongangen na kiyambaalan ka ini langon; mapepeno so doniya a manga kaaden ka.

25 Ndodon so ragat a mala ago maolad a madadalem on so di den keitong a dii melalangoy, a so manga baraniyawa a manga ala ago manga roroni.

26 Di on dii melalayayag so manga kapal, na ndodon pen so Lebiyatan, a so mala a binatang a linimbag ka a makapesola on.

27 Palaya ini reka somasana

sa kambegi ngka kiran sa makan iran sii ko matetendo a manga wakto.

28 Ipembegay ngka kiran na peken iran; pembekaren ka so lima ngka

na pepanga oosog siran sa manga pipiya a nganin.

29 Igira a pepagemaan ka so paras ka na pepanga sososa siran; igira a pepangowaan ka siran sa napas

na pepematay siran ago pepemakasonod ko bayanek a kiyapoonan iran.

30 Na igira a pepakalayagen ka so Roh ka na pepanga aaden siran, na pembagon ka so matatago ko liyawaw o kalopaan.

31 Matatap so bantogan o Allah sa dayon sa dayon; mabebaya so Allah ko manga pasad iyan.

32 Petobosen iyan a doniya na petebaden ai; pesekoon iyan so manga palaw na petegebel siran.

33 Pegidaidaan ko so Allah ko tenday a omor aken.

Ndidaon aken a manga podi so Tohan aken taman ko kaooyaoyag aken pen.

34 Masoat sekaniyan sangkai a manga pamikiran aken, ka ipekebabaya aken so Allah.

35 Maosip so manga baradosa ko doniya, ago mada den so manga rarata a taw.

36 Podiya ngka so Allah, hey niyawa ko.

Podin so Allah.

SABOR 105

So Tohan ago so manga Pagtaw niyan

Panalamati niyo so Allah, na talowi niyo so Ingaran iyan;
pakitokawi niyo ko manga nasiyon so miyanggolaola niyan.

2 Pagidaidai niyo sekaniyan, didawa niyo a podi;
bantaani niyo so langon a piyakamemesa niyan.

3 Selaselaa niyo so soti a Ingaran iyan;
makapiya a ginawa o siran oto a dii mbabanog ko Allah.

4 Panagontamani niyo so Allah ago so bager iyan;
mbabanoga niyo lalayon so paras iyan.

5 Tatademi niyo so piyakamemesa a manga galebek iyan,
so manga kabarakat iyan ago manga kokoman a miyatero iyan,

6 Hey sekano a miyapamili iyan a manga mbawataan o Yakob
a so kiyababadan ko Ibrahim a oripen iyan.

7 Sekaniyan so Allah a Tohan tano;
lomalangkap ko doniya so manga kokoman iyan.

8 Tatanodan iyan so kapasadan iyan sa taman sa pakataman,
a so manga katero a inisogo iyan ko sanggibo a manga apid;

9 A so kapasadan a inembaalan iyan mipantag ko Ibrahim,
ago inisepa iyan pen ko Iskak.

10 Pimataan iyan ai mambo ko Yakob a aya den kitab,
a so da a ikeda iyan a kapasadan ko Israil

11 A tig iyan a "Imbegay aken reka so inged a Kanaan
a aya ngka bagian a makewali ngka."

12 Samaoto na kena a ba siran madakel;
mataa na maito siran i bilangan, na go mananangga siran roo.

13 Miyagenebenedeb siran a di iran dii pakatetepasaan so manga nasiyon,
a poon ko isa a ndatoan na taman ko salakaw a ndatoan.

14 Ogaid na da den a sakataw bo a ba on piperowi o Tohan a makalopit kiran,
na pimbongetan iyan so manga dato sabap kiran,

15 A tig iyan a "Di niyo petekora so miyapamili aken a manga taw;
di niyo pamaratai so manga nabi aken."

16 Piyakitanaan iyan sa taon ko inged iran,
na bininasa niyan so langon a pereperan a ipekeoyag iran.

17 Ogaid na piyakaona niyan kiran so sakataw a mama,
a so Yosop a pipesa a oripen.

18 Tigel iran romantay so manga ai niyan,
na tiyagoan sa potaw a lig iyan;

19 Na taman ko kiyatoman o miyaalamat iyan
na tipengan sekaniyan o ba benar so miyatero o Allah.

20 Piyakisogoan sekaniyan o Solotan sa Misir na biyokaan iyan;
so ndadato ko manga taw na piyakaliyo niyan sekaniyan.

21 Piyakitendingan iyan ko Yosop so walay niyan,
na piyakindatoan iyan on so langon a kaaden iyan

22 Kaan iyan mipaar so manga sanasanaan o solotan ko kabaya iyan,

ago an iyan mipengendao so kaongangen ko manga pelokelokesen kiran.

23 Samaoto na miyakasong so Yakob sa Misir,
na komiyaden roo a mananangga ko inged a Ham.

24 Na tanto a biyabad o Allah so manga pagtaw niyan;
piyakandakel iyan siran ago biyaloy niyan a mabager a di so manga ridoay iran.

25 Kilid iyan so poso o manga Imisiren sa kikagowaden iran ko manga pagtaw niyan
ago giya kapegopakati ran sa marata ko manga oripen iyan.

26 Mandiyadi na siyogo o Allah so oripen iyan a so Mosa
ago so Aron a pinili iyan.

27 Piyakiilay iran ko manga Imisiren so manga nanao o Allah,
a so manga kabarakat iyan sii sa inged a Ham.

28 Tiyalingomaan ai o Tohan sa maliboteng
na piyakalibotengan iyan so inged,
ka ba iran da masopak so manga katero iyan?

29 Biyaloy niyan a rogo so manga ig iran
a inipamatay o manga seda on.

30 Miyapeno a babak so kalopaan iran
taman ko manga rowang o manga olowan iran.

31 Mitero so Tohan, na miyakatalingoma so makapal a manga rengit
ago manga tendek ko pirowarowangan o lopa iran.

32 Biyaloy niyan a manga giyaw so oran iran
a rakes o kilakilat a pepemangitras ko inged iran;

33 Piyaminasa niyan so manga waged iran a obas ago manga kayo a higos
ago piyanarisa iyan langon so manga kayo ko lopa iran.

34 Mitero sekaniyan, na miyakatalingoma so manga tarapan,
a so bariboribo a manga roroni a tarapan,

35 Na piyangangan iran so oman i pamomolan ko inged;
piyangangan iran so langon a pereperan ko lopa iran.

36 Na piyamoto iyan pen so oman i kaka a wata a mama ko inged iran,
a so paganay a onga o langon a bager iran.

37 Oriyan iyan na piyakaliyo niyan so manga Israil a makaaawid sa pirak ago bolawan,
na da den a sakataw bo ko manga mbatabataa kiran a ba pepekalobay.

38 Miyabebaya so manga Imisiren ko kiyaawa o manga Israil
ka miyaraot siran den a kalek kiran.

39 Miyaden so Tohan sa gabon a mirending kiran,
ago apoy a pepekalindaw kiran ko kagagawii.

40 Miyangni siran na tiyalingomaan iyan sa manga pogowa
ago piyakaosog iyan siran ko roti a poon sa kasorgaan.

41 Tiyokaban iyan so lakongan na mimbawat on so ig,
na datar o lawasaig a kiyatoga iyan sii ko disirto.

42 Ka kiyatademan iyan so soti a initopa niyan
sii ko Ibrahim a oripen iyan.

43 Piyakaliyo niyan so manga pagtaw niyan a kikapipiya a ginawa iran,

a so piyamili iyan a manga taw a dii melalalis sa kapekebabaya iran.

44 Inibegay niyan kiran so manga lopa o ped a manga nasiyon, na miyatangan iran so kiyanggagalebekan o salakaw a manga taw

45 Kaan matoman o manga pagtaw niyan so manga taritib iyan ago maparatiyaya iran so manga kitab iyan.

Podiya niyo so Allah.

SABOR 106

So Kapiya o Allah ko manga Pagtaw niyan

Podiya niyo so Allah.

Panalamati niyo so Allah, ka mapiya sekaniyan; tatap so gagaw niyan sa taman sa pakataman.

2 Antawaa i makapetero ko manga ala i gees a galebek o Allah aya pen o ba niyan mapayag so langon a ipepodu ron?

3 Rarakmatan so siran oto a mananamar sa matito a kokoman a lalayon siran magiinontolan.

4 Tatademi ako ngka, ya Allah, amay ka ikelimo o ka so manga pagtaw ngka; tabangi ako ngka amay ka sebeten ka siran

5 Kaan aken mailay so kapiya i bobolos o siran oto a piyamili i ka, kaan ako makambagian ko kapekapiya a ginawa o nasiyon ka ago an ako makapangeped ko kapepamodi o kawali ngka.

6 Miyakandosa kami a datar o manga apo ami; miyakasilay kami ago miyamakanggolaola sa kamarataan.

7 Isako ndodoo so manga apo ami sa Misir na da iran tagoa sa ginawa so manga piyakamemesa ngka roo; da iran tademi so madakel a kinipangalinggagaon ka kiran ka ba siran den somiyopak roo ko kilid o Mariga a Ragat.

8 Apiya pen oto na siyabet iyan siran sabap ko Ingaran iyan kaan iyan kapakitokawi so kala iyan i kapaar.

9 Siyaparan iyan so Mariga a Ragat na kiyamaraan, na go inagak iyan siran romipag ko kalodan a datar bo o sii pegokit ko disirto.

10 Siyabet iyan siran ko lima o siran oto a pekegowad kiran; inaon iyan siran ko kapaar o manga ridoay iran.

11 Minikolob so ig ko manga ridoay iran; da den a sakataw bo a ba kiran miyasama.

12 Mandiyadi na piyaratiyaya iran so manga katero iyan, na inidikir iran so manga podi niyan.

13 Ogaid na da bo matey a kiyalipati ran ko pinggolaola niyan, na da iran nayawa so toma niyan,

14 Ka tanto siran a miyakala i napso sii ko disirto, na tipengan iran so Tohan roo ko mitataog a kaden.

15 Kagiya ka maoto na inibegay niyan kiran so piyangni iran, ogaid na tiyanaan iyan siran sa piyakalekelek a paniyakit.

16 Sii ko kampo iran na riniit iran so Mosa ago so Aron a masosoti ko Allah.

17 Na mingganga so lopa na liyamed iyan si Datan ago kiyatambonan on so pamiliya i Abiram.

18 Na sominila so apoy ko kitatampil kiran, na riyarab o kadeg angkoto a manga rarata a taw.

19 Roo sa Horeb na mimbaal siran sa inisayan sa nati a sapi na sinimba iran angkoto a barahala a tiyowang.

20 Pisembi iran so kababantogan a Tohan iran ko inisayan sa sapi a pepanateb sa otan.

21 Piyakalipatan iran so Allah a somiyabet kiran ko kiyanggolaola niyan sa manga kabarakat roo sa Misir,

22 A so manga piyakamemesa roo ko inged a Ham ago so piyamakalekelek a nganin sii ko Mariga a Ragat.

23 Sabap roo na pitero iyan a mbinasaan iyan so manga pagtaw niyan, ogaid na tominideg so Mosa a pinili iyan sii ko pageletan o Allah ago so manga pagtaw niyan

a nggenggen sekaniyan ko gani niyan kaan iran di ikebinasa.

24 Oriyan oto na pisodi iran so mapiya a inged, ka da iran paratiyayaa so initopa niyan.

25 Miyanarotaro siran baden ko soled o manga barombarong iran, na da iran pakinega so sowara o Allah.

26 Kagiya ka maoto na inisepa iyan kiran a pakapepetapatain iyan siran roo ko disirto

27 Ago iperak iyan pen so kebabadan kiran sii ko manga inged a pakapepetapatain iyan siran sii ko salakaw a manga nasiyon.

28 Roo sa Piyor na miyangeped siran somimba ko barahala a Baal ago komiyan siran ko miyamangisapaat ko da a niyawa niyan a manga katohanan.

29 Piyakaperangit iran ko Allah ko manga pinggolaola iran, na kiyatanaan siran a piyakalekelek a paniyakit.

30 Ogaid na tominideg si Pinihas na ininggolalan iyan so kokoman, na miyaren so paniyakit.

31 Na minibilang rekaniyan ai a kaontol iyan ko langon a masa sa taman sa pakataman.

32 Piyakaperangit iran peman so Allah sii ko manga bowalan sa Miribah, na kiyabinasaan so Mosa sabap kiran,

33 Ka piyakapagoteg iran so pamikiran iyan, na inolopan sekaniyan tero sa di patot.

- 34** Da iran paminasaa so manga taw ko kinisogoon on kiran o Allah
35 Ka ba siran baden miyakipelook ko manga nasiyon
ago siyowa iran so manga olaola iran.
36 Sinimba iran so manga barahala iran a aya kiran minilitag.
37 Piyangorban iran so manga wata iran a manga mama ago manga babay sii ko manga
saitan.
38 Piyakatoga iran so rogo o da a manga peleng iyan,
a so rogo o manga wata iran a mama ago babay
a inikorban iran ko manga barahala roo sa Kanaan;
na kiyaresikan sa rogo angkoto a lopa.
39 Piseboan iran a ginawa iran a nggolalan ko manga galebek iran,
na miyakasakoto siran sii ko miyanggolaola iran.
- 40** Sabap roo na somiyokeyaw so rarangit o Allah ko manga pagtaw niyan,
na inikasingay niyan so kawali niyan.
41 Piyalad iyan siran ko lima o manga nasiyon,
na kiyandatoan siran o manga taw a pekegowad kiran.
42 Piyangarasiyan siran o manga ridoay iran
ago miyapadalem siran pen ko kapaar iran.
43 Madakel den a kiyabokai o Allah ko manga pagtaw niyan,
ogaid na sii siran kakal ko kasopak,
na miyapepad siran baden sabap ko di iran dii kambaradosa.
- 44** Apiya pen oto na pekeinengka o Allah so kapekerasay iran
igira a pekeneg iyan so kapenggoraok iran.
45 Sabap kiran na tiyademan iyan so kapasadan iyan,
na lomiyoke sekaniyan sabap ko kala iyan i gagaw;
46 Na piyakikapedi iyan siran ko langon a miyamakabiyag kiran.
- 47** Sabeta kami ngka, ya Allah a Tohan ami,
na panimoa kami ngka poon ko manga nasiyon
kaan ami kapanalamati so soti a Ingaran ka
ago mabantog ami so manga ipepodi reka.
- 48** Mapopodi so Allah a so Tohan o Israil
ipoon sa pagampaganay na taman sa pakataman.
Matero o langon o manga taw a "Amin."
Podiya niyo so Allah.

IKALIMA BAGI

107-150

SABOR 107

So Podi ko Kapiya o Tohan

Panalamati niyo so Allah, ka mapiya sekaniyan;
tatap so gagaw niyan sa taman sa pakataman.

2 Matero ini o siran oto a miyanga aaon o Allah
a miyanga aaon iyan ko kapaar o ridoay,

3 A piyanimi iyan a poon ko salakaw a manga inged,
a poon sa sebang an ago sa sedepan,
ago poon sa pagotaraan ago sa pagabagatan.

4 So ped kiran na miyanga tataap ko matatanaw a disirto
a da den a ketoon iran on a lalan a kisong ko siti a kebalangan iran.

5 Miyaor siran ago miyawaw, na pekikopay so niyawa iran.

6 Samaoto na gomiyoraok siran ko Allah ko kareregeni kiran,
na piyokas iyan siran ko karomasayan iran.

7 Inagak iyan siran ko mapantek a lalan
taman sa minisampay siran ko siti a kebalangan iran.

8 Makapanalamat siran ko Allah ko da a ikeda iyan a gagaw niyan
ago so manga piyakamemesa a pinggolaola niyan ko manosiya.

9 Ka pembolongan iyan so kawaw o pekwaw
ago pepakaosogen iyan so pekeor ko manga pipiya a nganin.

10 So manga ped na kioontod ko maliboteng ago sii ko along o kapatay
a kikakalaboson ago pepanga rarasay ko manga rantay,

11 Sabap sa miyasopak iran so manga katero o Tohan
ago miyasodi iran so toma o Lebi a Maporo.

12 Kagiya ka maoto na piyaki pangalimbabaan iyan so ginawa iran ko pakadokaw a
galebek;

miyamangirepang siran na da den a ba kiran pekaogop.

13 Samaoto na gomiyoraok siran ko Allah ko kareregeni kiran
na siyabet iyan siran ko karomasayan iran.

14 Piyakaliyo niyan siran ko maliboteng ago so along o kapatay
na piseredot iyan so manga rantay iran.

15 Makapanalamat siran ko Allah ko da a ikeda iyan a gagaw niyan
ago so manga piyakamemesa a pinggolaola niyan ko manosiya.

16 Ka penggegebaan iyan so manga pintoan a tombaga
ago pepamotolen iyan so manga galid a potaw.

17 Aden a ped a miyanga lalalong ko manga olaola iran a makasosopak,
na miyanga rarasay siran sabap ko manga dosa iran.

18 Miyagowad siran ko oman i pisosonan a pangenengken,
na miyakadaseg siran den ko gimowa o kapatay.

19 Samaoto na gomiyoraok siran ko Allah ko kareregeni kiran
na siyabet iyan siran ko karomasayan iran.

20 Initoron iyan so katero iyan na biyolongan iyan siran,
na inilidas iyan siran ko kobor.

21 Makapanalamat siran ko Allah ko da a ikeda iyan a gagaw niyan
ago so manga piyakamemesa a pinggolaola niyan ko manosiya.

22 Makapalad siran on sa manga soasoat a panalamat
ago mapamanotol iran so manga galebek iyan a rakes o idaida a kapekebabaya.

23 So paman so manga ped na milayalayag ko kalodan a kipageeda sa manga kapal a di siran dii ndadagang sii ko manga ala a ragat.

24 Miyailay iran so manga galebek o Allah

ago so manga piyakamemesa niyan roo ko kalodan.

25 Ka mitero sekaniyan na miyapakasamber iyan so sobosobo a inipamakala o manga bagel.

26 Pekibayaw siran ko langit, ago pekibaba siran sa didalem; na miyateno so inam iran sii ko piyakalekelek a miyaolaola iran.

27 Pekisasawiring siran ago pekeotengoteng a datar o kikabebereg, na kiyadaan sa gona so langon a kapasang iran.

28 Mandiyadi na gomiyoraok siran ko Allah ko kareregeni kiran, na piyakaliyo niyan siran ko karomasayan iran.

29 Piyakatareg iyan so sobosobo, na lomingen so manga bagel.

30 Na miyabebaya siran kagiya makalintad, na inowit iyan siran ko misosogod a kebayaan iran domongko.

31 Makapanalamat siran ko Allah ko da a ikeda iyan a gagaw niyan ago so manga piyakamemesa a pinggolaola niyan ko manosiya.

32 Mabantog iran sekaniyan sii ko kalilimodan ko madakel a taw ago mapodi iran ko dii timotimoan o manga pelokelokesen.

33 Pembalowin iyan so manga lawasaig a disirto, ago so manga bowalan a mamara a lopa;

34 So oodaren a lopa na pembalowin iyan a matimos a da a bali niyan sabap ko kamarataan o kibabaling on.

35 Pembalowin iyan so disirto a babasaken, ago so mamara a lopa a manga bowalan,

36 Na roo niyan pepakabalinga so kikaaaor kaan iran kabangoni sa siti a kapegingedan iran.

37 Peseod siran ko dii mbabasokan ago pepamolaan iran sa manga sapadan, na mala a pekeragon iran on.

38 Rarakmatan iyan siran na tanto siran a pepekadakel, na di niyan peperon o ba kekes so manga pangangayamen iran.

39 Igira a pekekekesan so kadakel o manga pagtaw o Tohan ago di siran dii mangalimbabaaan a nggolalan ko kapelolopit, kapemorala ago kararasay

40 Na pepegitowitooon iyan so manga dato, ago di niyan siran dii pakateataapen ko da den a lalan on a mitataog a kaden.

41 Ogaid na ipenggakap iyan so kikadodowaanan a poon ko karomasayan iran na pepakadakelen iyan so manga pamiliya iran a lagid o manga talon.

42 Pekeilay ini o manga titito ago pekebabaya siran, ogaid na pepekakemed so langon o madodosa a taw.

43 Apiya antawaa i maongangen na tagoa niyan sa ginawa angkai a manga nganin

ago sabota niyan so da a ikeda iyan a gagaw o Allah.

SABOR 108

Pangni sa Kapakalidas ko Ridoay

Tetana so poso aken, hey Tohan ko.

Pegidaida ako ago pemboboniboniyen sa iklas ko ginawa ko.

2 Pagnaw kano, hey kotiyapi ago alpa;
pokaon ko so sobo.

3 Penalamatan ko seka, ya Allah, sii ko madakel a taw;
ndidaon ko seka a podi sii ko manga nasiyon.

4 Ka makaoombaw ko manga langit so mala a gagaw ngka;
na go somosoko ko manga gabon so kasasarigi reka.

5 Pakiilain ka, hey Tohan ko, so pangkatan ka a maporo a di so manga langit,
lomangkap so bantogan ka ko dalem a doniya.

6 Sabeten ka rekami so kawanen a lima ngka;
ampona ngka so pangni aken kaan kapanabangi so siran oto a pekebabayaan ka.

7 Mitero so Tohan sii ko soti a darpa iyan:

"Sii ko kakebabaya aken na pembaabaaden ko a Sikim
ago pembagibagiin aken a Balintad a Sokot.

8 Rek aken a Giliyad ago giya pen a Manasih.

Giya Ipraim i linding o olo aken;
giya Yodah na aya ko lilit a ipendato.

9 Giya Mowab na aya ko pepangonaban;
ipagitog aken sa Idomiya so tinilas aken,
na sii sa Pilistiya na ipelalis aken on so kiyapakataban."

10 Antawaa i magowit raken roo ko kokotaan a siti?

Antawaa i ndolog raken taman sa Idomiya?

11 Ba kena a seka, hey Tohan, a miyowang rekami
ago di den magonot ko manga sondaro ami?

12 Ogopi kami ngka ko manga ridoay ami
ka da a bali o tabang o manosiya.

13 Nggolalan ko Tohan na pekataban tano,
ka sekaniyan i melomeg ko manga ridoay tano.

SABOR 109

So Inipenon o Mama a Kareregenan

Hey Tohan ko a pepodin aken, di ka baden rerenek.

2 Ka so manga rarata ago pepamagakal a manga taw
na piyakangganga iran raken a manga ngari iran;
inisopak iran raken tero so pepamokey a dila iran.

3 Ililikop iran raken so manga katero iran a kagowad,
na pepemabaan ako iran sa da a sabap iyan.

4 Di ako iran dii sebaan apiya pen pekebabayaan ko siran

ogaid na ipepangangarapan aken siran baden.
5 Pembadalan ako iran sa marata ko mapiya,
na kagowad a ipembadal iran ko gagaw aken.

6 Toro ka sa marata a pekakokom ko ridoay aken,
na pakatindegi ngka sa pekadimanda on so kawanan a lima niyan.

7 Amay ka kokomen sekaniyan na pakisalaan ka;
apiya so kapepangangampedian iyan na mibilang a kasalaan.

8 Makababa so omor iyan;
na makowa o salakaw a mama so sangan iyan.

9 Mailo so manga wata iyan,
ago mabalo so karoma niyan.

10 Makapagenebened mamangni so manga wata iyan;
mabogaw siran ko miyanga bibinasa a kakadenan iran.

11 Makowa o dii totobo so langon taman iyan,
na mateban o manga mananangga so pekepantiyari niyan.

12 Da den a isa bo a makapangalinggagaw ron
aya pen o ba aden a mangalimo ko miyanga iilo a manga wata iyan.

13 Matipod so kebabadan rekaniyan,
na mapeneng so manga ngaran iran ko pekatalondog a manga taw.

14 Katademan o Allah so kamarataan o manga apo iyan,
ago di den mapeneng so dosa o ina iyan.

15 Matatap a kapekemasai o Allah ko manga dosa iran
kaan iyan matipod so kapetedemi sangkoto a manga taw ko doniya.

16 Da den pamikira angkanan a mama so kapekiilain iyan ko limo,
ka ba niyan den piyanatro so miskin a taw,
so kadodowaanan ago so maroropet i poso sa kambonoa niyan on.

17 Miyabebaya sekaniyan mamaninta;
mapato ini rekaniyan.

Da den mabebaya megay sa kamapiyaan;
makawatan rekaniyan so kamapiyaan.

18 Somiyolot sekaniyan sa sinta a lagid o ba aya niyan den nditaren;
somenep ko pito lapis a bago niyan so manga sinta iyan a datar o ig,
taman ko manga tolan iyan a datar o lana.

19 Madatar ini o gerab a manditar iyan
ago lagid o sambitan a lalayon mililiber rekaniyan.

20 Pengnin ko a giyanan den i ibalas o Allah ko siran oto a pesebap raken
a di ako iran dii mbabasaan sa marata.

21 Ogaid na seka, ya Allah a Kadnan ko,
na piyapiyai ako ngka sabap ko Ingaran ka;
sabap ko kapiya o gagaw ngka na panabangi ako ngka.

22 Ka miskin ako ago kadodowaanan,
na kiyapalian pen so poso aken.

23 Somasagad ako a lagid o along ko perimon;

miyapopog ako a datar o tarapan.

24 Kiyadaan den sa bager so manga leb aken sabap ko kiyapowasa;
piyagti ago riyakowag so lawas aken.

25 Di ako dii kela o manga taw;
igira a pekeilay ako iran na pepengelengkeleng siran baden.

26 Tabangi ako ngka, ya Allah a Tohan ko.
Sabeta ko ngka sabap ko da a ikepos iyan a gagaw ngka.

27 Na pakitokawi ngka ko manga ridoay aken a giyai na kapaar ka,
a seka den, ya Allah, i minggolaola sii.

28 Apiya o sinta siran na rakmat ka baden.
Pengnin ko a amay ka nggobat siran na makakeya siran
ogaid na mabebaya ako a oripen ka.

29 Kanditaran sa kadiyamanan so pepamanabap raken
ago kakokosan siran sa kayaan iran a datar o aya iran den gerab.

30 Tanto aken a ipenalamat ko Allah so ngari aken;
podin ko sekaniyan sii ko look o madakel a taw.

31 Ka petindeg sekaniyan ko kawanan o miskin
sa kasebeta niyan on ko siran oto a pesela on sa kapatay.

SABOR 110

So Tohan ago so Pinili iyan a Dato

Pitero o Allah ko Kadnan aken a
"Ontod ka sii sa kawanan aken
taman sa mabaloy aken so manga ridoay ngka a dapoay o manga ai ngka."

2 Pekaoladen o Allah a ipoon sa Siyon so mala i gees a kadadatoi reka;
"Ndato ka," a tig iyan, "ko look o manga ridoay ngka."

3 Iklas a kapelada reka o manga pagtaw ngka ko ginawa iran
sii ko gawii a kapegolowani ngka ko manga sondaro ngka
a pepandaraan siran sa kastosoti.

Lagid o namog ko teked a kapipita
na pemanong reka so manga ngongoda ngka.

4 Miyakasepa so Allah, na di niyan den mberobaan:
"Seka i imam sa taman sa pakataman
a datar sa kaiimami ko Milkisidik."

5 So Kadnan na sisii ko kawanan ka;
sesaan iyan so manga dato ko gawii a kakerarangiti ron.

6 Pagokasan iyan sa kokoman so manga nasiyon,
ka penoon iyan siran a manga bangkay
ago sesaan iyan so manga olowan ko dalem a doniya.

7 Maginom sekaniyan ko tataya ko kilid a lalan;
sabap san na ipelangag iyan so olo niyan.

SABOR 111

So Podi ko Allah

Podiya niyo so Allah.

Penalamatan ko so Allah ko dalem o poso aken
sii ko kalilimod o manga titito a manga pagtaw niyan.

2 Mala so manga pasad o Allah;

di ini dii pendapatan o langon a mabebabaya sii.

3 Kababantogan ago mipapangkat so manga galebek iyan,
na tatap so kaontrol iyan sa dayon sa dayon.

4 Pepakitademan iyan so manga piyakamemesa niyan;
makalimoon ago masalinggagaw so Allah.

5 Petiyagaran iyan sa pangenengken so siran oto a maaleken on;
lalayon iyan tatanodan so kapasadan iyan.

6 Piyakiilay niyan ko manga pagtaw niyan so kapaar o manga galebek iyan
ko kinibegan iyan kiran ko manga lopa o salakaw a manga nasiyon.

7 Kasasarigan sekaniyan ago magiinontolan ko langon a di niyan dii nggolaolaan;
palaya den totomanged so manga sogoan iyan.

8 Tomitikna ini sa taman sa pakataman
a minipamegay a nggolalan ko tito a benar ago katito.

9 Pitiyagar iyan so kapagaona ko manga pagtaw niyan;
inembaalan iyan so kapasadan iyan a di den kebaroba sa taman sa pakataman;
soti ago piyakalekelek so Ingaran iyan.

10 So kikaleken ko Allah na aya pekepoonan o kaongangen;
mala i sabot so langon a petoman ko manga sogoan iyan.

Rek iyan so da a kaposan iyan a podi.

SABOR 112

So Kapipiya a Ginawa o Mapiya a Taw

Podiya niyo so Allah.

Rarakmatan so taw a maaleken ko Allah,
a tanto niyan a ipekebabaya so manga sogoan iyan.

2 Penga babaloy a mala i gees so manga wata iyan sa doniya;
perakamatan so pekebabadan ko matito a taw.

3 So mala a tamok ago kakawasaan na ketago ko walay niyan,
na ketatap so kaontrol iyan sa dayon sa dayon.

4 Apiya so maliboteng na pekaliwanagen para ko matito a taw,
a makalimoon, masalinggagaw ago maontrol.

5 Pepekapiya so taw a maginawa ago pepamagotang,

a pepatiis ko di niyan dii kapaningkawiyagen.

6 Matamataan a di sekaniyan den keoteng;
ketademan so mapiya a taw sa taman sa pakataman.

7 Da den a ikelek iyan a marata a totol;
tetana so poso iyan a somasarig ko Allah.

8 Tomitikna so poso iyan, na di sekaniyan den kelek;
matamataan a kemaasaan iyan so katebana ko manga ridoay niyan.

9 Iklas so kapepemegay niyan ko manga miskin;
ketatap so kaontol iyan sa taman sa pakataman;
kipangkat so gees iyan ago kebantogan.

10 Keilay ini o marata a taw na pagotegan;
pakapekikitebaan iyan a manga ngipen iyan
ago keonaos den so niyawa niyan;
so masisingayo o manga rarata na di den kitoman.

SABOR 113

Podi ko Kapiya o Tohan

Podiya niyo so Allah.

Podi kano, hey manga oripen o Allah,
podiya niyo so Ingaran o Allah.

2 Mapodi so Ingaran o Allah
imanto ago taman sa pakataman.

3 Ipoon ko pesebangan o alongan taman den ko pesedepan iyan
na mapodi ron so Ingaran o Allah.

4 Mipapangkat so Allah ko poro o langon o manga nasiyon,
na go makaoombaw so bantogan iyan ko manga langit.

5 Antawaa i lagid o Allah a Tohan tano
a apiya pen kokorsi sa poro

6 Na pepangalimbabaan sekaniyan sa kapegilaya niyan ko manga langit ago so doniya?

7 Ipenggakap iyan so manga lolobay a poon ko bayanek
ago pekowaan iyan so manga miskin ko manga ombi,

8 Ka pepakaontoden iyan siran a ped o manga dato,
a so manga dato o manga pagtaw niyan.

9 Pepakakadenen iyan so balek a babay sa walay,
ka mbalowin iyan a mabebebaya a ina o manga wata.

Podiya niyo so Allah.

SABOR 114

Dikir ko Kiyapakaliyo sa Misir

Isako makaliyo so manga Israil sa Misir
ko kiyaawai o manga mbawataan o Yakob ko salakaw i basa a manga taw

2 Na giya Yodah na miyabaloy a soti a kakadenan o Tohan,
ago giya Israil na aya niyan ndadatoan.

3 Miyakainengka so Mariga a ragat na miyalagoy,
ago mipeto so lawasaig a Yordan.

4 Miyamanepak so manga palaw a lagid o manga kambing
ago so pen so manga bobongan a lagid o manga nati a kambing.

5 Antonaa i miyanggolaola a inipalagoy ngka, hey ragat,
ago inipeto o ka, hey Yordan?

6 Hey manga palaw, ino kano pemanepak a lagid o manga kambing,
ago sekano pen a manga bobongan a lagid o manga nati ran?

7 Tebeker ka, hey doniya, ko kamamasaan o Kadnan,
sii ko kamamasaan o Tohan o Yakob

8 A biyaloy niyan a linaw so lakongan;
so batolakit na biyaloy niyan a bowalan a pegembowat on so ig.

SABOR 115

So Isaisa a Tito a Tohan

Kena a ba sekami, ya Allah, kena a ba sekami,
ka so Ingaran ka i kabantogan
sabap ko gagaw ngka ago so kasasarigi reka.

2 Ino rektano pekiise o manga nasiyon a
"Anda so Tohan iyo?"

3 So Tohan tano na ndodoo sa kasorgaan;
di niyan dii nggolaolaan so apiya antonaa i ikesoat iyan.

4 Ogaid na so manga katohanan iran na manga barahala a pirak ago bolawan
a pasad o manga lima o manosiya.

5 Aden a ngari iran, ogaid na di makapetero;
aden a manga mata iran, ogaid na di pemakailay.

6 Aden a manga tangila iran, ogaid na di pemakaneg;
aden a ngirong iran, ogaid na di pekabaw.

7 Aden a manga lima iran, ogaid na di pemakagedam;
aden a manga ai ran, ogaid na di pemakalalakaw,
aya pen o ba iran miyoni so manga bakereng iran.

8 Kedatar iran so pepamangembaal kiran,
ago so pen so oman i isa a somasarig kiran.

9 Hey manga Israil, sarigi niyo so Allah;
sekaniyan i petebang rekano ago so kelong iyo.

10 Hey manga mbawataan o Aron, sarigi niyo so Allah;
sekaniyan i petebang rekano ago so kelong iyo.

11 Sekano a kikaalek ko Allah, sarigi niyo so Allah;
sekaniyan i petebang rekano ago so kelong iyo.

12 Tatademan tano o Allah ago perakmatan tano niyan;
perakmatan iyan so manga mbawataan o Israil;
perakmatan iyan so manga mbawataan o Aron,

13 Na perakmatan iyan so langon a kikaalek ko Allah
ndatadatar on so manga ala ago so manga iito.

14 Kapagomanomanan o Allah so kamapiyaan iyo,
sekano langon ago so manga wata iyo.

15 Karakmatan kano o Allah a miyaden ko langit ago so doniya.

16 So bo so Allah i kirek ko manga langit,
ogaid na inibegay niyan so doniya ko manga manosiya.

17 Kena a ba so miyamatay i pekapodi ko Allah,
a so siran oto a miyanga aalogan ko darpa o kikarerenek,

18 Ka sektano i pepodi ko Allah
imanto ago taman sa pakataman.

Podiya niyo so Allah.

SABOR 116

So Mama a Miyasabet ko Kapatay

Pekebabayaan ko so Allah, ka miyaneg iyan so lagam aken;
miyaneg iyan so kiyapangangampedian aken.

2 Kagiya likaan iyan raken so tangila niyan
na penanalowan ko sekaniyan den taman ko kaooyagoyag aken.

3 Minikolibed raken so manga tali o kapatay,
na minitemo raken so piyamakalekelek ko kobor;
kiyailotan ako ago miyarata a ginawa ko.

4 Samaoto na tiyalowan aken so Ingaran o Allah:
"Pengnin ko reka, ya Allah, a sabeta ngka so niyawa ko."

5 Makalimoon so Allah ago maontol;
masalinggagaw so Tohan tano.

6 Lilindingen o Allah so da a manga peleng iyan;
isako mikopay ako na siyabet ako niyan.

7 Sonod ka ko kapakalilintad ka, hey niyawa ko,
ka kiyapiyapiyaan ka den o Allah.

8 Ka piyakalidas ako ngka ko kapatay, ya Allah,
ago so kapepegelo o manga mata ko,
ago so kapekirepang o manga ai aken

9 Kaan ako makalalakaw ko hadapan o Allah sii ko inged o kikaoyag.

10 Peparatiyaya ako apiya sii ko kiyateroa ko sa
"Tanto ako a mararasay."

11 Na sii ko kiyaadai raken sa inam na tig aken a

"Manga bokeg so langon a manosiya."

12 Antonaa i kibalad aken ko Allah
ko langon a kamapiyaan iyan raken?

13 Magawid ako sa panginginomen a ipeselasela on sabap ko kiyasabet aken
na telowan ko so Ingaran iyan.

14 Itoman aken so manga samaya aken ko Allah
sii ko kamamasaan o langon o manga pagtaw niyan.

15 Mala i bali ko kipembilangan on o Allah
so kapatay o manga kaom iyan.

16 Ya Allah, matamataan a saken so oripen ka;
oripen ako ngka a so wata o oripen ka a babay;
biyoka ako ngka ko manga rantay a ipapatong raken.

17 Mbegan ko seka sa ipesoasoat aken reka a panalamat,
na telowan ko so Ingaran o Allah.

18 Itoman aken so manga samaya aken ko Allah
sii ko kamamasaan o langon o manga pagtaw niyan

19 Sii ko lamalama o Timplo o Allah,
sii ko lembak ka hey Yarosalim.

20 Podiya niyo so Allah.

SABOR 117

So Kapodiya ko Allah

Podiya niyo so Allah, hey langon a manga nasiyon;
bantoga niyo, hey langon a manga bangsa.

2 Ka da a ikeda o kapepangalinggagaw niyan rektano,
na tatap so kasarigi ko Allah sa taman sa pakataman.

Podiya niyo so Allah.

SABOR 118

Kapanalamat ko Kiyapakataban

Panalamati niyo so Allah, ka mapiya sekaniyan;
tatap so gagaw niyan sa taman sa pakataman.

2 Matero o manga Israil a

"Tatap so gagaw niyan sa taman sa pakataman."

3 Matero o manga mbawataan o Aron a

"Tatap so gagaw niyan sa taman sa pakataman."

4 Matero o siran oto a maaleken ko Allah a

"Tatap so gagaw niyan sa taman sa pakataman."

5 Sii ko kaiiloti raken na miyananalo ako ko Allah,
na inampon ako niyan ka piyakadaya ako niyan.

6 Mipageepeda aken so Allah; di ako kelek.

Antonaa i mapenggolaola raken a marata o matag manosiya?

7 Mipageepeda aken so Allah a aya raken pegogop,
na kemaasan aken so katebana ko siran oto a pekegowad raken.

8 Tomo so kapagapas ko Allah a di so kasanai ko manosiya.

9 Tomo so kapagapas ko Allah a di so kasanai ko manga olowan.

10 Minilikop raken so langon o manga nasiyon,
ogaid na sii ko Ingaran o Allah na bininasa ko siran.

11 Minilikop siran raken ko mbalabala,
ogaid na sii ko Ingaran o Allah na bininasa ko siran.

12 Giniporonan ako iran a lagid o manga batiyokan,
ogaid na miyapondaw siran sa magaan a datar o binisolan a manga paket,
ka sii ko Ingaran o Allan na bininasa ko siran.

13 Tanto ako den a inisaromag, ka sama ko bo da maoteng,
ogaid na inogopan ako o Allah.

14 So Allah na aya ko bager ago ipepagidaida;
siyabet ako niyan.

15 Sii ko manga barombarong o manga oontol
na pekeneg on so kapepamangogiyab sa kapekebabaya ko kiyapakataban:
"Tanto a mala i gees so pinggolaola o kawanan a lima o Allah.

16 Mipoporo so kawanan a lima o Allah;
tanto a mala i gees so pinggolaola o kawanan a lima o Allah."

17 Di ako petay, ka keoyag ako bo,
na pekalangkapen aken so miyanggolaola o Allah.

18 Tanto ako den a miyadaneg o Allah,
ogaid na da ako niyan palada ko kapatay.

19 Lekai ngka raken so manga pintoan ko kaontrol;
soled ako ron ka penalamatan ko so Allah.

20 Giyanan so gimowa o Allah a ron pekasoled so manga oontol.

21 Penalamatan ko seka, ya Allah, ka inampon ako ngka,
na seka i miyakasabet raken.

22 So ator a da mapakay o manga panday sa walay
na miyabaloy a aya kaonayan ko kaoontodan o walay.

23 So Allah i minggolaola sii,
na tanto ini rektano a piyakamemesa.

24 Giyai so gawii a inembaalan o Allah;
pakapiyaan tano ron a ginawa tano ago ikabebaya tano.

25 Pengnin ko reka, ya Allah; sabeta kami ngka;

pakabolosa kami ngka sa mapiya, ya Allah.

26 Karakmatan so pepekaoma sii ko Ingaran o Allah.

Sii ko Timplo o Allah na perakmatan ami seka.

27 So Allah na aya Tohan,

na piyakilindawan tano niyan ko solo iyan.

Iketi niyo a tali so pekorbanen ko pista

na wita niyo taman den ko manga pangapanga o aparani.

28 Seka i Tohan aken, na penalamatan ko seka;

seka i Tohan aken, na mbentogen ko seka.

29 Panalamati niyo so Allah, ka mapiya sekaniyan;

tatap so gagaw niyan sa taman sa pakataman.

SABOR 119

So Kitab o Allah

Rarakmatan so siran oto a da a daway o sowasowai ran
a ipepaginetaw iran so kitab o Allah.

2 Rarakmatan so siran oto a petoman ko manga insarat iyan
a di rekaniyan dii mbabanog sa iklas ko poso iran.

3 Da den a di ontol a ba iran dii nggolaolaa
ka pekedegen iran baden so manga lalan iyan.

4 Migay ka, ya Allah, sa manga pandoan
a disomala a tomanen sa tarotop.

5 O ba bo makambeken so manga okitokit aken
ko kapetomana ko ko manga taritib ka.

6 O magiyoto na di ako den makapekeya
amay ka petordon aken so langon a manga sogoan ka.

7 Podin ko seka a tomitito so poso aken
sii ko kapekenala ko ko manga oontol a kokoman ka.

8 Tomanen aken so manga taritib ka;
di ako ngka den pagawai.

9 Andamanaya i kapekesotiya o kangodaan a mama ko sowasowai niyan?
Mokit ko kipepaginetaon iyan ko manga katero o ka.

10 Iklas ko poso aken so di aken reka dii kambabanoga;
o ba ako ngka pakasogoka ko manga sogoan ka.

11 Miyapadalem aken den ko poso aken so manga katero o ka
kaan ako reka di makapendosa.

12 Rek ka so podi, ya Allah;
pangendaon ka raken so manga taritib ka.

13 Petontolen o manga modol aken
so langon a manga kokoman a miyatero o ka.

14 Lebi pen a ipekebabaya aken so kapetomana ko ko manga insarat ka
a di so apiya antonaa a kakawasaan.

15 Rarasamen aken so manga pandoan ka
ago tatagoon ko sa ginawa so manga lalan ka.

16 Ikapipiya a ginawa ko so manga taritib ka;
di aken den pelipatan so manga katero o ka.

17 Piyapiyai ako ngka a oripen ka kaan ako pekeoyagoyag
ago makapaparatiyaya ko manga katero o ka.

18 Bekara ngka so manga mata ko kaan aken mainengka
so piyakamemesa a manga nganin sii ko kitab ka.

19 Matag ako mananangga sangkai a doniya;
di ngka raken pegmaa so manga sogoan ka.

20 Ipeketeno o niyawa ko so kikakadaliin iyan
ko manga kokoman ka ko langon a masa.

21 Di ngka dii mbongetan so manga takabor,
a giyangkoto a manga naraka a pepamanogok ko manga sogoan ka.

22 Pokasa ko ngka ko di iran raken dii kasodia ago kapepagongatongata
ka petomanen aken so manga insarat ka.

23 Apiya pen pepagopakat so manga olowan a pepagitowitooon ako iran
na rarasamen aken a oripen ka so manga taritib ka.

24 So manga insarat ka na aya aken ipekebabaya;
manga mosawira aken siran.

25 Midedeket so niyawa ko ko bayanek;
oyaga ko ngka a mitoman so initopa ngka.

26 Piteobat aken so manga olaola ko, na inampon ako ngka;
pangendaon ka raken so manga taritib ka.

27 Pakisaboti ngka raken so manga olaola a ipapaliyogat o manga pandoan ka;
samaoto na pemasaken aken so manga piyakamemesa ngka.

28 Pekikopay so niyawa ko ko kapakamboboko;
pakabagera ko ngka a nggolalan ko katero o ka.

29 Pakalidasa ko ngka ko okitokit a kapamokeg;
sii ko limo o ka na pangendaon ka raken so kitab ka.

30 Miyapili aken den so lalan a tito a benar;
miyadalem aken ko poso aken so manga kokoman ka.

31 Kakapetan aken sebenar so manga insarat ka, ya Allah;
o ba ako ngka pakayai.

32 Pepelalagoyan aken so lalan o manga sogoan ka
sii ko kapepakalaa ngka so sabot aken.

33 Pangendaon ka raken, ya Allah, so kipaginetaon ko ko manga taritib ka,
ka ipenggolalan aken taman sa kaposan.

34 Begi ako ngka sa sabot, ka peratiyayaan ko so kitab ka
na go tomanen aken sa iklas ko poso aken.

35 Pakikedegen ka raken so lalan o manga sogoan ka,
ka ndodon so ikapipiya a ginawa ko.

36 Kelida ngka so poso aken ko manga insarat ka,

a kena a ba sii ko kapakatamok.

37 Pakalipaya ngka a manga mata ko kapegilaya iran ko da a manga bali niyan; ongowi ngka so kaoyagoyag aken sii ko lalan ka.

38 Tomanen ka raken a oripen ka so initopa ngka a inibegay ko siran oto a maaleken reka.

39 Pakalepasa ngka raken so manga panonongka a ipekewan aken, ka mapiya so manga kokoman ka.

40 Sayana aken a ikakadali so manga pandoan ka. Sabap ko kaontol ka na ongowi ngka so omor aken.

41 Mitemo raken, ya Allah, so da a ikeda iyan a gagaw ngka, na panabangi ako ngka a mitoman so minitopa ngka.

42 Amay ka magiyoto na aden a kisémbag aken ko siran oto a pepagongatongat raken, ka sasarigan ko so katero o ka.

43 Di ngka den kowaa ko ngari aken so dii kateroa ko tito a benar, ka iinamen ko so manga kokoman ka.

44 Lalayon aken peratiyayaan so kitab ka sa taman sa pakataman.

45 Peginetaw ako a makadadaya, ka pananagontamanan aken so manga pandoan ka.

46 Peteroon ko so makapantag ko manga insarat ka ko hadapan o manga dato na di ako keyaan.

47 Ikapiiya a ginawa ko so manga sogoan ka a pekebabayaan ko.

48 Imbayaw aken a manga lima ko ko kapagaadati aken ko manga sogoan ka a pekebabayaan ko, na perasamen ko so manga taritib ka.

49 Tatademi ngka so miyatero o ka raken a oripen ka a ron ako ngka piyakainam.

50 Giyai i pepekarinaw raken ko kapekerasay aken: pepekaoyag raken so initopa ngka.

51 So manga takabor na tanto ako iran a pepagongatongaten, ogaid na da ako den makatipas ko kitab ka.

52 Tatademan ko so miyanga oona a manga kokoman ka, ya Allah, na ikapiiya ini a ginawa ko.

53 Minipaar ako a rarangit sabap ko manga rarata a taw a miyamanalikod ko kitab ka.

54 So manga taritib ka na aya ko ipepamagidaida apiya anda ko pepekakaden.

55 Apiya sii ko kagagawii na petedeman aken so Ingaran ka, ya Allah, na peparatiyayaan ko so kitab ka.

56 Giyai i pepekarakmat raken: mininggolalan aken den so manga pandoan ka.

57 Seka i bagian aken, ya Allah;

minitopa ko a peratiyayaan ko so manga katero o ka.

58 Miyangangampedian ako reka sa iklas ko poso aken;

kalimoon ako ngka a mitoman so minitopa ngka.

59 Miyapemasak aken so manga okitokit aken
na piyakaantap aken so kapelakad aken ko manga insarat ka.

60 Da aken sendoden, ka pinggagaan aken tomoman so manga sogoan ka.

61 Apiya o mikolibed raken so manga tali o manga rarata,
na di aken den pelipatan so kitab ka.

62 Sii ko look a gawii na pegembowat ako sa kapepenalamati aken reka
sabap ko manga oontol a kokoman ka.

63 Pepengeped ako ko langon a kikaalek reka,
a so siran oto a petoman ko manga pandoan ka.

64 Mipepeno ko doniya so gagaw ngka, ya Allah;
pangendaon ka raken so manga taritib ka.

65 Pipiyapiyaan ako ngka a oripen ka, ya Allah,
a minitoman so katero o ka.

66 Pangendaon ka raken so mapiya a panarima ago katao,
ka sasanaan ko so manga sogoan ka.

67 Sii ko da raken pen karasaya na peketaridadag ako,
ogaid na reparatiyayaan ko imanto so katero o ka.

68 Mapiya ka ago dii nggolaola sa mapiya.
Pangendaon ka raken so manga taritib ka.

69 Apiya pen pisebapan ako sa manga kabokegan o manga takabor
na ba aken den petomana so manga pandoan ka sa iklas ko poso aken.

70 Makapal so manga poso iran ago di pemakagedam,
ogaid na ikapiiya a ginawa ko so kitab ka.

71 Kamapiyaan aken so kiyarasaya raken,
ka aya ko kiyakenala ko manga taritib ka.

72 Lebi a mala raken i bali so kitab a miyakapoon ko ngari i ka
a di so pipira nggibo a pirak ago bolawan.

73 So manga lima ngka i mimbaal ago lominimbag raken;
begi ako ngka sa sabot a mikenal aken ko manga sogoan ka.

74 Siran oto a maaleken reka na penga babebaya amay ka mailay ako iran,
ka kagiya sasanaan ko so minitopa ngka.

75 Katawan aken, ya Allah, a maontol so manga kokoman ka,
ago sabap ko kasarigi reka na diyaneg ako ngka.

76 Pengnin ko a makarinaw raken so kapepangalinggagaw ngka
a mitoman so initopa ngka raken a oripen ka.

77 Mitalingoma raken so limo o ka kaan ako pekeoyagoyag,
ka ipekebabaya aken so kitab ka.

78 Makakeya so manga takabor, ka pimarataan ako iran sa kapamokeyg,
ogaid na rarasamen aken so manga pandoan ka.

79 Matimo raken so siran oto a maaleken reka,
a so langon o manga tatao ko manga insarat ka.

80 Madiyangka so poso aken ko kapetomana ko ko manga taritib ka
kaan ako di makapekeya.

81 Pekikopay so niyawa ko ko kikakadaliin aken ko kapenabet ka;
iinamen aken so katero o ka.

82 Diyokawan den magalataw so manga mata ko ko initopa ngka;
na ipegise aken a "Anda i karinawi ngka raken?"

83 Apiya pen lagid ako o pananagoay a kobal a komingkeng sii ko bel,
na da aken den lipati so manga taritib ka.

84 Ay katey pen a disomala a kapepenayaw aken a oripen ka?
Anda i kandanega ngka ko pepemanatro raken?

85 Miyamangalot so manga takabor sa manga galebo a keologan raken;
pesogoken iran so kitab ka.

86 So manga sogoan ka na palaya kasasarigan;
tabangi ako ngka, ka pesetroon ako o manga taw sa da a sabap iyan.

87 Maito bo na masapol ako iran ko doniya,
ogaid na da aken ndarainonen so manga pandoan ka.

88 Sabap ko gagaw ngka na oyaga ko ngka,
kaan aken minggolalan so manga insarat a miyakapoon ko ngari i ka.

89 Da a ikeda o katero o ka, ya Allah,
a tomitikna roo sa kasorgaan.

90 So kasarigi reka na taman den ko langon a kapepamagapidapid o masa;
piyakambeken ka so doniya, na matatatap ini.

91 Nggolalan ko manga kokoman ka na matatatap so kalangolangon taman sangkai a
gawii,

ka so langon taman na pepamanalagad reka.

92 O di aken ipekebabaya so kitab ka
na inipatay aken den ai so kiyaromasay aken.

93 Di aken den pelipatan so manga pandoan ka,
ka nggolalan kiran na inoyag ako ngka.

94 Sabeta ko ngka, ka rek ako ngka.
Piyanagontamanan aken so manga pandoan ka.

95 Pepegayanan ako o manga rarata a taw sa kambonoa iran raken,
ogaid na tatanodan ko so manga insarat ka.

96 Miyainengka aken a so langon taman na aden a kaposan iyan,
ogaid na so manga sogoan ka na da den a pitetamanan iyan.

97 Sayana aken a pekebabayaan so kitab ka!
Mababasa alongan a kaperasama ko ron.

98 So manga sogoan ka na ipekeongangen aken a di so manga ridoay aken,
ka lalayon raken ai.

99 Madalem ako i panarima a di so langon o manga goro aken,
ka so manga insarat ka na aya ko perasamen.

100 Somasabot ako a di so manga pelokelokesen,
ka petomanen aken so manga pandoan ka.

101 Pekegenggen aken so manga ai aken ko oman i marata a lalan
kaan aken dii minggolalan so katero o ka.

102 Da ako den tipas ko manga kokoman ka,
ka seka den i miyakapangendao raken.

103 Sayana a mamis so manga katero o ka ko panaantaaman aken;
lebi pen a mamis ko ngari aken a di so gola a teneb.

104 So manga pandoan ka na aya ko ipepakasabot;
sabap san na ipekegowad aken so oman i ribat a lalan.

105 So katero o ka i solo o manga ai aken
a lomilindaw ko lalan aken.

106 Miyakasepa ako ago inisemaya aken
a tomanen ko so manga oontol a kokoman ka.

107 Tanto ako a mararasay;
oyaga ko ngka, ya Allah, a mitoman so initopa ngka.

108 Tarimaa ngka, ya Allah, so iklas a kapepamodi o ngari aken,
ago pangendaon ka raken so manga kokoman ka.

109 Apiya pen lalayon aken dii miserakan so niyawa ko
na di aken pelipatan so kitab ka.

110 Tomiyaan so manga rarata a taw sa ipelitag raken,
ogaid na da aken den lepasa so manga pandoan ka.

111 So manga insarat ka na aya ko den kawali sa taman sa pakataman;
ipepekalangas ini o poso aken.

112 Kiyokom aken sa ginawa ko a lalayon aken ipenggolalan so manga taritib ka
apiya taman den sa kaposan.

113 Ipekegowad aken so siran oto a pekedowadowa i pamikiran,
ogaid na pekebabayaan ko so kitab ka.

114 Seka i lindonga aken ago kelong;
iinamen aken so katero o ka.

115 Awai ako niyo, hey manga baradosa,
ka tomanen ko so manga sogoan o Tohan aken.

116 Tokoda ko ngka a so den so initopa ngka kaan ako pekeoyagoyag;
o ba ako ngka pakaolai ko kapakaiinam aken.di ako ngka pagolai/o ba ako ngka pakaitoa

117 Kakapeti ako ngka ka kelinding ako,
na tetapen ko sa ginawa ko so manga taritib ka.

118 Petelikodan ka so langon a pepamakasilay ko manga taritib ka;
da a oked o kapepagomanta iran.

119 So langon a manga rarata ko doniya na ipelebad ka a datar o popot;
giyanan i sabap a kapekebabayai aken ko manga insarat ka.

120 Petebekeran so lawas aken ko kipekeleken aken reka;
ipekewan aken so manga kokoman ka.

121 Miyanggolaola ko so ontol ago so matito;
di ako ngka pendarainonen ko siran oto a pepelopit raken.

122 Tangkeda ngka so kapekapiya ko a oripen ka;
di ako ngka pekilopiten ko pepamangimporoan.

123 Diyokawan den magalataw so manga mata ko ko kapenabet ka

ago so kakitoman o maontol a initopa ngka.

124 Nggolaolai ako ngka a oripen ka sa makaaayon ko gagaw ngka, ago pangendaon ka raken so manga taritib ka.

125 Saken so oripen ka; begi ako ngka sa sabot kaan aken makenal so manga insarat ka.

126 Giyai den so masa a disomala a kapenggimowat ka, ya Allah, ka pesogoken o manga taw so kitab ka.

127 Pekebabayaan ko so manga sogoan ka a di so bolawan, a lebi pen a di so lombos a bolawan.

128 Kagiya ka maoto na tatarimaan aken a matito so langon a pandoan ka, na ipekegowad aken so oman i ribat a lalan.

129 Piyakamemesa so manga insarat ka; sabap san na petomanen aken sa iklas ko poso aken.

130 So kapesenep raken o manga katero o ka na pepekalindaw, ago ipepakasabot o da a manga peleng iyan.

131 Di ako dii mbaka a sasakaan ko kikakadaliin aken ko manga sogoan ka.

132 Sangori ako ngka na go ako ngka kalimoon a aya ngka ipekidia ko siran oto a pekebabaya ko Ingaran ka.

133 Pakatiknaa ngka so kapelakad aken a nggolalan ko katero o ka na di ako ngka pekipaaren ko apiya antonaa dosa.

134 Pokasa ko ngka ko kapesonsinga raken o manga taw kaan aken peketoman so manga pandoan ka.

135 Pakaliwanaga ngka so paras ka ko oripen ka, na pangendaon ka raken so manga taritib ka.

136 Mareges a kapetoga o lo ko manga mata ko sabap sa di paparatiyayaan o manga taw so kitab ka.

137 Maontol ka, ya Allah, ago matito so manga kokoman ka.

138 Maontol so biter ka a manga insarat, na tanto a kakesarigi ron.

139 So rarangit aken na pepekaapos raken, ka pelimbanan o manga ridoay aken so manga katero o ka.

140 Tarotop a kiyatepengi ko manga initopa ngka, na saken a oripen ka na pekebabayaan ko ini.

141 Apiya pen mitatanan ako ago dii sodiin na di aken indadarainon so manga pandoan ka.

142 So kaontol ka na da den a ikepos iyan a kaontol, na tito a benar so kitab ka.

143 Minitemo raken so kasasamok ago karomasayan, ogaid na ipekebabaya aken so manga sogoan ka.

144 So manga insarat ka na ontol sa taman sa pakataman; begi ako ngka sa sabot kaan ako pekeoyagoyag.

145 Pepananalo ako sa iklas ko poso aken; ampona ko ngka, ya Allah, ka tomanen ko so manga taritib ka.

146 Pepananalowan ko seka; sabeta ko ngka ka ipenggolalan aken so manga insarat ka.

147 Pegembowat ako ko sobo a penggoraok sa tabang; iinamen ko so katero o ka.

148 Pepegnaw ako ko mababasa gawii kaan aken mapemimikiran so manga initopa ngka.

149 Pamakinega ngka so lagam aken sabap ko gagaw ngka; oyaga ko ngka, ya Allah, a nggolalan ko kokoman ka.

150 Siran oto a kekadiyat sa marata na pepamakadaseg raken; mabebelag siran ko kitab ka.

151 Ogaid na marani ka, ya Allah, na so langon a sogoan ka na palaya kasasarigan.

152 Miyatey den a kiyatokawi ko sii makapantag ko manga insarat ka: piyakatikna a ka ini a ketatap sa taman sa pakataman.

153 Ilaya ngka so kararasay aken na go ako ngka panabangi ka da aken den lipati so kitab ka.

154 Panindegen ka so kabenar aken ago aona ko ngka; oyaga ko ngka a mitoman so initopa ngka.

155 Mawatan ko manga rarata a taw so kakesabet ka di iran peratiyayaan so manga taritib ka.

156 Mala ka i kapedi, ya Allah; oyaga ko ngka a nggolalan ko manga kokoman ka.

157 Madakel a ridoay aken a pepamanatro raken, ogaid na da aken den lepasa so manga insarat ka.

158 Igira a pekeilay aken angkoto a mamakatipo na ipekesisingay aken siran ka kagiya di iran papariyayaan so katero o ka.

159 Ilaya ngka so kapekebabayai aken ko manga pandoan ka; oyaga ko ngka, ya Allah, sabap ko gagaw ngka.

160 Aya katitimoan ko manga katero o ka na so tito a benar, na oman i isa ko manga oontol a kokoman ka na da den a ikepos iyan.

161 Pesetroon ako o manga olowan sa da a sabap iyan, ogaid na ipetebad o poso aken so katero o ka.

162 Sayana ako a mababebaya sabap ko initopa ngka a datar o taw a pepekatoon sa mala a igagadong.

163 Ipekegowad ago ipekesisingay aken so kapamokeg, ogaid na pekebabayaan ko so kitab ka.

164 Makapito ko salongan na pepodin ko seka sabap ko manga oontol a kokoman ka.

165 Tanto a lomilintad so siran oto a pekebabaya ko kitab ka, na da den a ba kiran pekarepang.

166 Pakatatalingomaan aken so kapenabet ka, ya Allah, na di aken dii nggolalan so manga sogoan ka.

167 Iklas a kapetomana ko ko manga insarat ka,
ka tanto aken ai a pekebabayaan.

168 Petomanen ko so manga pandoan ka ago so manga insarat ka,
ka so langon a okitokit aken na palaya ngka den kabebelengan.

169 Misampay reka so kapenggoraok aken, ya Allah.
Begi ako ngka sa sabot a nggolalan ko katero o ka.

170 Makatalingoma reka so kapepangangampedian aken,
na sabeta ko ngka a mitoman so initopa ngka.

171 Solapayan sa podi so manga modul aken
ka ipepamangendao ngka raken so manga taritib ka.

172 Ipegidaida o dila aken so katero o ka,
ka maontol so langon a sogoan ka.

173 Pengnin ko a makaikral so lima ngka sa katebangi ngka raken,
ka miyatomo aken den so manga pandoan ka.

174 Sayana aken a ikakadali so kapenabet ka, ya Allah;
so kitab ka na aya ko ipekebabaya.

175 Pakapagoyaga ko ngka kaan aken seka mapodi;
makatabang raken so manga kokoman ka.

176 Miyataap ako a datar o miyadadag a bilibili;
mbanoga ko ngka a oripen ka,
ka da aken den lipati so manga sogoan ka.

SABOR 120

Pangni sa Tabang

Sii ko kaiiloti raken na pepananalo ako ko Allah
na pegamponen ako niyan.

2 "Lidasen ako ngka, ya Allah, ko pepamokeg a manga modul
ago pepamagakal a dila."

3 Antonaa i ikidia reka o Allah,
ago antonaa pen i ipagoman iyan sii, hey, seka a pepamagakal a dila?

4 Indaneg iyan reka so manga gagarang a gasa o sondaro
a rakes o pekedeg a manga waga.

5 Kadodowaanan ako sabap ko kakakaden aken sa Misik
ago so kababaling aken a misisiringana aken so manga taw sa Kidar.

6 Tanto a miyatey a kapagiinged aken
sii ko siran oto a pekegowad ko kalilintad.

7 Taw ako a mabebebaya sa kalilintad,
ogaid na igira a di aken ai dii teroon na aya kabaya iran na kapakitidawa.

SABOR 121

So Allah a Magiipat rektano

Ipelangkaw aken a manga mata ko ko manga palaw;

anda pepekapon so tabang raken?

2 So tabang raken na poon ko Allah
a so Mimbaal ko langit ago so lopa.

3 Di niyan pekidolas so ai ngka,
sekaniyan a magiipat reka na di toratoden;

4 Matamataan a so magiipat sa Israil
na di den toratoden aya pen o ba toroga.

5 So Allah i magiipat reka,
so Allah i pekesirongan ka a sisii ko kawanan ka.

6 Di ka kapekasakitan o alongan ko kadaondaw,
aya pen o ba so olan ko kagagawii.

7 Pelindungan ka o Allah ko langon a pekakaid,
pelindungan iyan so niyawa ngka.

8 Pelindungan ka o Allah ko kapelalakaw ngka ago so kapembaling ka
imanto ago taman sa pakataman.

SABOR 122

So Kapodiya sa Yarosalim

Miyabebaya ako isako teroon iran raken a
"Somong tano ko Walay o Allah."

2 Na katii kami imanto a tomitindog
ko soled o manga gimowa a ka, hey Yarosalim.

3 Giya Yarosalim na piyakaasal a siti a matitiman ago maiisaisa.

4 Roo petekedeg so manga mbatabataa,
a so manga mbatabataa o Allah
sa kapenalamati ran ko Ingaran o Allah
a kaketoman o iniinsarat iyan ko Israil.

5 Ka roo matatago so manga korsi ko kapengokom,
a so manga korsi o manga moriyataw o Daod.

6 Pangangarapanen iyo so kalilintad a Yarosalim:

"Mamakapiya i bobolos so siran oto a pekebabaya reka.

7 Madalem so kalilintad ko soled o manga pangeleban ka,
ago so kalilinding ko soled o manga torogan ka."

8 Sabap ko kamapiyaan o manga tonganay aken ago manga ginawai
na peteroon ko den sa Yarosalim a
"Madalem reka so kalilintad."

9 Sabap ko Walay o Allah a Tohan tano
na penagontamanan aken so kamapiyaan ka.

SABOR 123

Pangni sa Limo

Sii aken reka ipelangag a manga mata ko,
hey seka a kokorsi san sa kasorgaan.

2 Datar o oripen a di niyan pelikatan sa mata so lima o kadnan iyan,
ago datar o raga a di niyan pelikatan sa mata so lima o kadnan iyan a babay
a di tano mambo pelikatan sa mata so Allah a Tohan tano
taman sa kikalimoon iyan rektano.

3 Kalimoon kami ngka, ya Allah, kalimoon kami ngka,
ka tanto kami den a miyasemo ko di rekami dii kasodia.

4 Tanto a kiyasemowan a ginawa mi ko kapepagongatongata rekami o dii
mamangimporoan
ago so di rekami dii kasodia o manga takabor.

SABOR 124

So Allah a Magiipat ko manga Pagtaw niyan

O di so Allah i miniampil rektano
na mapetero o Israil a

2 "O di so Allah i miniampil rektano
isako gobaten tano o manga ridoay tano

3 Na miyapelalamed tano iran den ai a oyagoyag
ko kasosokeyaw o rarangit iran sii rektano;

4 Kiyakoloban tano den ai o bagiyaw
ago miyanga aaled tano den ko manga ig

5 Ago miyanga aanod tano den pen ai ko mabandes a reges."

6 Panalamatan tano so Allah
ka da tano niyan pakisekisiin ko manga ngipen iran.

7 Miyakapelos tano a lagid o papanok ko litag o panganganop;
miyabinasa so litag na miyakapalagoy tano ron.

8 So tabang rektano na sii ko Ingaran o Allah
a so Mimbaal ko langit ago so lopa.

SABOR 125

So Kalilinding o manga Pagtaw o Allah

Siran oto a somasarig ko Allah na lagid o Palaw a Siyon
a di den kiiseg, ka tatap sa taman sa pakataman.

2 Lagid o manga palaw a mililibet sa Yarosalim
na tetalikop so Allah ko manga pagtaw niyan
imanto ago dayon sa dayon.

3 So lilit o manga rarata na di ketatap a ipendato ko inged a bagian o manga oontol,
ka o giyanan, na apiya so manga oontol na o ba baden pakanggolaolaa sa marata.

4 Nggolaolai ngka sa mapiya, ya Allah, so manga pipiya a taw,

a so manga titito i poso.

5 Ogaid na siran oto a pepekasilay sa kapekedega ko bekog a manga lalan iran na imbowang o Allah a iperakes ko dii mbabaradosa.

Matatap so kalilintad sa Israil.

SABOR 126

So Kiyapakakasoy sa Siyon

Isako pakakasowin o Allah sa Siyon so miyanga bibiyag na datar tano o manga taw a dii tetaginep.

2 Samaoto na mapepeno a kapesinga so manga ngari tano, na miyamagidaida so dila tano sa kapekebabaya.

Samaoto na aya dii matero o ped a manga nasiyon na "Manga ala a pinggolaola kiran o Allah."

3 Mataan den a manga ala a pinggolaola rektano o Allah a sayana a inipakapiya a ginawa tano.

4 Pakaasala ngka rekami, ya Allah, so kamapiyaan ami, a lagid o ig a pekipeno ko manga baogan sa Nigib.

5 Siran oto a pesegad sii ko kapeseod iran na pemagidaida sa kapekebabaya ko kaperaragon iran.

6 Sekaniyan a peliyo a pesegad a maawid sa oniin a iseod na matamataan a pekakasoy a dii mamagidaida sa kapekebabaya a maawid sa miyanga bebeses a miyaragon iyan.

SABOR 127

So Podi ko Kapiya o Allah

O di so Allah i pembalay ko walay na da a kipantag o di ron dii kanggalebeka o manga panday.

O di so Allah i magiipat ko inged, na ilang baden so dii katoday o pepagipat on.

2 Da a lalaw o kapegembowat ka komabalaga ago so di ngka dii kanggagabina

a di ka dii ndokaw sa kapaningkawiyagen, ka pembegay so Allah ko siran oto a pekebabayaan iyan apiya sii ko kapepekatorog iran.

3 So manga wata na posaka a poon ko Allah; so onga o lawas na aya niyan ipembalas.

4 So inimbabawata o mama ko kangongodai ron pen na lagid mambo o manga gasa a sisii ko lima o sondaro.

5 Rarakmatan so mama a mipepeno ko pananagoay niyan angkoto a manga gasa. Di sekaniyan den keyaan

igira a minindolona iyan so manga ridoay niyan sii ko dii kokoman.

SABOR 128

So Balas o Kapangongonotan ko Allah

Rarakmatan so oman i isa a maaleken ko Allah
a pekedeg ko manga lalan iyan.

2 Kekan ka so ipagonga o galebek o manga lima ngka;
kebebaya ka ago pekapiya so bobolos ka.

3 So karoma ngka na kelagid o taribonga a waged a obas
sii ko soled o walay ngka;
so manga wata a ka na kelagid o manga retok a kayo a olibi
a makalilibet ko lamisaan ka.

4 Giyanan i kakerakmati ko taw a maaleken ko Allah.

5 Karakmatan ka o Allah a ndodoo sa Siyon.

Kamasaan ka so kamapiyaan a Yarosalim
ko langon o manga gawii ko kaooyagoyag ka.

6 Mamboway ka sa kailaya ngka ko manga wata o manga wata a ka.

Makalintad a Israil.

SABOR 129

Pangni a Sopak ko manga Ridoay

"Tanto ako den a perasain o manga ridoay aken inipoon ko kangoda ko."
Mapetero a Israil a

2 "Tanto ako den a perasain o manga ridoay aken inipoon ko kangoda ko,
ogaid na da ako iran den daaga.

3 Piyamadasan iran a likod aken na piyamakatas iran so kiyapalii ran on;
biyaloy iran a lagid o miyadado a pangomaan.

4 Ogaid na maontol so Allah,
ka piyamotol iyan so ipapatong raken o manga rarata a taw."

5 Mamakapeto a kaayaan so langon a pekegowad sa Siyon.

6 Madatar siran o manga otan a pepelonaw ko mapapantar a atep a walay
a penga lalanes sa di iran pen kapekala

7 A di ini petoon ko lima o pagagarab
aya pen o ba on kepenedi so pepenimo on.

8 Na di den matero o siran oto a pepekasagad kiran a
"Mitemo rekano so riski o Allah.

Perakmatan ami sekano sii ko Ingaran o Allah."

SABOR 130

Pangni sa Tabang

Poon ko madalem na pepananalo ako reka, ya Allah;

2 Hey Kadnan, pamakinega ngka so lagam aken.

Maneg o tangila ngka so kapenggoraok aken sa kapedi.

3 Ya Allah, o pesoraten ka so manga dosa,
na antawaa pen, Kadnan, i makapamayandeg?

4 Ogaid na sisii reka so rila kaan ka mikalek.

5 Pepanayaon ko so Allah, pepanayaw so niyawa ko,
na iinamen aken so katero iyan.

6 Pepenayaon o niyawa ko so Allah
a lawan pen ko kapepenayawa o manga gordiya ko sobo;
oway, lawan pen ko kapepenayawa o manga gordiya ko kakepita iyan.

7 Hey Israil, inama niyo so Allah.

Ka sisii ko Allah so kapangalinggagaw,
na ndodon so tarotop a kapenabet.

8 Na sekaniyan den i pokas ko manga pagtaw niyan a Israil
ko langon o manga kadostaan iran.

SABOR 131

Kapangangarapan a Kapangalimbabaan

Ya Allah, kena a ba dii tekabor so poso aken
aya pen o ba mipoporo i pangilailayan so manga mata ko.
Di aken pekitembang a ginawa ko ko manga ala a nganin
aya pen o ba so tanto raken a piyakamemesa.

2 Ka piyakinaw ago piyakalintad aken baden a ginawa ko
a datar o ikaririga a wata a karirinawan sii ko rareb o ina iyan--
na giya ginawa ko na datar o karirinawan a wata.

3 Hey Israil, iinama niyo so Allah,
imanto ago taman sa pakataman.

SABOR 132

So Kapodiya ko Walay o Allah

Ya Allah, tatademi ngka so Daod
ago so langon a kiyaregeni ron;

2 Ka inisepa iyan ko Allah
ago inisemaya iyan ko Mala i Gees a Tohan o Yakob a

3 "Di ako den soled ko walay aken
aya pen o ba ako iga ko igaan aken,

4 Di aken den peparon o ba ako pakatorog
aya pen o ba ako toratoda

5 Taman sa di ako makatoon sa darpa a pantag ko Allah,
a kekadenan o Mala i Gees a Tohan o Yakob."

6 Sii sa Iprata na miyaneg tano so mipantag ko Kaban sa Kapasadan,
na miyatoon tano ko manga pangomaan roo sa Diyaar.

7 Tig tano a "Somong tano ko kakadenan o Allah;

somimba tano sii ko dapoay niyan."

8 Mbowat ka, ya Allah, na song ka ko ndekean ka,
seka ago so Kaban sa Kapasadan a nanao ko gees ka.

9 Makanditar so manga imam ka sa kaontol,
na makapelalalis sa kapekebabaya so manga kaom ka.

10 Sabap ko Daod a oripen ka
na di ngka telikodi so miyapili i ka a dato.

11 Minisepa o Allah ko Daod
so matatanged a sapa a di niyan den mbarobaan:

"So isa ko kebabadan reka
na pekaontoden aken ko korsi i ka.

12 O nggolalanen o manga wata a ka so kapasadan aken
ago so manga insarat a ipemangendao aken kiran
na so mambo so manga wata iran na pemakaontod
ko korsi i ka sa dayon sa dayon."

13 Ka miyapili o Allah a Siyon;
miyasingayo iyan ai a kedenan iyan:

14 "Giyai i pendekean aken sa taman sa pakataman;
sii ako pekorsi, ka miyasingayo aken ai.

15 Perakmatan ko a Siyon sa mitataralo a kaoyagan;
pekaosogen aken sa pangenengken so manga miskin on.

16 Penditaran aken pen sa kakesabet so manga imam on,
na pemagidaida ago pelalalis sa kapekebabaya so manga kaom aken roo.

17 "Roo aken pekalaa so gees o Daod
ago pekatindegan aken sa solo o miyapili aken a dato.

18 Penditaran aken sa kayaan so manga ridoay niyan,
ogaid na pemangerap so sangkad ko olo niyan."

SABOR 133

So Podi ko Katataayon o Magariyari

Sayana a mapiya ago tanto a ikasosoat
igira a matitimo a matataayon so magariyari.

2 Lagid anan o mamot a lana a pegododen ko olo
a petiris ko sompa, a so sompa o Aron,
a petiris taman den ko lig o kimon iyan.

3 Datar ini o manga namog sa palaw a Hirmon
a pepanga oolog ko manga palaw sa Siyon.

4 Ka roo ipembegay o Allah so iperakmat iyan,
a so kaoyagoyag a da a kaposan iyan.

SABOR 134

So Kipananalon sa Kapodiya ko Allah

Podiya niyo so Allah, hey langon iyo a manga oripen o Allah
a pepamanalagad ko kagagawii sii ko Timplo o Allah.

2 Bayaon iyo a manga lima niyo ko soti a darpa
ago podiya niyo so Allah.

3 So Allah a mimbaal ko langit ago so lopa
na karakmatan kano niyan a poon sa Siyon.

SABOR 135

Kadikir sa Podi

Podiya niyo so Allah.

Podiya niyo so Ingaran o Allah;
Podiya niyo sekaniyan, hey manga oripen o Allah

2 A pepamanalagad sii ko Walay o Allah,
sii ko lamalama o Timplo o Tohan tano.

3 Podiya niyo so Allah, ka so Allah na mapiya;
didawa niyo a podi so Ingaran iyan, ka ikasosoat ai.

4 Ka pinili o Allah so Yakob a rek iyan,
ago so Israil a da a lawan iyan a ketangan iyan.

5 Katawan aken a mala so Allah,
so Kadnan tano na lawan pen ko langon a tohan.

6 Dii nggolaolaan o Allah so apiya antonaa i ipekesoat iyan
sii sa manga langit ago sa doniya,
sii ko manga ragat ago so langon a manga dadalem.

7 Pepakapooron iyan so manga gabon a poon ko manga titib a doniya;
pesogoon iyan so kilakilat a rakes o oran
ago pepakaliyon iyan so manga ndo a poon ko tatagoan iyan on.

8 Roo sa Misir na piyamono iyan so manga kaka on a wata
ndatar so manga manosiya ago manga pangangayamen.

9 Initalingoma niyan so manga nanao niyan ago manga kabarakat ko dalem a inged ka,
hey Misir,
a inisiksa iyan ko Piraon ago so langon a sanasanaan iyan.

10 Piyaniksa iyan so madakel a manga nasiyon
ago piyamono iyan so manga babager a dato,

11 A si Sihon a dato o manga Amoriyo,
si Og a dato sa Basan

ago so langon o manga dato sa Kanaan,

12 Na inibegay niyan so lopa iran a posaka
a makewali o manga pagtaw niyan a Israil.

13 Matatatap so Ingaran ka, ya Allah, sa taman sa pakataman;

so kababantogi reka na taman ko langon a kapepamagapidapid o masa.

14 Ka ipeginontolan o Allah so manga pagtaw niyan,
ago ipengalinggagaw niyan so manga oripen iyan.

15 So manga katohanan o manga nasiyon na manga barahala a pirak ago bolawan
a pasad o manga lima a manosiya.

16 Aden a ngari iran, ogaid na di makapetero;
ago manga mata, ogaid na di pemakanono;

17 Aden a manga tangila iran, ogaid na di pemakaneg,
aya pen o ba aden a napas ko ngari iran.

18 Pekasayan kiran so pepamangembaal kiran
ago so pen so oman i isa a somasarig on.

19 Hey manga mbawataan o Israil, podiya niyo so Allah;
sekano a manga mbawataan o Aron, podiya niyo so Allah.

20 Hey manga Libitiyo, podiya niyo so Allah;
sekano a maaleken ko Allah, na podiya niyo sekaniyan.

21 Mapopodi so Allah sii sa Siyon,
a sekaniyan a komakaden sa Yarosalim.

Podiya niyo so Allah.

SABOR 136

Dikir sa Kapanalamat

Pepanalamati niyo so Allah ka mapiya sekaniyan.

Tatap so gagaw niyan sa taman sa pakataman.

2 Pepanalamati niyo so Tohan o manga tohan.

Tatap so gagaw niyan sa taman sa pakataman.

3 Pepanalamati niyo so Kadnan o manga kadnan.

Tatap so gagaw niyan sa taman sa pakataman.

4 Sekaniyan bo i dii makanggolaola sa manga ala a piyakamemesa.

Tatap so gagaw niyan sa taman sa pakataman.

5 Inembaalan iyan so manga langit a nggolalan ko ongangen iyan;

Tatap so gagaw niyan sa taman sa pakataman.

6 Na kiyayat iyan so lopa sii ko liyawaw o manga ig.

Tatap so gagaw niyan sa taman sa pakataman.

7 Inembaalan iyan so manga ala a solo,

Tatap so gagaw niyan sa taman sa pakataman.

8 A so alongan a makandato ko kadaondaw,

Tatap so gagaw niyan sa taman sa pakataman.

9 Ago so olan ago so manga bitoon a mamakandato ko kagagawii.

Tatap so gagaw niyan sa taman sa pakataman.

10 Piyamono iyan so manga kaka a wata sii sa Misir,

Tatap so gagaw niyan sa taman sa pakataman.

- 11** Na piyakaliyo niyan kiran so manga Israil
Tatap so gagaw niyan sa taman sa pakataman.
- 12** A nggolalan ko mabager a lima niyan ago mabebeter a barokan iyan.
Tatap so gagaw niyan sa taman sa pakataman.
- 13** Sinisi iyan so Mariga a Ragat na miyabagi;
Tatap so gagaw niyan sa taman sa pakataman.
- 14** Na piyakaripag iyan on so manga Israil ko look iyan;
Tatap so gagaw niyan sa taman sa pakataman.
- 15** Ogaid na piyangeled iyan on so Piraon ago so manga sondaro niyan sii ko Mariga a Ragat.
Tatap so gagaw niyan sa taman sa pakataman.
- 16** Inagak iyan so manga pagtaw niyan sii ko disirto.
Tatap so gagaw niyan sa taman sa pakataman.
- 17** Piyaniksa iyan so manga ala i gees a dato;
Tatap so gagaw niyan sa taman sa pakataman.
- 18** Ago piyamoto iyan so kikababantogan a manga dato,
Tatap so gagaw niyan sa taman sa pakataman.
- 19** Si Sihon a dato o manga Amoriyo;
Tatap so gagaw niyan sa taman sa pakataman.
- 20** Ago si Og a dato sa Basan;
Tatap so gagaw niyan sa taman sa pakataman.
- 21** Na inibegay niyan so manga lopa iran a posaka
Tatap so gagaw niyan sa taman sa pakataman.
- 22** A makewali o oripen iyan a Israil.
Tatap so gagaw niyan sa taman sa pakataman.
- 23** Kiyatademan tano niyan sii ko kiyapakadapanas tano;
Tatap so gagaw niyan sa taman sa pakataman.
- 24** Ka biyokaan tano niyan ko manga ridoay tano.
Tatap so gagaw niyan sa taman sa pakataman.
- 25** Pembegan iyan sa pangenengken so oman i baraniyawa.
Tatap so gagaw niyan sa taman sa pakataman.
- 26** Pepanalamati niyo so Tohan sa kasorgaan.
Tatap so gagaw niyan sa taman sa pakataman.

SABOR 137

So dii Miperego o manga Israil ko Kabibiyag iran

Sii ko kilid o manga lawasaig sa Babilon
na miyamangontod tano ron a miyamakasegad
igira a kiyatademan tano a Siyon.

- 2** Roo ko manga sapak a kayo
na piyamin tano ron so manga kotiyapi tano,
- 3** Ka piyangniyan tano roo o miyamamiyag rektano sa kapelilanga tano kiran;
so peperarasay rektano na piyantonan tano iran sa kakeriyala

a tig iran a "Mbayoki kami niyo ko manga idaida sa Siyon."

4 Andamanaya i kipembayoken tano ko idaida o Allah
sii ko inged o manga rait?

5 O kalipati aken seka, hey Yarosalim,
na kalipatan o kawanan a lima ko so kapasang iyan.

6 Domeket so dila aken ko pelak aken
o di aken seka tatademi;
o di aken tatarimaa a Yarosalim a lebi aken a ipekebabaya.

7 Tademi ngka, ya Allah, so pinggolaola o manga Idomiyan
sii ko gawii a kiyatabana sa Yarosalim:
"Gebaa niyo." a inipelalalis iran,
"Gebaa niyo taman den ko manga onayan iyan."

8 Hey siti a Babilon a miyatendo a mbinasaan,
sayana a kebebaya so seop reka
sabap ko inikidia ngka rekami,

9 Sayana a kebebaya so pepemanikem ko manga iito a wata a ka
na go ipemapes iyan siran ko manga ator.

SABOR 138

Kapangangarapan sa Kapanalamat

Penalamatan ko seka, ya Allah, sa iklas ko poso aken;
sii ko hadapan o manga tohan na ndidaon ko seka a podi.

2 Sodiyod ako a somasangor ko soti a Timplo ngka
na podin ko so Ingaran ka
sabap ko gagaw ngka ago so kasasarigi reka,
ka inipangkat ka a lawan ko langon taman
so Ingaran ka ago so katero o ka.

3 Isako mananalo ako reka na inampon ako ngka,
na piyakawaraw ako ngka ko kiyapakabagera ngka ko niyawa ko.

4 Podin ka o langon a manga dato sa doniya, ya Allah,
igira a miyaneg iran so manga katero a poon ko ngari i ka.

5 Ipemagidaida iran so manga okitokit o Allah,
ka mala so bantogan o Allah.

6 Apiya pen roo sa poro so Allah
na tatagoon iyan sa ginawa so pepangalimbabaan;
na katawan iyan san sa mawatan so pepangimporoan.

7 Apiya pen pepaginetaw ako a kalilikopan a kasasamok
na lilindingen ka so kaoyagoyag aken;
pembeteren ka so barokan ka a pepeparen ko rarangit o manga ridoay aken,
ago ipesebet ka raken so kawanan a lima ngka.

8 Itoman raken o Allah so takdir iyan;

tatap so gagaw ngka sa taman sa pakataman, ya Allah,
di ngka pendarainonen so miyanga papasad o manga lima ngka.

SABOR 139

So Tarotop a Ongangen ago Kasiyap o Allah

Ya Allah, miyapariksa ako ngka den,
na katawan ako ngka.

2 Katawan ka so kapeko kabinteng aken;
sasaboten ka san sa mawatan so manga pamikiran aken.

3 Pekeilay ngka so kapeliyo ago so kapegiga aken;
kalalayaman ka so langon o manga okitokit aken.

4 Apiya da pen mipekas ko dila aken
na katawan ka den sa tarotop so peteroon ko, ya Allah.

5 Tetalikop ka raken ko mbalabala,
na ililinding ka raken a palad ka.

6 Sayana raken a piyakamemesa angkai a katao;
tanto anan a maporo a di so keoma ko a akal.

7 Anda ako den mangaday makasong a mabelag ako ko Roh ka?
Anda ko kapalagoyi so kamamasan ka?

8 Opama ka manik ako sa kasorgaan na matatago ka roo;
o mbaal ako sa igaan ko kaden o miyamatay na ndodon ka pen.

9 O pen o lomayog ako ko pesebangan o alongan
o di na komaden ako sii sa sedepan ko sabala a ragat

10 Na apiya roo na pagagaken ako o lima ngka
ago kepetan ako ron o kawatan a lima ngka.

11 Opama ka mapangni aken ko maliboteng a itapok ako niyan,
o di na mbeloy a kagagawii so maliwanag a mikokokos raken

12 Na apiya so maliboteng na kena o ba reka maliboteng;
maliwanag reka so kagagawii a datar o kadaondaw,
ka ndatar reka so maliboteng ago so maliwanag.

13 Ka seka i miyaden ko pindalendaleman ko ginawa ko;
piyakatotoora ko ngka sii ko tiyan o ina aken.

14 Pepodin aken seka, ka sabelek ago piyakamemesa a kiyambaali raken;
piyakamemesa so manga pasad ka;
katawan ako ngka piyapiya.

15 Ka da reka mapagena so pito lapis a bago aken
isako kambaalan ako sa masolen
ago linimbag sii sangkai a didalem o doniya.

16 Miyailay ako o manga mata ngka sa da ako pen milotad,
na so langon a manga gawii a ookoran raken
na palaya den misosorat ko ribro ngka
sii ko da pen a ba on minipanagipoon.

17 Sayana raken a mala i bali so manga pamikiran ka, hey Tohan ko.
Tanto ini a miyakadakedakel.

18 O bilanga ko ini na lawan pen sa kadakel o manga peted.
Igira a pepekanaw ako na sisii ako reka pen.

19 O ba ngka bo pemonoa so manga rarata a taw, hey Tohan ko.
O ba raken bo pekaawa so manga talibono.

20 Di siran dii tetaro sa marata makapantag reka,
na ipeporo iran reka a ginawa iran a ipesopak iran reka so marata.

21 Ba aken di pekegowaden so siran oto a pekegowad reka, ya Allah,
ago ipekesisingay aken so pepamanopak reka?

22 Matatarotop a kipekegowaden aken kiran;
ibibilang aken siran a manga ridoay aken.

23 Pariksaa ko ngka, hey Tohan ko, na tokawi ngka so poso aken.
Tepengi ako ngka na tokawi ngka so manga pamikiran aken.

24 Ilaya ngka o ba aden a okitokit aken a makasisilay,
na nggonanaowa ko ngka ko lalan a da a ikepos iyan.

SABOR 140

Pangni sa Kalinding

Sabeta ko ngka, ya Allah, ko manga rarata a taw;
lindinga ko ngka ko manga tanganiyaya

2 A pepamagantangan sa marata sii ko manga poso iran
ago lalayon pepengondoy sa katitidawa.

3 Tatareman iran so manga dila iran a lagid o nipay;
so bisa a darpo na sisii ko manga modol iran.

4 Lidasen ako ngka, ya Allah, ko lima o manga rarata;
lindinga ko ngka ko manga tanganiyaya a kekadiyat sa kakirepang aken.

5 Miyakataan so manga takabor sa ipelitag iran raken;
miyakentay iran so manga iket o poket iran,
na go miyametad siran sa manga sampirot sii ko lalan a pagokitan ko.

6 Ya Allah, peteroon ko reka a "Seka i Tohan aken."
Pamakinega ngka, ya Allah, so kapenggoraok aken sa tabang.

7 Ya Allah a Mamaapaar, a so mabager a pepekasabet raken,
a pelinding ko olo aken sii ko gawii a katidawa,

8 Na di ngka mbegan ko manga rarata so masingayo iran, ya Allah;
di ngka kiran pakipenggolalanen so ikekadiyat iran a marata,
ka o ba siran baden pangimporoan.

9 Pengnin ko a mitana ko olo o siran oto a lomilikop raken
so kasamok a ipepangangalek iran raken.

10 Manga oolog kiran so pekedeg a manga waga;
mamangilebad siran ko manga dadalem a galebo
a di siran on den pekagakap.

11 Di makambeken ko doniya so manga taliyantaan;

maraot o ikebinasa iran a morala so manga tanganiyaya.

12 Katawan aken a dii nggolalan o Allah so kokoman a matito sabap ko manga miskin ago ipepanindeg iyan so kabenar o kikadodowaanan.

13 Matamataan a podin o manga oontol so Ingaran ka, na keden so manga titito ko kamamasaan ka.

SABOR 141

Dowaa ko Magarib

Ya Allah, petelowan ko seka; nggagaani ako ngka somong.

Pamakinega ngka so lagam aken igira a pepananalo ako reka.

2 Matarima so kapendowaa aken a datar o doka a ipegadap reka, ago so kapetapenay aken a datar o di reka dii soasoat igira a magarib.

3 Pakinggordiyai ngka so ngari aken, ya Allah; pagipata ngka so pintoan o manga modol aken.

4 Di ngka pekiagaken so poso aken ko apiya antonaa kamarataan sa kapakangolaola ko sa bibid a manga galebek a mirakes ako ko manga mama a dii mbabaradosa; na di ako ngka pekaatoanga ko kapeken iran ko manga pipiya a pangenengken iran.

5 Pakisogaten ako ngka ko maontol a mama, ka limo anan;

pakimbongeti ako ngka on, ka lana anan ko olo aken.

Di den ai sengkakan o olo aken.

Ogaid na so pepangangarapanen aken

na tatap a sopak ko dii nggolaolaan o manga rarata.

6 Amay ka pengologen so manga olowan iran ko manga pampang na ketokawan o manga baradosa a domadait kiran so manga katero aken.

7 Peteroon iran a

"Datar o dii kandadowa ago kapepangarasa ko lopa

a kiyapamangitagigay ko manga tolan aken ko ngari o kobar."

8 Ogaid na sii aken reka itotobos so manga mata ko, ya Allah a Kadnan aken;

sii ako reka pepagapas; di ako ngka peserakanen a ba di malilinding.

9 Lidasen ako ngka ko litag a tiyaan iran raken,

ago so manga sampirot angkoto a dii mbabaradosa.

10 Pakisikemen ka so manga rarata a taw ko rek iran bo a manga litag

a makalidas ako ron baden a da a rayorayo a ginawa ko.

SABOR 142

Pangni sa Tabang

Penggoraok ako sa matanog ko Allah;

ipekorot aken a lagam aken a pepangangampedian ako ron.

2 Pepanotolen ko ko hadapan iyan so panon aken;

sii ko hadapan iyan na pepayagen aken on so awid a akal aken.

3 Igira a pekikopay so niyawa ko
na seka i matao ko pekeokitan aken.
Sii ko lalan a pelalakawan aken
na kiyataan o manga taw sa ipelitag raken.
4 Inengkaa ngka so kawananan aken na go ngka ilaya;
ka da den a ba raken tego sa ginawa.
Da den a keapasan aken;
da den a pegongo sa niyawa ko.

5 Penggoraok ako reka, ya Allah;
peteroon ko a "Seka i lindonga aken
ago aya ko bagian ko pagiingedan o kikaoyag."
6 Pakinega ngka so kapenggoraok aken,
ka tanto ako den a lolopiten.
Sabeta ko ngka ko pepamanatro raken,
ka tanto siran raken a mabager.
7 Pakaliyowa ko ngka ko kakalabosowan raken
kaan aken mapodi so Ingaran ka.
Samaoto na petimotimoan ako o manga oontol
sabap ko kiyapiyapiyai ngka raken.

SABOR 143

Pangni sa Tabang

Ya Allah, pamakinega ngka so kapepangangarapan aken;
tagoa ngka sa ginawa so kapenggoraok aken sa tabang.
Sabap ko kasarigi reka ago so kapagiinontolan ka
na ampona ko ngka.
2 Di ako ngka pagokasi sa kokoman, a oripen ka,
ka da den a sakataw bo a oyagoyag a ba maontol sii ko hadapan ka.

3 Miyasatro ako o ridoay aken;
minisomek iyan so kaoyagoyag aken sii ko bote,
na miyapakakaden ako niyan ko maliboteng
a datar o siran oto a miyatey den miyamatay.
4 Sabap san na pekikopay so niyawa ko;
kiyadaan den sa inam so poso aken.

5 Peketademan aken so miyanga iipos a gawii;
perasamen ko so langon a galebek ka,
na pepamasaken ko so manga pasad o lima ngka.
6 Ipapalad aken reka so manga lima ko;
ikaawaw ka o niyawa ko a lagid o komigaw a lopa.

7 Ampona ko ngka nggagaan, ya Allah; pekepos so niyawa ko.
Di ngka raken pegena so paras ka
ka o ba ako baden madatar o siran oto a penga oolog ko kobor.

8 Pakitademi ngka raken oman mapita so da a ikeda iyan a gagaw ngka, ka seka i sasarigan ko.

Toroon ka raken so lalan a kekedeg aken, ka sii aken reka imbabayorantang so niyawa ko.

9 Sabeta ko ngka, ya Allah, ko manga ridoay aken; sii ako reka pepekalindong.

10 Pangendaon ka raken so kanggolaolaa ko kabaya a ka, ka seka i Tohan aken.

Maagak ako o Mapiya a Roh ka ko pantar a lopa.

11 Sabap ko Ingaran ka, ya Allah, na ongowi ngka so kaoyagoyag aken.

Sii ko kaontol ka na pokasa ko ngka ko karomasayan aken.

12 Na sabap ko gagaw ngka raken na polanga ngka so manga ridoay aken, na binasaa ngka siran langon a perarasay raken, ka oripen ako ngka.

SABOR 144

Kapepanalamat o Dato ko Kiyapakataban

Podin so Allah a Lakongan aken, a pesinanaden iyan so manga lima ko ko kanggira, ago so manga kemer aken sa katidawa.

2 Sekaniyan i masalinggagaw a Tohan aken ago kota, a maporo a lindonga aken ago pepekalidas raken, a aya ko kelong a ron ako pepagapas. Pepakidaag iyan raken so manga nasiyon.

3 Ya Allah, antawaa so manosiya a pipikiren ka, o di na so wata o manosiya a tatagoon ka sa ginawa?

4 So manosiya na lagid bo o sengaw; so omor iyan na lagid o somasagad a along.

5 Kayangen ka so manga langit ka, ya Allah, na panog ka; sekoa ngka so manga palaw, ka pemangebhel siran.

6 Sogoa ngka so kilakilat na tayaken ka so manga ridoay; panaan ka so manga gasa a ka na go ngka siran pakagorigawa.

7 Kawaa ko ngka san sa poro; panabangi ako ngka ago kowaa ko ngka a poon ko manga ala a ig, a poon ko lima o manga rait

8 A so manga ngari iran na mapepeno a kapamokey, ago so kawatan a lima iran na dii sepa sa di benar.

9 Pegidaidaan ko seka sa bago a bayok, hey Tohan ko; sii ko sapolo i tapes a kotiyapi na pemboboniboniyanan ko seka;

10 Seka a pembegay sa kapakataban ko manga dato, ago pepekalidas ko Daod a oripen ka ko pekapatay a kumpulan.

11 Panabangi ako ngka ago pokasa ko ngka ko lima o manga rait
a so manga ngari iran na mapepeno a kapamokeg,
ago so kawanan a lima iran na dii sepa sa di benar.

12 Mandiyadi na pembaloy so manga wata tano a manga mama
a lagid o manga pamomolan a mabager i kato sii ko kangoda iran,
ago so manga wata tano a manga babay
na penga lalagid o ookiran a manga polaos
ko rogo o torogan a ipepandara on.

13 So manga taliyong tano na penga pepeno a pitibarangan a pereperan.
So manga talon tano na penga bababad sa nggibonggibo

ago sesapolo nggibo sii ko manga pananateba tano,

14 Na so manga mama a sapi tano na pemakagoyod sa manga pepened.

Di den kegeba so manga kota tano, ago da den a kebiyag
aya pen o ba aden a makagoraok sa kapakamboboko sii ko manga lalan tano.

15 Rarakmatan so manga taw a giyanan i masosowa iran.

Rarakmatan so manga taw a aya iran Tohan na so Allah.

SABOR 145

Dikir a Podi

Mbentogen aken seka, hey Tohan ko a aya Dato;
podin ko so Ingaran ka sa taman sa pakataman.

2 Oman gawii na podin ko seka,
ago peselaselaan ko so Ingaran ka sa dayon sa dayon.

3 Mala so Allah a lebi a kepodi;
so kala iyan na di den ketakes.

4 So isa a apid na pemanotolen iran ko pekasalono a manga taw so manga pasad ka,
na pekalangkapan iran on so manga ala i gees a galebek ka.

5 Pembantaanan iran so kababantogan a menang o pangkatan ka,
na pendapatan so manga piyakamemesa ngka.

6 Pemanotolen iran so kapakagaga o piyakalekelek a manga pinggolaola ngka,
na saken peman na peyagen ko so kala a ka.

7 Peselaselaan iran so kala o kapiya ngka
ago ipegidaida iran sa kapekebebaya so kaontrol ka.

8 Makalimoon ago masalinggagaw so Allah
a malanat i rarangit ago mala i limo.

9 Mapiya so Allah ko kalangolongan,
na ipepangalinggagaw niyan so langon a kaaden iyan.

10 So langon a inaden ka na podi reka, ya Allah,
na penalamatan ka o manga kaom ka.

11 Pemanotolen iran so bantogan o ndatoan ka,
ago pembantaanan iran so kabatowa a ka

12 Kaan katokawi o langon a taw so manga ala i gees a galebek ka ago so kababantogan a pangkatan o ndatoan ka.

13 So ndatoan ka na da den a kaposan iyan a ndatoan, na matatapat so kandadato o ka ko langon a kapepamagapidapid o masa.

Ipetoman o Allah so langon a initopa niyan, na makalimoon sekaniyan ko langon a di niyan dii nggolaolaan.

14 Pegarain o Allah so oman i pekeoteng ago pepakatindegen iyan piyapiya so oman i mabebekong.

15 Pegilay reka so langon a kaaden a mamakaiinam, ka seka i pembegay kiran sa pangenengken iran sii ko osto a oras.

16 Pembekaren ka so lima ngka na go pepakaosogen ka so oman i isa a baraniyawa ko kabaya iyan.

17 Magiinontolan so Allah ko langon a okitokit iyan, ago makalimoon ko langon a di niyan dii nggolaolaan.

18 Marani so Allah ko langon a pepananalo rekaniyan, a so langon a petelo ron sa iklas.

19 Ipetoman iyan so manga kabaya o siran oto a maaleken on; pepamakinegen iyan so kapenggoraok iran sa tabang ago pesebeten iyan siran.

20 Pepagipaten o Allah so oman i isa a pekebabaya rekaniyan; ogaid na so langon o manga rarata na peminasaan iyan.

21 Peteroon o ngari aken so podi ko Allah.

Mapodi o oman i kaaden so soti a Ingaran iyan sa taman sa pakataman.

SABOR 146

So Podi ko Allah a Pepenabet

Podiya niyo so Allah.

Podiya ngka so Allah, hey niyawa ko.

2 Podin ko so Allah taman den ko kaooyagoyag aken; ndidaon ko a podi so Tohan aken taman ko kaooyagoyag aken pen.

3 Di niyo serigi so manga olowan, a so matag baden manosiya a di makapenabang.

4 Amay ka lomiyoy so niyawa iran na sonod siran ko bayanek; sii den sangkoto a gawii na ketamanan so manga antangan iran.

5 Rarakmatan so taw a aya petebang on na so Tohan o Yakob, a so panginam iyan na sii ko Allah a Tohan iyan

6 A Mimbaal ko langit, so lopa ago so ragat a rakes o langon taman a madadalem on.

Lalayon sekaniyan kasasarigan;

7 Ipepanindeg iyan so kabenar o kikalolopit,

na pembegan iyan sa pangenengken so pepanga aaor.

Pepakaliyon o Allah so kikakalaboso;

8 Pepekanonon o Allah so kikabobota.

Pepakapamayandegen o Allah so kikabebekong;
pekebabayaan o Allah so manga oontol.

9 Pepagipaten o Allah so manga rait;

tatagikoren iyan so manga ilo ago so manga balo,
ogaid na pekeliden iyan so lalan o manga rarata.

10 Ndadato so Allah sa taman sa pakataman,

a so Tohan ka, hey Siyon, taman den ko langon a kapepamagapidapid o masa.

Podiya niyo so Allah.

SABOR 147

So Podi ko Allah a Lebi a Mamaapaar

Podiya niyo so Allah.

Sayana a mapiya so kadidaw sa manga podi ko Tohan tano,
ka ikasosoat ago mapapatot so kapepodiya on.

2 Pepakaasalen o Allah a Yarosalim;

pepakakasowin iyan so miyamangitaog a manga Israil.

3 Pepamolongan iyan so siran oto a maroropet i poso,
ago pepamabeden iyan so manga pali iran.

4 Tetendoon iyan so kadakel o manga bitoon,

na kabebetowan iyan sa ngaran so oman i isa kiran.

5 Kababantogan so Kadnan tano ago mala i kabarakat;
da den a pitetamanan o ongangen iyan.

6 Ipeporo o Allah so dii mangangalimbabaan,

ogaid na pepepaden iyan so manga rarata taman den ko bote.

7 Pagidaidai niyo so Allah sa kapanalamat;

mboboniboniyani niyo so Tohan tano ko kotiyapi.

8 Pesepengan iyan sa manga gabon so langit;

pepakioranan iyan so kalopaaan,

ago pepakatoan iyan sa otan so manga bobongan.

9 Pembegan iyan sa pangenengken so manga binatang

ago so manga wata a kakowak igira a pepamaniyak siran.

10 Di niyan ipekebabaya so bager o koda,

aya pen o ba niyan ikasososat so kagaan i kapalalagoy o mama,

11 Ka aya ipekebabaya o Allah na so kikaalek on,

a so siran oto a miinam ko da a ikeda iyan a gagaw niyan.

12 Selasela ngka so Allah, hey Yarosalim;
podiya ngka so Tohan ka, hey Siyon.

13 Ka pepakabageren iyan so manga galid o manga gimowa a ka,
ago peperakmatan iyan so manga taw a sisii reka.

14 Pepakalintaden iyan so manga temanaan ka,
ago pepakaosogen ka niyan ko lebi a malimegas a trigo.

15 Ipetoron iyan so sogoan iyan sa doniya;
tanto a magaan a kapekisampay o katero iyan.

16 Pekeyaten iyan so ilo a datar o tanggob,
na pekeyaren iyan so ating o lopa a datar o manga ombi.

17 Pepengologen iyan so giyaw niyan a datar o grabas;
antawaa i pekatiger ko matenggaw a pesogoon iyan?

18 Amay ka ipetoron iyan peman so katero iyan na petenoon iyan ai langon,
na pepakasamberen iyan so ndo iyan na pepamangondas so manga ig.

19 Miyapayag iyan so katero iyan ko Yakob,
a so manga taritib iyan ago manga kokoman sii ko Israil.

20 Da den a pinggolaolaan iyan sii a ped a nasiyon;
di iran katawan so manga kokoman iyan.

Podiya niyo so Allah.

SABOR 148

Katawaga ko Alam sa Kapodiya ko Allah

Podiya niyo so Allah.

Podiya niyo so Allah san sa kasorgaan,
podiya niyo san sa poro.

2 Podiya niyo sekaniyan, hey langon iyo a manga malaikat iyan,
podiya niyo, hey miyakadakedakel a kaaden iyan.

3 Podiya niyo sekaniyan, hey alongan ago olan,
podiya niyo, hey langon a pepamanindaw a manga bitoon.

4 Podiya niyo sekaniyan, hey pipeporoan a manga langit,
ago sekano a manga ig san sa kaporoan o manga langit.

5 Podiya iran langon so Ingaran o Allah,
ka somiyogo sekaniyan na miyanga aaden siran.

6 Tiyago iyan siran ko manga darpa iran sa taman sa pakataman,
ka migay sekaniyan sa sogoan a di iran den kelepas.

7 Podiya niyo so Allah sii sa doniya,
hey sekano a manga ala a binatang sa ragat
ago so langon a manga dadalem a kalodan,

8 So kilat ago so giyaw, so ilo ago so manga gabon,
so manga babager a ndo a pepanoman ko ipesogo iyan;

9 Sekano a manga palaw ago so langon a manga bobongan,
so manga kayo a pepamangonga ago so langon a kayo a sidro,
10 So manga binatang ago so langon a pangangayamen,
so manga pepamanola, ago so dii melalayog a manga papanok,
11 So manga dato sa doniya ago so langon a bangsa,
sekano a manga olowan ago so langon a ped a manga nakoda ko doniya,
12 So manga ngongoda ago so manga raga,
so miyanga lolokes ago so manga wata.

13 Podiya iran langon so Ingaran o Allah,
ka so bo so Ingaran iyan i lebi a maporo;
so bantogan iyan na sii ko poro o doniya ago so manga langit.
14 Inipangkat iyan so gees o manga pagtaw niyan;
pepodin sekaniyan o langon o manga kaom iyan,
ago so manga mbawataan o Israil, a so manga taw a marani rekaniyan.

Podiya niyo so Allah.

SABOR 149 *So Dikir a Podi*

Podiya niyo so Allah.

Pagidaidai niyo so Allah sa bago a dikir,
a so kapepodiya on sii ko kalilimod o manga kaom iyan.

2 Kabebaya ka, hey Israil, sii ko Tohan a Miyaden reka;
pakapiyaa niyo a ginawa niyo, manga taw sa Siyon, sabap ko Dato iyo.
3 Podiya niyo so Ingaran iyan a rakes o kaseyaw,
ago mboboniboniyani niyo sekaniyan ko garingking ago kotiyapi.
4 Ka ikasosoat o Allah so manga pagtaw niyan;
pepandaraan iyan so mangangalimbabaan sa kapakadaag.

5 Kabebaya baden so manga kaom iyan sangkai a bantogan;
pagidaida siran sa kapipiya a ginawa san ko manga igaan iran.
6 Matago ko manga ngari iran so manga podi ko Tohan
ago so dow a i garangan a pedang sii ko lima iran,
7 Sa kaseopi ran ko manga nasiyon
ago so kandanega iran ko madakel a taw,
8 Kaan iran mapatong sa manga rantay so manga dato iran
ago so manga sanasanaan iran sa manga sangkali a potaw,
9 Kaan iran matoman so misosorat a inikokom ko manga nasiyon.
Giyai so bantogan o langon o manga kaom o Allah.

Podiya niyo so Allah.

SABOR 150

Podi ko Allah.

Podiya niyo so Allah.

Podiya niyo so Tohan sii ko Timplo niyan;

podiya niyo sii ko mala i gees a kawang iyan.

2 Podiya niyo sekaniyan sabap ko manga kabarakat iyan;

podiya niyo sabap ko makalalawan a kala iyan.

3 Podin iyo ron so kapekaoniya ko bogiyong;

podin iyo ron so kotiyapi ago so alpa.

4 Podin iyo ron so garingking ago kaseyaw;

podin iyo ron so tatapesan a boniboniyon ago insi.

5 Podin iyo ron so kapekaoniya ko manga pandaopan;

podin iyo ron so matanog a kapembeting o manga pandaopan.

6 So oman i isa a aden a napas iyan

na podiya iran so Allah.

Podiya niyo so Allah.